

黃御史公集  
甲乙集

唐黃御史  
集八卷

四部叢刊初編集部

上海商務印書館縮印  
縣李氏觀槿齋藏明刊本

唐黃御史集序

既竣歐陽四門集復取黃文江  
御史合刺之按通志歐陽詹與  
黃璞齊名御史諱滔璞之從弟  
也故御史有寄從兄璞詩璞仕  
而隱者也所著有霧居子初侯  
官人後與御史俱遷甫以所居  
為黃巷示不忘舊御史之詩曰  
縱徵終不起相與避烟塵又曰  
新詩說人盡舊宅落花頻情可  
見矣御史讀書在福平山之靈  
嵩寺其碑有云貞元中侍御史

林公藻水部員外郎蘊谷茲業  
文歐陽四門捨泉山而詣焉仍  
注與王式書云甫陽讀書即茲  
寺也愚考歐陽之蜀門與林蘊  
分路後詩曰村步如延壽川原  
似福平注福平即予之別墅在  
焉如是則歐陽之于甫非一日  
矣御史自叙葺齋東峰者十年  
後二十四年于舉場始忝甲第  
計貞元距乾寧凡百年有奇御  
史晚成而四門早逝杳不相及  
而璞之所為齊名亦後先踵起



云爾察其意似欲以名士厚于

詹也陳振孫惡其污蔑賢者曰

黃璞何人斯豈未之考耶御史

文瞻蔚有典則詩清淳丰潤若

與人對語和氣郁郁在洪景廬

已為確論而楊廷秀摘其寺寒

三伏兩松偃數朝枝等句尤足

以膾炙人口者然其集罕傳問

之名不甚識也諸家選詩槩所

未見獨丹鉛錄載其長門一賦

誠不能傲之以所不知爾今與

歐陽集併刻之不患傳之不廣

矣

萬曆丙午季夏之吉

賜進士出身奉政大夫南京戶

部四川清吏司郎中候官後學

曹學佺誤



唐黃御史公集序

敘曰詞章關乎氣運於唐尤驗云唐興三百年氣運升降其間而詩文因之自晉陽舉義開館官西以延文學竟用詞賦取士士以操觚顯者無慮數百家大都始沿江左頽習競於絺繪耽披靡而乏氣骨伯玉奮然洗刷沈宋燕許輩出振響以至貞元長慶經術大明脩古彌衆于時墨儒詞匠所爲詩若文咸矩矱自然不以彫飾爲工相與贊翊道真賡颺鴻化斯爲鏘鏘爾雅故文盛於韓柳皇甫而其衰也爲孫樵爲劉蛻爲沈顏詩盛於李杜劉白而其衰也爲鄭谷爲羅隱爲杜荀鶴御史生最晚而獨不然其文贍蔚有典則策扶教化其詩清淳丰潤若與人對話和氣郁郁有貞元長慶風槩祭陳林先輩諸文悲愴激越交情之深不以晝夜死生亂離契闊爲間斷馬嵬館娃景陽水殿諸賦雄新雋永使人讀之廢卷太息如身生是時目攝其故爲文若是其亦可貴已方登科時適昭宗之季年

猶覆試殿廷再中選然後得官未幾而朱梁移國因歸闔不復西故不克大章顯於世夫詎知八九葉之後得賢耳孫而平生作爲文章遂獲表見者邵州將鉞板于郡齋遣信謁序御史之從兄曰校書君璞者名見集中有閩川名士傳及霧居子予曩時嘗敘之矣故不辭而書御史諱滔字文江由四門博士至裏行監察考功諱公度邵州名沃慶元二年十月十四日煥章閣學士宣奉大夫提舉隆興府玉隆萬壽宮魏郡公鄱陽洪邁序

唐黃先生文集目錄

卷之一

賦

周以龍興賦

明皇廻駕經馬嵬賦

以不貪爲寶賦

景陽并賦

課虛責有賦

送君南浦賦

水殿賦

狎鷗賦

知白守黑賦

漢宮人誦洞簫賦賦

省試人文化天下賦

館娃宮賦

陳皇后因賦復寵賦

秋色賦

戴安道碎琴賦

融結爲河嶽賦

魏侍中諫獵賦

誤筆牛賦

省試王者之道如龍首賦

白日上昇賦

御試曲直不相入賦

御試良弓獻問賦

卷之二

五言古詩

送僧歸北巖寺

寓言

長安書事

賈客

寄友人

落花

書懷寄友人

閨怨

喜翁文堯負外病起

寄徐正字寅

秋夕貧居

五言律詩

送李山人往湘中

書崔少府居

歎水盧校書

寄漢上友人

貽林鐸

書懷

送陳明府歸衡陽

秋辭江南

入關旅次言懷

寄鄭縣李侍御

上李補闕

傷翁外甥

貽李山人

逢友人

寄湘中鄭明府

寄從兄璞

寄李校書遊簡寂觀

寄友人山居

上刑部盧員外

送友人遊邊

和友人酬寄

下第

過商山

旅懷

冬暮山舍喜標上人見訪

關中言懷

題友人山居

題友人山齋

書事

題山居逸人

題鄭山人居

秋晚山居

遊山

題王侍御宅內亭子

題道成上人院

貧居冬抄

東山之遊未遂漸通行期作四十字奉

寄翁文堯負外

貽張蟻同年

寄邊上從事

題東林寺元祐上人院

送陳樵下第東歸

寄陳礪隱

寄林寬

退居

送友人邊遊

下第出京

遊東林寺

晚春關中

河梁

送翁拾遺

贈懷光上人

憶廬山舊遊

別友人

陳侍御新居

寄少常廬同年

卷之三

七言律詩

送林寬下第東歸

商山贈隱者

送二友遊湘中

塞下

下第東歸留辭刑部鄭郎中誠

寄懷南北故人

關中言懷

閨怨

旅懷

別友人

寄羅浮山道者二首

喜侯舍人蜀中新命三首

經安州感故鄭郎中二首

出京別崔學士

鴈

寄越從事林嵩侍御

長安書事

旅懷寄友人

放牘日

御試二首

二月二日宴中貽同年封先輩渭

新野道中

酬俞鈞

寄同年崔學士仁寶

寄陳侍御

酬徐正字寅

辭府相

寄羅郎中隱

江行遇王侍御

客舍秋晚夜懷故山

絳州鄭尚書

喜陳先輩及第

延福里居和林寬何紹餘齋寄

贈宿松楊明府

送僧

贈鄭明府

江州夜宴獻陳負外

湘中贈張逸人

寓題

題陳山人居

宿李少府園林

送人明經及第東歸

斷酒

寄蔣先輩 在蘇州

旅懷

南海幕和段先輩逸韋侍御赴闕

寄南海黃尚書

送人往蘇州觀其兄

遊東林寺

贈旌德呂明府

賀清源僕射新命

浙幕李端公泛建溪

貽宋評事

催妝

寓題

傷蔣校書德山

寄楊贊圖學士

疇楊學士

寄同年李侍郎龜正

鍾陵故人

故山

塞上

烏石村

寄同年盧負外

寄同年封舍人渭

遇盧負外袞

送翁負外承贊

翁文堯負外捧金紫還鄉之命

奉和翁文堯負外經過七林書堂見寄

之什

奉酬翁文堯負外駐南臺見寄之什

翁文堯負外擁冊禮之歸一路有詩名

畫錦集先將寄示因書五十六字

奉和翁文堯十九負外中謝日蒙恩賜

金紫之什

奉和翁文堯負外文秀光賢畫錦三首

奉酬翁文堯負外神泉之遊見寄嘉什

寄翁文堯拾遺

卷之四

五言排律

省試一一吹竽

明月照高樓

廣州試越臺懷古

襄州試白雲歸帝鄉

省試奉詔漲曲江池

題宣一僧正院

和王舍人崔補闕題福州天王寺

寄獻梓潼山侯侍郎

壬癸歲書情

河南府試秋夕聞新鴈

和吳學士對春雪獻韋令公次韻

省試內出白鹿宣示百官

出關言懷

塞上

壹公山

七言排律

投翰長趙侍郎

廊時李相公

成名後呈同年

投刑部裴郎中

五言絕句

輦下寓題

寄題崔校書郊舍

秋思

芳草

輦下書事

七言絕句

入關言懷

過長江

題靈峰僧院

司馬長卿

和同年趙先輩觀文

出京別同年

歸思

東林寺貫休上人篆隸題詩

寓江州李使君

遊南寓題

九日

夏州道中



經慈州感謝郎中

寓題

寄宋明府

花

閏八月

別後

嚴陵釣臺

馬嵬三首

奉和文堯對庭前千葉石榴

翁文堯以美疹暫滯令公大王益得異

禮觀今日寵侍之盛輒成一章

木芙蓉三首

奉和翁文堯戲寄

和陳先輩陪陸舍人春日遊曲江

靈均

卷簾

啓帳

去扇

卷之五

碑記銘

泉州開元寺佛殿碑記

大唐福州報恩定光多寶塔碑記

靈山塑北方毗沙門天王碑

丈六金身碑

莆山靈巖寺碑銘

龜洋靈感禪院東塔和尚碑

華巖寺開山始祖碑銘

福州雪峰山故真覺大師碑銘

卷之六

墓誌銘

司直陳公墓誌銘

祭文

祭陳侍御

祭先外舅

祭崔補闕

祭陳先輩

祭林先輩

祭右省李常侍

祭司勳孫郎中

祭宋員外

祭錢唐秦國太夫人

祭南海南平王

卷之七

書

與王雱書

荅陳礪隱論詩書

與羅隱郎中書

啓

南海韋尚書

薛推先輩

刑部鄭郎中二首

謝試官

盧員外

侯博士

蔣先輩二首

楊狀頭

代鄭郎中上興道鄭相

代鄭郎中上恭靜盧相

代鄭郎中上令狐相

代陳蠲謝崔侍郎

西川高相

蔣先輩

沈侍御

段先輩二首

賀正二首

趙起居

崔右丞二首

韋舍人

工部陸侍郎

翰林薛舍人

裴侍郎

楊侍郎

卷之八

序

穎川陳先生集序

讚

龍伯國人讚

一品寫真讚

雜文

夷齊輔周

吳楚二醫

禱說

綿上碑

噫二篇

文栢述

公孫甲松

唐城客夢

巫比

附錄

唐昭宗實錄

莆陽志

五代史補

丹鉛總錄

目錄終

唐黃先生文集卷之一

唐監察御史閻黃泊著

賦

周以龍興賦

旋服國中位光鱗族

周以創三十代啓八百年既鳴鳳以授德復興  
龍而御乾奔天下之二分豈惟雨驟擊洛中之  
九鼎寧止波旋當其韜仁聖以表威靈湧禎祥  
而呈氣色歧梁燿銜耀之所汧隴湛蟠泥之域  
幾年食餌吞將呂望之鈎一旦飛天霹破殷辛  
之國觀夫或屈或伸非假非真澤霈六合恩濡  
兆民以息虞芮作在田之跡以却夷齊爲逆物  
之鱗掀陸海之波濤固殊鯨浪擴御名九重之宮  
室肯類蛟人則知指縱而或仗爪牙善戰而靡  
資血肉火兵戈而雖假燒尾鏡今古而未嘗寐  
日遂使盟津契會此時莫愧於雲從羨里棲遲  
昔日何傷於魚服下蟄如此高翔曷量子蠻貊  
而蟲沙附甲忠信而鬢鬣張足以雄飛革命首  
冠興王駕木德於震宮蒼然被彩應陽精於乾

象赫矣飛光所謂建皇基立寶位模日楷月規  
天矩地非三聖之尤異焉可以神物取類邈罔  
象乘鴻濛奔霆迸電驅雷走風非四靈之感通  
焉可以與周而同功豈徒角樹臣佐穴居域中  
拏開粟而攬散財滂沱有截壽九齡而豢十亂  
振奮無窮懿乎後煥放牛前光播穀愈彰聖德  
於王者益驗神蹤於介族則老聃之道漢祖之  
顏永宜雌伏

明皇迴駕經馬嵬賦

程及曉畱芳魂顧跡

長鯨入鼎今中原六龍迴轡今蜀門杳鼇闕而  
難尋艷質經馬嵬而空念香魂日慘風悲到玉  
顏之死處花愁露泣認朱臉之啼痕莫不積恨  
綿綿傷心悄悄逝川東咽以無駐夜戶下扇而  
莫曉裊雲萬疊斷腸新出於啼猿秦樹千層比  
翼不如於飛鳥初其漢殿如子燕城若讎驅鐵  
馬以飛至觸金輿而出遊謀於劔外駐此原頭  
羽衛參差擁翠華而不發天顏愴恨覺紅袖以  
難畱鴛鴦相驚熊羆漸急千行之珠淚流下四

面之霜蹄踐入神僊表態忽零落以無歸雨露成波已沾濡而不及棧閣重處珠旒去程玉壘之雲山暫幸金城之煙景旋清六馬歸秦却經過於此地九泉隔越幾淒惻於平生欒飄彩鳳之蹤鬢蛻玄蟬之跡茫茫而今日黃壤歷歷而當時綺陌雨鈴製曲空有感於宮商龍腦呈香不可返其魂魄空極宵夢寧逢曉粧輦路見梧桐半死煙空失鸞鳳雙翔鏡殿三春莫問菱花之照耀驪山七夕休瞻榆葉之芬芳大凡有國之尊罕或傾城之遇孰言天寶之南面奚指坤維而西顧然則起兵雖自於青娥斯亦聖唐之數

以不貪為寶賦 不驚他貨士之意說

以玉為寶今寶之常名以不貪為寶今寶其可驚彼空矜其純粹此特稟其清貞潔已虛中既處一言而落落飛聲擅價終傾眾寶以鏗鏗宋人獲希代之珍子罕當連城之贄且曰伊我之寶非君莫遺提攜而日月耀手跪拜而丘山屬

意殊不知飲水勵節如水之色何煩匪石推心剖石之姿足棄如此則別號瓊瑰得之非荆山者哉獨為奇美種之乃情田而已莫不掃埃垢於嗜慾擴規模於廉恥器之於國雕鍍皆讓劍之流利之於人質鬻悉投錢之士繇是煥爛羣目鏘洋一時自叶至珍之比永辭凡口之嗤豈可輕重貴賤訊議磷緇街實矜華爾則以琬琰當也輝今映古我則以惇素稱之卒使民知反樸之風俗靡攫金之過豈唯清白以足謂固亦溫良而大播所以不潤屋而潤身蓋非貨而曰貨則知以非貨而為寶者少以所貨而為寶者多少則與珪璋而合美多則與瓦礫而同科故其滌以蕪穢加諸琢磨採於已而不採於彼貴於我而不貴於他縱饒秦氏當時曾欺趙地爭奈楚君昔日薦刑荆和宋人於是辭默而慙顏頰而忝斯言既得以佩服吾寶乃分其妍醜誰能持確論秉貞姿問貪夫之信不

景陽井賦

擴然舊事國艱人悲

臺城破兮煙草春舊井湛兮苔蘚新自亡跡於  
天子幾興懷於路人蓋悲萬乘之尊投身到此  
豈爲一泓之故舉世驚神叔寶以立作荒君在  
爲亡國玉樓之絲管宵咽桂岸之兵戈晝逼御  
天失措且四方之大何從沒地無慙顧九仞之  
深可匪便委鴻業旁攜綠鬢奔入泓澄之內冀  
逃吞噬之艱殊不知理昧納隍處窮泉而詎得  
誠乖馭朽攀素縷而胡顏旣而出作窮鱗奪歸  
偏爵一時之覆轍如此千載之遺波儼若陌上  
澄澈丘中寂寞暗淘人事以冰釋旁寫江天而  
鏡擴青銅有恨也從零落於秋風碧浪無情寧  
解流傳於夜壑徒觀其蕪沒沙逕葳蕤澤葵漁  
樵汲引荆棘榮衰雖虛中而可鑒終徹底以堪  
悲寶鏡休分豈有得銅之日雕筵罷設永無投  
轄之期固以滌盡繁華銷平曩舊猶驚鼎沸於  
餘湧更弔山崩於疊甃荒涼四面花朝而不見  
朱欄滴瀝千尋雨夜而空啼碧瀟斯則堙塞終  
古蕭條永年半竭而珠璫或出陸沈而翠蓋寧

旋莫可追尋玉樹之歌聲邈矣取堪惆悵金瓶  
之咽處依然嗟夫穿鑿豈殊淺深非異蓋悲鮒  
蟄之穴不是龍潛之地所以避匿其中莫比漢  
高之事

課虛責有賦 理派空至方明得門

虛者無形以設有者觸類而呈奚課彼以責此  
使從幽而入明寂慮澄神世外之筌蹄旣歷垂  
華布藻人間之景象旋盈昔者陸機賦乎文旨  
推合毫佇思之道得散樸成形之理雖羣言互  
發則歸於造化之中而一物未萌乃鑠在渺茫  
之始是宜囊括玄牝箕張混沌暗造無爲之城  
潛臻不死之根致彼音塵莫隱於秋毫纖芥令  
其影響俄通於萬戶千門然後扇作波瀾騰爲  
氣色無論於遠近高下罔計於飛沉動植如鏗  
至樂非所聞而遽聞若摘玄珠非所得而遽得  
則知文本於道道不可量香韜存而韞亾道散  
於文文不可當乃飛鋒而耀鋌取之者取之逾  
遠偶之者偶之不常故其越兔影邁烏光向無

聲無臭之間陶開品彙於出鬼入神之際定作  
圓方乃使巧拙應機虧全任器考其始而始則  
無覩驗其終而終則有自物居恍惚牢籠而俟  
以真歸精匪杳冥搜索而期乎實至所謂擺揚  
恬澹剖判虛空冀其神賦逮彼幽通豈惟率爾  
邈然散着於山川草木風飛泉湧爭飄於鳥獸  
昆蟲夫如是則洞啓幽玄曾無險隘流音既自  
於扣寂成象還同於畫卦然知文苑之菁華亦  
冲和之一派

送君南浦賦

越空綿目傷妾是君

南浦風煙傷心渺然春山歷歷春草綿綿那堪  
送行客啓離筵一時之萍梗波濤今朝惜別千  
里之秦吳燕宋何日言旋當其繫馬出船候潮  
待月低徊而少婦對景愴恨而王孫望闕莫不  
撚嶢竹以淒楚撥湘絃而激越且當蘋澗把芳  
酒以畱懽莫被薰風吹片帆而便發君不見陌  
上塵中奔西走東車輪似水馬足如蓬夜泊而  
猿啼霜樹晨征而月在煙空爭得枝間比翼更

同於越鳥只應波上離羣便逐於燕鴻莫不太  
苦行人偏傷別妾龍媒而嘶出金埒鸞扇而持  
歸玉篋于時莫展歌喉全沈笑靨郊天路口愁  
攀夾渡之柳條採蕨山前忍看解維之桂檝是  
知無人免別有別皆傷使人落顏貌枯肺腸淚  
成雨鬢侵霜朝悲五嶺暮怨三湘夢去不到書  
來豈常況一川之煙景茫茫橫衝楚徼兩岸之  
風濤渺渺直截炎荒無不銷魂如何舉目齋行  
而寶劔三尺畱下而明珠十斛林駢樛木摧誠  
而敢望合懽洲躍嘉魚取信而當期剖腹及夫  
樂闌人散龜飛日曛遺鞭却取解珮還分玉牕  
之歸步愁舉蘭棹之移聲忍聞須知赤帝之江  
頭兩心似火莫自蒼梧之岸曲一去如雲雖竹  
錦衾而贈我終攜錦字以醺君已而誰不別離  
別離如此誰不相送相送于是則東門與北梁  
不足云爾

水殿賦

魏暈去日有水空流

昔隋煬帝幸江都宮制龍舟而礙日揭水殿以

凌空詭狀奇形雖壓洪流之上崇軒峻宇如張  
丹禁之中當其城苑興闌煙波思起截通魏國  
之路鑿改禹門之水於是怪設堂殿妙盤基址  
屏開於萬象之外嶽立於千艘之裏還如玉闕  
控鼇海以崢嶸稍類雲樓拔蜃江而聳峙皆以  
綵飾無比雕鏤罕量裝羽毛而搖裊疊瓊壁而  
熒煌鏡豁四隅遠近之風光寫入花明八表古  
今之壯麗攢將天子乃縱巡遊極駕馭登巨艦  
以龍躍擴深局而虎踞旌旗劔戟以絡野珠翠  
歌鍾而觸處三十六宮之雲雨瀕洞隨來一千  
餘里之煙塵冥蒙撲去百幅帆立千夫腳奔上  
搖烏兔下窺蛟龍天吳邂逅以驚殺地軸參差  
而軋繇蘭橈桂檝之駢闐行辭洛口駕瓦虹梁  
之岌業坐徹夷門啓閉詎常登臨罔畢雷旬之  
竹箭衝過輻湊之木蘭貯出柳絲兩岸裹爲朱  
檻之春水調千聲送下清淮之日旣而盪驚鬼  
瞰遽及神謀鑿輅而飄成覆轍樓船而墮作沉  
舟寶祚皇風一傾亾於下國霞牕繡柱大零落

於東流嗟夫駕作禍殃樹爲罪咎穿河彰沒地  
之象泛水示沉泉之醜血化兆庶財殫萬有所  
以湯武推仁不得不加兵於癸受

狎鷗賦

釋意與遊逸之汀曲

海童以泛泛浮浮受于白鷗遂將窮於賞翫乃  
相狎以遨遊彼鳥何知苟同心而同德斯人足  
驗諒不忤而不求當其訪物外之高蹤得沙間  
之逸致雲心瀟灑以薦往鶴貌飄颻而疊至列  
爲儔侶肯無求友之聲卻盡猜嫌皆得忘形之  
意至若海鏡秋碧天藍霽青磨開桂月於浩渺  
畫出蓬山於杳冥爾乃瞻雪影緬風翎曲得其  
情此曠蕩而來依別派不言而信彼聯翩而飛  
下迴汀四目夷猶兩情容與曾無隼擊之患忘  
到鳩居之所羅列靡慚於交契固類朋遊參差  
罔愧於弟兄還同鴈序斯則別號羽客參爲水  
僊楊柳之江頭雨夜蒹葭之渡口霜天莫不探  
此景象窮乎歲年異雞羣之迴處殊鶯谷之高  
遷掃塵緒以皆空那虞觸網負身弓而不縮詎



肯驚弦則知蟬蛻是非羽翔凡俗豈鷹揚於霄漢之外乃鸚立於煙濤之曲因嗤鴻渚蓋春去以秋來鬪笑鵲河竟離長而會促其父既駭於斯爰令執之纜及入籠之念已興登俎之疑潮滿滄洲游泳空期於水際日生丹壑翔翔遠在於雲湄所謂禍機中藏物情外釋且斯鳥之猶爾豈於人而能隔則包含詭紿之流宜覽之而改易

知白守黑賦 為後之則跡無顛墜

白之能知須守黑於所為黑之能守則知白而無咎聖人所以立言於彼垂訓於後將令學者得韜光用晦之機不使來人有街實矜華之醜是宜採厥理扣其辭豈非白也吐耀含輝稟西金而成姿或玄黃而可得或蒼赤而可期知之者必能洞徹萬物昭彰一時故為禍患之所之黑也光沉影匿漫北水而成色既視之而不見亦曉之而莫得守之者必能混合羣象冥蒙衆惑故為安寧之所則繇是任懷霜而懷雪不在

明言縱如壁以如珪終須默識如此則準繩萬國龜鏡八區俾其擅清名者若昧抱明智者如愚有於不有無於不無亦猶玉之貫虹以韞石而為妙珠之象月以蚌胎而為殊論於物而物且能爾驗於人而人焉忽乎是以釣璜於西渭之濱扣角向南山之夕須知則足以招禍莫若漆身而遁跡君不見斗牛鳥兔垂大明而或隔陰靈麟鳳龜龍作嘉瑞而常居數澤則知以白藏黑兮道無不全以白離黑兮理其不然若內包乎皎皎當外處乎綿綿故懷希代之珍者被褐負不羈之才者草玄然後弘彰典式克免危顛大如是則垂戒無垠推誠觸類靡令受彩之質或爽處蒙之意吾徒也勉之哉佩帶斯言而勿墜

漢宮人誦洞簫賦賦 清韻獨新宮娥諷誦

王子淵兮誰與倫洞簫賦兮清且新麗藻上聞於天子妍詞遍誦於宮人名價有茲寫札於御牋彤管風流無比吟哦於貝齒朱脣斯賦也述

江南之翠竹生彼雲谷甘露朝灑瑞煙晴撲般斤遽取於貞勁夔律乃知其韞蓄既而植物惟一樂工惟獨九重聖主俄聆於玉韻金聲兩掖佳人爭致於瑤編繡軸受授相從彤闈絳宮始喧喧而歷覽旋一一以精通十二瓊樓不唱鸞歌於夜月三千玉貌皆吟鳳藻於春風莫不象殿慙魂巫山破夢應教墨客以心舛解得紅妝之口諷時時桂席驚飄舞雪於羅衣往往蘭臺誤下歌塵於綺棟于時閑趙瑟寢秦箏駐雲雨咽咸英非春而御苑花拆當夏而幽閨景清如鷺人人卻以詞鋒而勵吻雕龍字字爰於禁署而飛聲泉噴香喉雲靡綠鬢豈賈珠之歌同調固如簧之言別韻遂使霞牕觸處不吟統扇之詩樂府無人更重箜篌之引斯則琴賦與笛賦奚過才子獲才人詠歌體物之能有是屬詞之道如何一千餘字之珠璣不逢漢帝三十六官之牙齒詎啓秦娥方今天鑒求文詞人畢用有才可應於妃后工賦足流於嬪從洞簫之作兮

何代無誰繼當時之吟誦

省試人文化天下賦

觀彼人文以化天下  
乾寧二年及第

明彼今古聞諸聖賢易垂言而著在八卦人有文而形于普天用以成章既驗斯風之肅穆矚之於物乃知厥德之昭宣吾君秉此格言恢乎至理以爲文在天而苟可鑒文在人而誠足視在天則時變從之在人則化成有以故體此以御宇取茲而教人且文也肇自河龜見洛書陳道德故仁義新出無爲而入有象齊父子而一君臣既而上古選中古邇苟流播之如此乃弛張而若彼始則六十四位演自周王旋則三百五篇刪於孔氏故得有國之君準繩斯文詩書禮樂以表裏于戚俎豆以區分莫不經天緯地髣髴氤氳布彼寰瀛風行而草偃被於億兆玉潔而蘭薰然後鏗作咸韶散爲風雅調暢動植周通夷夏車書得以合矣貴賤與而同也遂使九州四海皆瞻黼黻於朝端墨客詞人交露鋒鏃於筆下大哉人文之義也煥矣赫矣可名可

觀唯聖朝之所擅豈悖德之能干推其時而時  
或異論其道而道斯完故將垂百王而作範豈  
唯充萬國以咸懽者也夫如是則肩比三王威  
銷五霸弘彰馭馬之成政克俾雕龍之擅價彬  
彬乎哉郁郁乎哉有以見我唐之至化

館娃宮賦

上驚空壕色施碧草

吳王歿地今吳國蕪城故宮莫問今故事難名  
門外已飛其玉弩座中纔委其金觥舞榭歌臺  
朝爲宮而暮爲沼英風霸業古人失而今人驚  
想夫柱殿中橫蘭房內創丹楹刻楸之殊制鉤  
砌文軒之詭狀如從渤澥徙蓬闕於人間若自  
瑤池落蘂宮於地上繡柱雲楣飛蛟伏螭基局  
鬱律鈎楯參差碧樹之珍禽夏語綠隄之瑞景  
冬曦吳王乃波伍相輦西施珠翠族來居玉堂  
而頊洞笙簧擁出登綺席以逶迤觸物窮奢含  
情愈惑欲移楚峽於雲際擬鑿殷池於檻側花  
顏縹緲欺樹裏之春光銀焰榮煌卻城頭之曙  
色殊不知敵國來攻攢戈耀空虎怒而拏平雉

堞雷訇而擊碎簾櫳甲馬萬蹄卷飛塵而滅沒  
瓊樓百尺爆紅燼之冥濛悉由修袖舞殃朱唇  
唱隳瑤堦而便作泉壤玉礎而旋成薛石恨畱  
山鳥啼百卉之春紅愁寄瓏雲鏤四天之暮碧  
悲夫往日層構茲辰古壕香逕而同歸寂寂稽  
山而杳自高高遺堵塵空幾踐羣遊之鹿滄洲  
月在寧銷怒濁之濤已而西日息息東波浩浩  
松楸而駢作荒隧車馬而輾通長道彼雕牆峻  
宇之君宜鑒丘墟於茂草

陳皇后因賦復寵賦

言情暮作國黛朝天

陳皇后一鏤長門蕭條渥恩欲寫退宮之永恨  
因求體物之嘉言蜀郡才高述遺芳於桃李漢  
皇心感歸舊職於蘋蘩想夫跡墜城南寵移天  
顧難期獻鬻於春晝不忍解簪於日暮瓊樓寂  
寂空高於明月秋風瑤草萋萋莫輾於金輿玉  
輅于此蓄憤夫何釋情犀浦有多才之著上林  
推獨步之名沽酒而居每樂當壚之事量金以  
至爰流擲地之聲於是搗妍詞貌濃黛伴錦字

陳綺態鬱芬馥於蒞席悄丁當於珠珮鵲巢入  
搆翻成別鶴之悲馬首虛瞻不識牽牛之會振  
動文苑旋彰國朝既切採靡於藻麗遂牽連理  
於桃夭一旦惻聖鑒錫嘉昭已無爲雨之期空  
懸夢寐終自凌雲之製能致煙霄莫不傾北園  
駭南國絲蘿而昨日靡託珠翠而今朝改色玉  
臺有恨舞鸞之影孤來金闕無恩吐鳳之才雪  
得設使幸望顛若含情默然擢髮同論於漢殿  
揮毫莫購於巴川則此日前魚定作小鱗而赴  
海寧令破鏡卻成圓月以昇天懿夫揆天之手  
雖奇麗木之珍可博苟非茲賦之讚詠奚救當  
時之黜削方今妃后悉承歡不是後賢無此作

秋色賦

雨作愁成然知興起

白帝承乾乾坤悄然潘岳乃驚素髮感流年抽  
綵筆疊花牋驅走羣言寫壹鬱之懷矣搜羅萬  
象賦蕭條之景焉于時淒淒漠漠零露蒙作杳  
杳冥冥勁風吹成或青山兮薄暮或綠野兮新  
晴昨日金輿天子自西郊而迎入此時火柿祝

融指南極以邁征於是跋烏滅赫顧兔添明地  
上落紅菓之態煙中吟玉笛之聲華嶽峯高染  
蓮華而翠活湘川樹老換楓葉以霞生愈碧吳  
山偏清漢水松柏風高今歲寒出梧桐蟬急今  
煙翠死衡陽落日和旅鴈以飛來劔閣中宵逐  
哀猿而嘯起遂使隋堤青恨吳嶺綠愁廬阜之  
蟾開石面錢塘之雪入濤頭空三楚之暮天樓  
中歷歷滿六朝之故地草際悠悠魚美東鱸獸  
律西虎送鸞扇之藏篋迎蛛絲之織戶海上而  
輕籠皓月皎潔成冰隴頭而惹着陰雲蒼茫欲  
雨斯則寒暑推移衰榮可知金生火死菊換蘭  
萎豈惟自遐及邇窮高極卑上澄鵲漢以清淺  
東瑩鰲洲而渺瀰數聲之玄鶴驚時九臯搖落  
一夜之新霜撲處百卉離披是時坐客聞之伴  
色揣稱咸言此日之摘藻更苦曩篇之秋興

戴安道碎琴賦

徒候徽響致聚深情

拔塵俗之能琴其誰不欽戴安道之擅名斯異  
武陵王之慕義彌深降使殷勤將召來以聆雅

越持誠慷慨爰擊碎以示芻襟想夫名利莫羈  
煙霞爲賞澗松雖聳於梁棟野鶴不侵乎羅網  
吳山越水韜物外之清光蜀軫虞絲播人間之  
妙響杳杳區區何人戒途白屋忽驚於嘶馬朱  
門欲俟於啼鳥焉有平生探樂府錚鏘之妙爰  
教一旦厠侯門曼擊之徒於是賁出月牕毀於  
蓬戶擲數尺之鸞鳳颯一聲之風雨朱絃併斷  
類水泉裂石以丁零玉柱交飄誤隴鷹驚弓而  
飛聚使者焉知宣言大非且異鍛珠之義寧同  
碎斗之譏陌上迴塵走清風於玉殿堂間釋手  
章素節於金徽于時野客相高時人或陋梧雕  
桐斷以寧顧漆解膠離而莫救至若池亭夜月  
之景巖谷春風之候遙當野岸肯思流水之曾  
彈靜對庭蕪待從幽蘭之不奏向若投綠綺以  
無意緬維城而有情亡一時之高躅矜六律於  
新聲則此日知音但仰躍魚之弄碧山煙霧寧  
畱藏豹之名則知藝至者不可以簪笏拘情高  
者不可以王侯致終挺特以驚俗不斯須而辱

志于今人語其風孰不揖當時之事

融結爲河嶽賦

形質中成人專路復

象帝以伐出物我陶開杳冥至精風散元氣雨  
零一濁一清既定乾坤之體或融或結遂爲河  
嶽之形豈非斷乎鼇足之時剖彼雞黃之日二  
儀各立以交泰一氣旁流而洋溢於是蒼茫不  
定奔爲歸國之墟積聚無從疊作干霄之質則  
令川陸天下江山域中淺深莫極夷險難窮剛  
柔隨之而洶湧嗜欲繼之而隆崇讎雪浪與霜  
濤下吞方厚拔重峯兼疊嶂上列圓空爾乃產  
鱗介蟲沙植毛羽草木星辰晝夜以明滅烏兔  
東西而往復則有龜負龍擎文籍其陽九陰六  
共觸愚移傾缺其天樞地軸如疏朴略波萬壑  
以派分似截渟和仞千巖而雲轟旋聞大禹鞭  
神巨靈湧身鑿通浩渺擘斷嶙峋然後惣注滄  
海爭磨碧旻舟楫風生航利名於世世輪轅雷  
起駕禍福於人人至今若帶輿言如拳設喻牢  
籠下土以箭急控壓中洲而石固三門九曲競

呈昇沒之源太華維嵩交闕奔衝之路誰能究  
厥理考其情溝瀆曷爲而散作丘陵奚補而攢  
成致彼至柔灑回邪而互急俾其峻極于道德  
以全平吾欲炭韜陰陽鑪燃天地鼓將邈迤之  
濬谷寫破連延之積翠令今日之形象復當時  
之寤寐默默綿綿然卻歸於無事

魏侍中諫獵賦

我太宗之啓聖崇基魏侍中之推誠輔時恐羽  
獵以失德採風騷而屬詞瞻仰皇情欲止畋遊  
之事激揚丹懇爰陳諫諍之詩當其內則雍熙  
外無攻討間憶擒飛而逐禿靜乃搜林而索草  
殺傷有度雖知不損於仁心獮狩非時或慮微  
妨於帝道於是傾素節揣深衷何以闡禹湯之  
誠莫如刪周召之風願開三面之仁上行君聖  
遂取二南之義下効臣忠爾乃揮以綵毫流十  
妙墨文高而簡牘增煥思苦而煙霞動色莫不  
大罄箴規堅持讜直輝珠耀玉面陳丹陛之前  
諷古諭今袖獻紫宸之側錯落清唱錚鏦雅言

敘獲獸爭禽之理述好生惡殺之源少補玄化  
輕禔至尊字字而請休馳騁篇篇而乞罷驅奔  
非不能繼子雲操賦而進非不能續司馬裁書  
以論蓋以詩也中律鏘金成章璨綺掬山川氣  
象於彼載帝王興衰于此以之刺上則上或風  
從以之化下則下皆草靡所以摛此章句依於  
典墳希一覽而思覃羽族冀再觀而惠及毛羣  
庶幾六藝之妍終資睿鑒當使三驅之禮不越  
明文然後甲馬休飛驛弓莫控俾百獸以率舞  
致四夷之入貢故其旌逸調賞清詞錫綵繒而  
甚衆

誤筆牛賦

從其誤着異質真成

王獻之續畫彌精變通可驚失手而筆唯誤點  
應機而牛則真成用是飾非既擅一時之妙持  
功補過爰垂千載之名當其團扇羽輕素縉雲  
薄搦金管以如勇露秋毫而似削莫不佇思翔  
鸞澄神丹鵲臨風緬想滿輪之桂月鋪開對景  
嘆嗟一點之松煙飄着隱映取匿依稀漆濃既

黑白之斯異顧東西而曷從南容之玷難磨空  
傷往事曹氏之蠅可學遂展奇蹤於是逐手搗  
成隨宜演出斯湏亾墮落之所頃刻見下來之  
質筆爲鋒也無慙賣劒之年墨作池焉豈愧蹊  
田之日則知負藝通神呈功駭人速從無而入  
有俄背僞以歸真況乎烏文黛暗駁彩花新兔  
翰初停旁起落毛之想鼠鬚尚對遙懷食角之  
因足令飲穎牽懷飯秦動思坐驚踐葦之處立  
驗放桃之地手捫而執紉罔殊不惹而飾繒奚  
異經年不去寧生舐犢之心終日長閑豈有駕  
車之意所謂取象於斯稱工在茲雖恨纖忒而  
到此終持妙跡以加其矧復首尾曲盡毫釐莫  
遺示不用於秋深之日自無全於縷斷之時桓  
溫乃拂拭增驚周旋載顧徒見奇於手巧了莫  
知其筆誤大凡遊藝之人無不卻塵而掃污

省試王者之道如龍首賦

龍之視聽有符  
君德乾符二年

下第

王者以御彼萬國居于九重既體天而立制遂

如首以猶龍視聽無偏四海自看其波湊聰明  
罔失兆民咸覩其雲從豈非祖述聖明披陳道  
德以王者爲天下之大域中之式非滢耳目不  
可以燭暗通幽非審細微不可以開基建極於  
是設諭斯異微文特殊以端拱之尊比義取產  
澤之靈合符則而象之既不雷同於形質區以  
別矣爰將首冠於寰區然後則嶽嶽高居顛顛  
克定翼左右而何慙角聳鏡遠近而宛同神瑩  
雖云韎續洪纖之狀咸觀縱使垂旒巨細之音  
畢聽則知播雍熙之化爲昭聖之君遠配騰驥  
於水物蓋彰超邁於人羣濬恩波而固類與雨  
呈瑞氣而非同召雲侷其矯舉之形無幽不鑒  
煥彼孤標之貌有象皆分故得迴拔可觀感通  
自有散皇明而珠耀於領揚德澤而浪生于口  
寧同荀爽只擅美於弟兄更異華歆但垂名於  
朋友所謂表有截播無私乃藹然而同德非蠢  
爾以呈姿言乎漢祖之顏方能比也念彼伯陽  
之道未可方之今我后變見乘時飛翔叶理四

方盡入於傾聽陸海無遺於俯視夫如是則龍之首今未可論功而較美

白日上昇賦

人習道優玄空舉步

天上神仙人間得焉青囊有術白日昇玄能拔跡之如是非稟生之偶然明明而飛出寰區其誰不駭去去而立臻霄漢成道奚先斯人也學至感通質離寒暑揮毫而金簡初載端冕而玉皇有佇綿邈而龜臺鶴浦幾劫勤求參差而羽駕霓裳一朝輕舉當其瑞景融融圓虛碧穹有煙霞兮蒼鬱數處有鸞鳳兮盤旋半空競矚塵眼誰原道風俄然乘軒后之龍朝辭水上忽爾控王喬之鶴晝入雲中滅沒孤飛飄飄莫駐數聲如觸於瓊珮一片漸高於綵霧何門積學換俗骨以輕輕此日登真躡瑤池而步步莫不極雲路逗天津崑丘入境閭苑尋春瓊樹之煙花有主藥珠之官闕無塵翹首仰攀便接蓬壺之士佝眸俯視大驚朝市之人得非龍虎專修陰陽久習早成金鼎之九轉迎嚙玉鑪之一粒則

必夙居丹壑冥契浮丘卻歸鼇背之三島遠別羊腸之九州不然者安得從地面昇雲頭當紅塵之午景爲碧落之良遊較美古今列子之乘風固劣論功晝夜姮娥之奔月非優懿夫職轡亭亭烏光杲杲爰脫屣於方厚驟致身於蒼昊蓋以研鍊斯至囂煩克掃愚將蹈妙域以扣玄關學取上昇之道

御試曲直不相入賦

題中曲直兩字爲韻釋云邪正殊途各有

好惡乾寧二年覆試

曲也者厥理惟何直也者其詞可屬一則見回邪之所自一則非平正而不欲故聖人立此格言爲乎懿躅俾有家而有國不與混同今自高而自卑靡相參觸至如木也或表從繩之直或疊來巢之曲雖則合煙帶雨共呈蒼翠於巖間而聳本盤根各稟規模於山足勿言同地而錯雜固乃殊途而瞻矚所以方能中矩俟良匠之所知勁不爲輪信奇材而可錄莫不分彼邪正鎮於時俗且木之理今猶不差忒人之道今切



在忠直直也不可以曲從曲也不可以直飾行於已而已有異施於人而人是測繇是屈原在楚鋪其槽而不為比干相殷剖其心而可得顯惟忠謹之受性豈與邪諛而同域其不相入也理苟如是俗奚以惑小人曲媚或乘造次以得時君子直誠可仗天明而輔國今我后恢睿哲以御乾澄聖心而立極惡似鉤而在物樂如絃而比德惟曲是斥彰萬乘之準繩惟直是求示百王之楷式微臣之獲詠歌敢不佩之於取則

御試良弓獻問賦釋云太宗問工人木心不正則脉理皆邪於理

道取五聲字次第用各雙聲為賦格乾寧二年覆試

文皇帝以精求要義下訪良弓以木心之邪正既別將理道之比方乃同木若有邪奚副準繩之一一理如無苟必資國祚之崇崇斯蓋體元立制啓聖乘乾與禹湯而接軫將堯舜以差肩親於物也必有誠焉言念為弓尚窮玄於脉理豈於有國不注意於英賢否則何以弘丕國於赫赫垂寶祚於綿綿者哉則知黃帝造舟車之

旨其難為比周武倒干戈之文殊不稱美觀草木而尚此燭幽統寔區而足彰致理遂使度木掄材之子每自依依獻可替否之臣曾非唯唯今吾皇播聲教以鑄洋濬恩波而浩汗乾坤與之而合德夷夏有之而一貫斯弓不制洞其理以明明斯問克興露其言而粲粲儒有生在江嶺來趨輦較波濤久慕於化鯤今後闕

唐黃先生文集卷之一

唐黃先生文集卷之二

唐監察御史闕黃滔著

五言古詩

送僧歸北巖寺

北巖泉石清本自高僧住新松五十年藤蘿成

古樹題詩昔佳士

滔表丈從叔有名於當時兼四門薛博士俱曾題詩

風二林喻上智失扣關多被浮名誤蓮局壓月

澗空美黃金布江飄島嶼沉木落樓臺露伊余

東還際每起煙霞慕旋為儉府招未得窮野步

西軒白雲閣師辭洞庭寓越城今送歸心到焚

香處

寓言

流年五十前朝朝倚少年流年五十後日日侵

皓首非通非介人誰論四十九賢哉遽伯玉清

風獨不朽

長安書事

終不離青山誰道雲無心卻是白雲士有時出

中林昨日擊紫泥明日要黃金炎夏羣木死北

海鷺波深伏蒲無一言草疏賀德音

賈客

大舟有深利滄海無淺波利深波也深君意竟

如何鯨鯢齒上路何如少經過

寄友人

君愛桃李花桃李花易飄妾憐松柏色松柏色

難凋當年識君初指期非一朝今辰見君意日

暮何蕭條人門有勢利孰能無驚囂

落花

落花辭高樹窠是愁人處一一旋成泥日暮有

風雨不如沙上蓬根斷隨長風飄然與道俱無

情任西東

書懷寄友人

此生如孤燈素心挑易盡不及如頑石非與磨

礪近常思揚子雲五藏曾離身寂寞一生中千

載空清芬

閨怨

妾家五嶺南君戍三城北鴈來雖有書衡陽越

不得別久情易料豈在窺翰墨塞上無煙花寧  
思妾顏色

喜翁文堯員外病起

衛玠羊車懸長卿駟馬姿天嫌太端正神乃滅  
風儀飲水俾消渴斷穀皆清羸越僧誇文炷秦  
女隔花枝自能論苦器語見泗州和尚碑不假求良醫  
驚殺漳濱鬼錯與劉生隨昨日已如虎今朝謁  
荀池揚鞭入王門四面人熙熙青桂任霜霰尺  
璧無瑕疵迴塵却惆悵歸闕難遲遲

寄徐正字寅

八月月如水登樓見姑射美人隔千里相思無  
羽駕紅蘭裏露衰誰以流光訝何當詩一句同  
吟祝玄化

秋夕貧居

聽歌桂席闌下馬槐煙裏豪門腐梁肉窮巷思  
糠粃孤燈照獨吟半壁秋花死遲明亦如晦雞  
唱徒爲爾

五言律詩

送李山人往湘中

漢渚往湘川乘流入遠天新秋無岸水明月有  
琴船露坐應通曉萍居恐隔年獄峯千萬仞知  
上囁猿巔

書崔少府居

魯史蜀琴旁陶然舉一觴夕陽明島嶼秋水淺  
池塘世亂憐官替家貧值歲荒前峯亦曾宿知  
有辟寒方

敷水盧校書

九霄無詔下何事近清塵宅帶松蘿僻日唯猿  
鳥親吟高僊掌月期有洞庭人莫問煙霞句懸  
知見獄神

寄漢上友人

襄漢多清景東遊已不能蒹葭照流水風雨撲  
孤燈獻賦聞新鴈思山見去僧知君北來日惆  
悵亦難勝

貽林鐸

終被春闈屈低回至白頭寄家僧許獄釣浦雨

移洲戰士曾憐善豪門不信愁王孫草還綠何  
處擬羈遊

書懷

退耕逢歎歲逐貢愧行朝道在愁雖淺吟勞鬢  
欲凋破村虹入井孤館客投魘誰怕秋風起聽  
蟬度涓橋

送陳明府歸衡陽

雛鶴兼留下單車出柳煙三年兩殊考一日數  
離筵久別湖波綠相思嶽月圓翠蘿曾隱處定  
恐卻求仙

秋辭江南

灞陵橋上路難負一年期積雨鴻來夜重江客  
去時勞生多故疾漸老少新知惆悵都堂內無  
門雪滯遺

入關旅次言懷

寸心唯自切上國與誰期月晦時風雨秋深日  
別離便休終未肯已苦不能疑獨愧商山路千  
年四皓祠

寄鄭縣李侍御

古縣新煙火東西入客詩靜長如暇日貧更甚  
閒時僧借松蘿住人將雨雪期三年一官罷嶽  
石看成碑

上李補闕

十洲非暫別龍尾肯慵登諫草封山藥朝衣施  
衲僧月畱江客待句歷釣船徵終恐林棲去餐  
霞葉上昇

傷翁外甥

江頭去時路歸客幾紛紛獨在異鄉歿若爲慈  
母聞青春成大夜新雨壞孤墳應作芝蘭出泉  
臺月桂分

貽李山人

野步愛江濱江僧得見頻新文無古集往事有  
清塵松竹寒時雨池塘勝處春定應雲雨內陶  
謝是前身

逢友人

彼此若飄蓬二年何所從帝都秋未入江館夜

相逢瘴嶺行衝夏邊沙住隔冬旅愁論未盡古  
寺扣晨鐘

寄湘中鄭明府

縣與白雲連滄洲況縣前嶽僧同夜坐江月看  
秋圓琴拂莎庭石茶擔乳洞泉莫耽雲水興疲  
俗待君痊

寄從兄璞

縱徵終不起相與避烟塵待到中興日同看上  
國春新詩說人盡舊宅落花頻移覓深山住啼  
猿作四鄰

寄李校書遊簡寂觀

古觀雲溪上孤懷永夜中梧桐四更雨山水一  
庭風詩得如何句仙遊寂勝宮卻愁逢羽客相  
與入煙空

寄友人山居

斷嶠滄江上相思恨阻尋高齋秋不掩幾夜月  
當吟落石有泉滴盈庭無樹陰茫茫名利內何  
以拂塵襟

上刑部盧員外

誰識在官意開門樹色間尋幽頻宿寺乞假擬  
歸山半白侵吟鬢微紅見藥顏不知琴月夜幾  
客得同閒

送友人遊邊

虜酒不能濃縱傾愁亦重關河初落日霜雪下  
窮冬野燒枯蓬旋沙風匹馬衝薊門無易過千  
里斷人蹤

和友人酬寄

新發煙霞詠高人得以傳吟銷松際雨冷咽石  
間泉大國兵戈日故鄉饑饉年相逢江海上寧  
免一潸然

下第

昨夜孤燈下闌干泣數行辭家從早歲落第在  
初場青草湖田改單車客路忙何人立功業新  
命到封王

過商山

燕鴈一來後人人盡到關如何衝臘雪獨自過

商山羸馬高坡下哀猿絕壁間此心無處說鬢  
向少年班

旅懷

蕭颯聞風葉驚時不自堪宦名中夜切人事長  
年諳古畫僧留與新知客遇談鄉心隨去鴈一  
一到江南

冬暮山舍喜標上人見訪

寂寞三冬杪深居業盡拋逕松開雪後砌竹忽  
僧敲茗汲冰銷溜鑪燒鵲去五巢共談慵僻意微  
日下林梢

關中言懷

三秦五嶺意不得不依然跡寓枯槐曲業蕪芳  
草川花當落第眼雨暗出城天層閣浮雲外何  
人動管絃

題友人山居

到君棲跡所竹逕與衡門亦在乾坤內獨無塵  
俗喧新泉浮石蘚崩壁露松根更說尋僧處孤  
峯上嘯猿

題友人山齋

疎竹漏斜暉庭間陰復遺句成苔石茗吟弄雪  
聽蒼沙草泉經澀林齋客集遲西風虛見逼未  
擬問京師

書事

望歲心空切耕夫盡把弓千家數人在一稅十  
年空沒陣風沙黑燒城水陸紅飛章奏西蜀明  
詔與殊功

題山居逸人

十畝餘蘆葦新秋看雪霜世人誰到此塵念自  
應忘斜日風收釣深秋雨信梁不知雙闕下何  
以謂軒裳

題鄭山人居

履迹遍莓苔幽枝間藥栽枯杉擎雪朵破牖觸  
風開泉自孤峯落人從諸洞來終期宿清夜斟  
茗說天台

秋晚山居

爽氣遍搜空難堪倚望中孤煙愁落日高木病

西風山寂樵聲出露涼蟬思窮此時塵外事幽  
默幾人同

遊山

洞門穿瀑布塵世豈能通曾有遊山客來逢採  
藥翁異花尋復失幽逕躡還窮擬作經宵計風  
雷立滿空

題王侍御宅內亭子

俗間塵外境郭內宅中亭或有人家創還無蓮  
幕馨石曾湖岸見琴誤嶽樓聽來客頻頻說終  
須作畫屏

題道成上人院

花宮城郭內師住亦清涼何必天台寺幽禪瀑  
布房簾舒湘竹滑茗煮蜀芽香更看道高處君  
侯題翠梁

貧居冬杪

數塞未求通吾非學養蒙窮居歲杪雨孤坐夜  
深風年長慙昭代才微辱至公還愁把春酒雙  
淚污杯中

東山之遊未遂漸逼行期作四十字奉寄  
翁文堯員外

輶車難久駐須到別離時北闕定歸去東山空  
作期綠苔勞掃徑丹鳳欲銜詞楊柳開帆岸今  
朝淚已垂

貽張贛同年

夢思非一日攜手却淒涼詩見江南電遊經塞  
北霜驅車先五漏把菊後重陽惆悵天邊桂誰  
教歲歲香

寄邊上從事

斜日下孤城長吟出點兵羽書和客卷邊思雜  
詩情朔雪定鴻翼西風巖角聲吟餘多獨坐沙  
月對樓生

題東林寺元祐上人院

廬阜東林寺良遊恥未曾半生隨計吏一日對  
禪僧泉遠携茶看峯高結伴登迷津出門是子  
細問三乘

送陳樵下第東歸

青山烹茗石滄海寄家船難得重吟歷終難任  
意眠礎疎連寺柳風爽徹城泉送目紅蕉外來  
期已杳然

寄陳磻隱

道經前輩許名拔後時喧虛左中興榜無先北  
海樽新文漢氏史別墅謝公村須到三徵處堂  
堂謁帝闈

寄林寬

相知四十年故國與長安俱喜今辰在休論往  
歲難海鳴秋日黑山直夏風寒終始前儒道昇  
沉盡一般

退居

老歸江上村孤寂欲何言世亂時人物家貧後  
子孫青山寒帶雨古木夜啼猿惆悵西川舉戎  
柴度劔門

送友人邊遊

銜杯國門外分手見殘陽何日還南越今朝往  
北荒砂城經雨壞虜騎入秋狂親詠關山月歸

吟鬢的霜

下第出京

還失禮官求花時出雍州一生爲遠客幾處未  
曾遊故疾江南雨單衣薊北秋茫茫數年事今  
日淚俱流

遊東林寺

平生愛山水下馬虎溪時已到終嫌晚重遊預  
作期寺寒三伏雨松偃數朝枝繚譯如曾見白  
蓮開舊池

晚春關中

忍歷通莊出東風舞酒旗百花無看處三月到  
殘時遊塞聞兵起還吳值歲饑定唯荒寺裏坐  
與噪蟬期

河梁

五原人走馬昨夜到京師繡戶新夫婦河梁生  
別離隴花開不豔羌笛靜猶悲惆悵良哉輔鏘  
鏘立鳳池

送翁拾遺



還家俄赴闕別思肯淒淒山坐輶車看詩將諫  
筆題天開中國大地設四維伍拜舞吾君後青  
雲更有梯

贈懷光上人

謝城還擁入師以接人勞過午休齋慣離經吐  
論高頂寒拳素髮珠銳走紅條終憶泉山寺聽  
後看海濤

憶廬山舊遊

前年入廬嶽數宿在靈溪殘燭松堂掩孤峯月  
欲啼平生爲客老勝境失雲棲縱有重遊日煙  
霞會恐迷

別友人

莫恨東墻下頻傷命不通苦心如有感它日自  
推公雨夜扁舟發花時別酒空越山煙翠在終  
媿臥雲翁

陳侍御新居

幕客開新第詞人遍有詩山憐九仙近石買太  
湖奇樹勢想高日地形誇得時自然成避俗休

與白雲期

寄少常盧同年

官拜少常休青緡換鹿裘狂歌離樂府醉夢到  
瀛洲古器巖耕得神方客謎畱清溪莫沉釣王  
者或畋遊

唐黃先生文集卷之二

唐黃先生文集卷之三

唐監察御史閩黃滔著

七言律詩

送林寬下第東歸

爲君惆悵惜離京年少無人有屈名積雪未開  
移發日鳴蟬初急說來程楚天去路過飛鴈瀟  
岸歸塵觸鑠城又得新詩幾章別煙村竹逕海  
濤聲

商山贈隱者

誰不相逢話息機九重城裏自依依蓬萊水淺  
有人說商洛山高無客歸數隻珍禽寒月在千  
株古木熱時稀西窗昨夜鳴蛩盡知夢芝翁起  
扣扉

送二友遊湘中

千里楚江新雨晴同征肯恨迹如萍孤舟泊處  
聯詩句八月中旬宿洞庭爲客早悲煙草綠移  
家晚失嶽峯青今來無計相從去歸日汀洲乞  
畫屏

塞下

疋馬蕭蕭去不前平蕪千里見窮邊關山色死  
秋深日鼓角聲沉霜重天荒骨或啣殘鐵露驚  
風時掠暮沙旋隴頭冤氣無歸處化作陰雲飛  
杳然

下第東歸留辭刑部鄭郎中誠

去遠知已住違親欲發羸蹄進退頻萬里家山  
歸養志數年門館受恩身鶯聲歷歷秦城曉柳  
色依依灞水春明日藍田關外路連天風雨一  
行人

寄懷南北故人

秋風昨夜落芙蓉一片離心到外區南海浪高  
書墮水北州城破客降胡玉窻挑鳳佳人老綺  
陌啼鶯碧樹枯嶺上青嵐隴頭月時通魂夢出  
來無

關中言懷

事事朝朝委一罇自知無復解趨奔試期交後  
猶爲客公道開時敢說寬窮巷任來經積雨故

山歸去見荒村舉頭盡到斷腸處何必秋風江上猿

閨怨

寸心杳與馬蹄隨如蛻形容在錦帷江上月明船發後花間日暮信迴時五陵夜作酬恩計四塞秋為破虜期待到乘輅入門處淚珠流盡玉顏衰

旅懷

未喫金丹看十洲乃將身世作仇讐羈遊數地值兵亂宿在孤城聞雨秋東越雲山卻思隱西秦霜霰苦頻留它人折盡月中桂惆悵當年江上鷗

別友人

已喜相逢又怨嗟十年飄泊在京華大朝多事還停舉故國經荒未有家鳥帶夕陽投遠樹人衝臘雪往邊沙夢魂空繫瀟湘岸煙水茫茫蘆葦花

寄羅浮山道者二首

天際雙山壁海濱天漫絕頂海漫根時聞雷雨驚樵客長有龍蛇護洞門泉石暮含朱槿晝煙霞冬閑木綿溫林間學道如容我今便辭它寵辱喧

有人曾見洞中仙纔見人間便越年金鼎藥成龍入海玉函書發鶴歸天樓開石脉千尋直山折鼈鱗一半臚誰到月明朝禮處翠巖深鏤荔枝煙

喜候舍人蜀中新命三首

八都詞客漫喧然誰解飛揚詰誓間五色綵毫裁鳳詔九重天子豁龍顏巴山月在趨朝去錦水煙生入閣還謀及中興多少事莫愁明月不收關

却搜文學起吾唐暫失都城亦未妨錦里幸為丹鳳闕幕賓徵出紫微郎來時走馬隨中使到日援毫定外方若以掌言看諫獵相如從此病輝光

賈誼纔承宣室召左思唯預秘書流賦家達者

無過此翰苑今朝是獨遊立被御鑪煙氣逼吟  
經棧閣雨聲秋內人未識江淹筆竟問當時不  
早求

經安州感故鄭郎中二首

雲夢江頭見故城人間四十載垂名馬蹄踐處  
東風急雞舌銷時北闕驚嶽客出來尋古劍野  
猿相聚叫孤瑩騰身飛上鳳凰閣惆悵終乖吾  
黨情

錦帳先生作牧州干戈缺後見荒丘兼無姓賈  
兒童在空有還珠煙水流江句行人吟刻石月  
腸是處象登樓旅魂頻此歸來否千載雲山屬  
一遊

出京別崔學士

一從門館遍投文旋忝恩知驟出羣不道鶴雞  
殊羽翼許依龍虎借風雲命奇未便乘東律言  
重終期雪北軍欲逐飄蓬向歧路數宵垂淚戀  
清芬

鴈

楚岸花晴塞柳衰年年南北去來期江城日暮  
見飛處旅館月明聞過時萬里風霜休更恨滿  
川煙草且須疑洞庭雲水瀟湘雨好把寒更一  
一知

寄越從事林嵩侍御

子虛詞賦動君王誰不期君入對敷莫戀兔園  
留看雪已乘驄馬合凌霜路歸天上行方別道  
在人間久更香應念都城舊吟客十年蹤跡委  
滄浪

長安書事

一年年課數千言口祝心祠挈出門孤進難時  
誰肯薦王司通處不須論頻秋入自邊城雪昨  
日聽來嶺樹猿若有水田過十畝早應歸去狄  
江村

旅懷寄友人

重疊愁腸只自知苦於吞蘂亂於絲一船風雨  
分襟處千里煙波迴首時故國田園經戰後窮  
荒日月逼秋期鳴蟬似會悠揚意陌上聲聲怨

柳衰

放榜日從此成名後作

吾唐取士寂堪誇仙榜標名出曙霞白馬嘶風  
三十轡朱門秉燭一千家却說聯臂昇天路宜  
聖飛章奏日華其年當日奏試歲歲人人來不得曲江  
煙水杏園花

御試二首

已表隋珠各自携更從瓊殿立丹梯九華燈作  
三條燭萬乘君懸四首題靈鳳敢期鬪雪羽洞  
簫應或諷金闈明朝莫惜場場醉青桂新香有  
紫泥

六曹三省列簪裾丹詔宣來試士初不是玉皇  
疑羽客要教金榜帶天書詞臣假寐題黃絹宮  
女敲銅奏子虛御目四篇酬九百敢從燈下略  
躊躇

二月二日宴中貽同年封先輩渭

帝堯城裏日銜盃每倚嵇康到玉頰桂苑五更  
聽榜後蓬山二月看花開垂名入甲成龍去列

姓如丁作鶴來同戴大恩何處報永言交道契  
陳雷

新野道中

野堂如雪草如茵光武城邊一水濱越客歸遙  
春有雨杜鵑啼苦夜無人東堂歲去銜盃頰南  
浦期來落淚頻莫道還家不惆悵蘇秦羈旅長  
卿貧

酬俞鈞

鄉書一忝薦延恩二紀三朝泣省門雖忝立名  
經聖鑒敢期興詠疊嘉言莫論蟾月無梯接大  
底龍津有浪翻今日朝廷推草澤佇君承詔出  
雲根

寄同年崔學士仁寶

半因同醉杏花園塵忝鴻鑪與鑄顏已脫素衣  
酬素髮敢持青桂愛青山雖知珠樹懸天上終  
賴銀河接世間畢使海涯能拔宅三秦二十四  
叢衰

寄陳侍御

千年二相未全誇故劉相趙相猶闕闕城賀降

麻何必錦衣須太守別無蓮幕勝王家醴泉湧

處休論水黃菊開時獨是花九級燕金滿樽酒

御愁隨詔謁承華

酬徐正字寅

已免蹉跎負歲華敢辭霜鬢雪呈花名從兩榜

考昇第官自三台追起家疋馬有期歸輦轂故

山無計戀桑麻莫言蓬閣從容久披處終知金

在沙

辭府相時家堂帖追赴闕

從漢至唐分五州誰爲將相作諸侯閩江似鏡

正堪戀秦客如蓬難久留疋馬忍辭藩屏去小

才寧副廟堂求今朝拜別幡幢下雙淚如珠滴

不休

寄羅郎中隱

休向中興雪至冤錢塘江上看濤翻三徵不起

時賢議九轉終成道者言綠酒千盃腸已爛新

詩數首骨猶存瑤蟾若使知人事仙桂應遭蠹

御根

江行遇王侍御

數年分散秦吳隔暫泊官船浦柳中新草軍書

名更重久辭山逕業應空渡頭潮落將行客天

際風高未宿鴻此日相逢魂合斷賴君身事漸

飛沖

客舍秋晚夜懷故山

寥寥深巷客中居况值窮秋百事疎孤枕憶山

千里外破窻聞雨五更初經年荒草侵幽逕幾

樹西風鏗弊廬長繫寸心歸未得起挑殘燭獨

躊躇

絳州鄭尚書

旌旗日日展東風雲稼連山雪刃空剖竹已知

垂鳳食摘珠何必到龍宮諫垣虛位期飛步翰

苑含毫待紀公誰謂唐城諸父老今時得見蜀

文翁

喜陳先輩及第嘯

今年春已到京華天與吾曹雪怨嗟甲乙中時

公道復朝廷看處王司誇飛離海浪從燒尾嚙  
卻金丹定易牙不是駕前偏落羽錦城爭得杏  
園花

延福里居和林寬何紹餘齋寄

長說愁吟逆旅中一庭深雪一窻風眼前道路  
無心覓象外煙霞有句通幾度相留侵鼓散頻  
聞會宿着僧同高情未以干時廢屬和因知興  
不窮

贈宿松楊明府

溪上家家禮樂新始知爲政異常倫若非是水  
清無底爭得如水凜拂人月狎聲和琴調咽煙  
村景接柳條春宦遊兼得逍遙趣休憶三吳舊  
釣津

送僧

纔年七歲便從師猶說辭家學佛遲新斲松蘿  
還不任愛尋雲水擬何之孤溪雪滿維舟夜壘  
嶂猿啼過寺時烏道龍湫悉行後豈將翻譯負  
心期

贈鄭明府

庭羅衙吏眼看山真恐風流是謫仙垂柳五株  
春姪姘鳴琴一弄水潺湲援毫斷獄登殊考駐  
樂題詩得出聯莫起陶潛折腰歎才高位下始  
稱賢

江州夜宴獻陳員外

多少歡娛簇眼前潯陽江上夜開筵數枝紅蠟  
啼香淚兩面青娥折瑞蓮清管徹時斟玉醕碧  
籌回處擲金船因知往歲樓中月占得風流是  
偶然

湘中贈張逸人

羽衣零落帽欹斜不自孤峯卽海沙曾爲蜀山  
成寓跡又因湘水擬營家鳴琴坐見燕鴻沒曳  
履吟忘野逕賒更愛扁舟宿寒夜獨聽風雨過  
蘆花

寓題

紛紛墨勅除官日處處紅旗打賊時竿底得璜  
猶未用夢中吞烏擬何爲損生莫若攀丹桂免

俗無過詠紫芝兩岸蘆花一江水依前且把釣  
魚絲

題陳山人居

猶自莓苔馬跡重石嵌泉冷頰移峯空垂鳳食  
簷前竹漫拔龍形澗底松隔岸青山秋見寺半  
牀明月夜聞鐘誰能惆悵礧溪事今古悠悠不  
再逢

宿李少府園林

一壺濁酒百家詩住此園林守選期深院月涼  
留夜客古杉風細似泉時嘗頻異茗塵心淨議  
罷名山竹影移明日綠苔渾掃後石庭吟坐復  
容誰

送人明經及第東歸

十問久通離義牀今時登第信非常亦從南院  
看新榜旋束春關歸故鄉水到吳門方見海樹  
侵閩嶺漸無霜知君已塞平生願日與交親醉  
幾場

斷酒

未老先爲百病仍醉盃無計接賓朋免遭拽盞

郎君諱遠被簪花錄事憎絲管合時思索馬池  
塘晴後獨留僧何因澆得離腸爛南浦東門恨  
不勝

寄蔣先輩 在蘇州

夫差宮苑悉蒼苔携客朝遊夜未回塚上題詩  
蘇小兒許殿切江頭酌酒伍員來秋風急處煙花  
落明月中時水寺開千載三吳有高跡虎丘山  
翠益崔嵬

旅懷

雪貌潛凋雪髮生故園魂斷弟兼兄十年除夜  
在孤館萬里一身求大名空有新詩高華嶽已  
無丹慙出秦城侯門莫問曾遊處槐柳影中肝  
膽傾

南海幕和段先輩逸章侍御赴闕

樹色川光入暮秋使車西發不勝愁壁連標格  
驚分散雪課篇章互唱醜魏闕別當飛羽翼燕  
臺獨且占風流滿園歌管涼宵月此後相思幾



上樓

寄南海黃尚書

五羊城下駐行車此事如今八載餘  
燕領已知飛食肉龍門猶自退  
爲魚紅樓入夜笙歌合白社  
驚秋草木疎西望清光寄消息  
萬重煙水一封書

送人往蘇州觀其兄

闔閭城外越江頭兩地煙濤一葉舟  
到日荆枝應便茂別時珠淚不須流  
迎歡酒醒山當枕詠古詩成月在樓  
明日樽前若相問爲言今訪赤松遊

遊東林寺

長生猶自重無生言讓仙祠佛寺成  
碑折誰忘康樂制山靈表得遠公名  
松形入漢藤蘿短僧語離經耳目清  
莫恠遲遲不歸去童年已夢遶林行

贈旌德呂明府

渥注步數太阿姿爭遣王侯不奉知  
花作城池

入官處錦隨刀尺少年時兩衙斷獄兼留客  
三考論功合樹碑須信隔簾看刺史錦章朱紱已葳蕤

賀清源僕射新命

雖言嵩嶽秀崔嵬少降連枝命世才  
南史兩榮唯百揆東閩雙拜有三台  
南京袁憲兄弟同爲僕射兼帶台席之尊二天在頂家家詠丹鳳  
街書歲歲來虛說古賢龍虎盛誰攀荆樹上金臺

浙幕李端公泛建溪

越城吳國結良烟交發芙蓉幕內賓  
自顧幽沉槐省跡得陪清顯諫垣臣  
分題曉並蘭舟遠對坐宵聽月狔頻  
更愛延平津上過一雙神劍是龍鱗

貽宋評事

河陽城裏謝城中入曳長裾出佩銅  
燕國金臺無別客陶家柳下有清風  
數蹤篆隸書新得一竈屯蒙火細紅  
時說三吳欲歸處綠波洲渚紫

蒲葦

催粧

北府迎塵南郡來莫將芳意更遲回雖言天上  
光陰別且被人間更漏催煙樹迥垂連帶杏綵  
童交捧合歡杯吹簫不是神仙曲爭引秦娥下  
鳳臺

寓題

每憶家山卽涕零定須歸老舊雲扃銀河水到  
人間濁丹桂枝垂月裏馨霜雪不飛無翠竹鯨  
鯢猶在有青萍三千九萬平生事却恨南華說  
北溟

傷蔣校書德山

誰到雙溪溪岸傍與招魂鬼上蒼蒼世間無樹  
勝青桂隴上有花唯白楊秦苑火燃新賦在越  
城山秀故居荒如何萬古雕龍手獨是相如識  
漢皇

寄楊贊圖學士

學士與元昆俱以龍腦登選

東堂第一領春風時惟關西小驥慵華表柱頭

還有鶴華歆名下別無龍君恩鳳閣含毫數詩  
景珠宮列肆供今日江南駐舟處莫言歸計爲  
雲峯

麟楊學士

神仙簿上愧非夫詔作疑舟兩入爐詩裏幾曾  
吟芍藥花中方得見菖蒲陽春唱後應無曲明  
月圓來別是珠莫下蓬山不廻首東風猶待重  
搏扶

寄同年李侍郎龜正

石門南面淚浪浪自此東西失帝鄉崑璞要疑  
方卓絕大鵬須息始開張已歸天上趨雙闕忽  
喜人間捧八行莫道秋霜不滋物菊花還借後  
時黃

鐘陵故人

滕王閣下昔相逢此地今難訪所從唯愛金籠  
貯鸚鵡誰論鐵柱鏤蛟龍荆榛翠是錢神染河  
嶽期須國士鍾一筋鱸魚千古美後人終少繼  
前蹤

故山

支願默省舊林泉石徑茅堂到日前  
衰碧鳴蛩莎有露濃陰歇鹿竹無煙  
水從井底通滄海山在牕中倚遠天  
何事蒼髯不歸去燕昭臺上一年年

塞上

塞門關外日光微角怨單于馬駐飛  
衝水路從水解斷踰城人到月明歸  
燕山臘雪銷金甲秦苑秋風脆錦衣  
欲吊昭君倍惆悵漢家甥舅竟相違

烏石村

即林希劉故居

往日江村今物華一廻登覽一悲嗟  
故人歿後城頭月新烏啼來壠上花  
賣劍錢銷知絕俗聞蟬詩苦即思家  
謝公古郡青山在三尺孤墳撲海沙

寄同年盧員外

聽盡鶯聲出雍州秦吳煙月十經秋  
龍門在地從人上郎省連天須鶴遊  
休戀一臺惟妙絕已

經三字入精求當年甲乙皆華顯  
應念槐宮今雪頭

寄同年封舍人渭

時得來書

唐城接軫赴秦川憂合懽離驟十年  
龍領摘珠同泳海鳳銜輝翰別昇天  
八行真跡雖收拾四戶高局奈隔懸  
能使丘門終始雪莫教華髮獨潸然

遇羅員外袞

灞陵橋外駐征鞍此一分飛十六年  
牙角戴時垂素髮鷄香舍處隔青天  
綺園難貯林棲意班馬須持筆削權  
可忘自初相識地秋風明月客郵延

送翁員外承贊

誰言吾黨命多奇榮美如君歷數稀  
衣錦還鄉翻是客迴車謁帝帝卻為  
歸鳳旋北闕虛丹穴星復南宮逼紫  
微已分十旬無急詔天涯相送只沾衣

翁文堯員外捧金紫還鄉之命雅發篇章

將原交情遠爲嘉貺泊燕鴻陸犬楚水荆  
山又吐瓊瑤逮之幽鄙雖湧泉思觸逸興  
皆虛而強韻押難非才頗愧輒茲酬和以  
質獎私

搏將盛事更無餘還向橋邊看舊書東越獨推  
生竹箭北溟喜足貯鯢魚兩迴誰解歸華表午  
夜兼能薦子虛洎前年蒙文堯員外  
以長歲薦於時相須把頭冠  
彈盡日憐君不與故人疎

什  
奉和翁文堯員外經過七林書堂見寄之

朱旗引入昔茆堂半日從容盡日忙駟馬寶車  
行賜禮金章紫綬帶天香山從南國添煙翠龍  
起東溟認夜光定恐故園留不住竹風松韻漫  
妻銷

奉酬翁文堯員外駐南臺見寄之什

人指南臺山與川大驚喜氣異當年花迎金冊  
非時折月對瓊盃此夜圓我愛藏冰從夏結君  
憐修竹到冬鮮殷勤更抱鳴琴撫爲憶秦兒識

斷絃

翁文堯員外擁冊禮之歸一路有詩名畫  
錦集先將寄示因書五十六字

六窠只佩諸侯印爭比從天擁冊歸一軸郢人  
歌處雪兩重朱氏着來衣閩山秀已鍾君盡洛  
水波應濺我稀明日陪塵迎駟馬定淮齋沐看  
光輝

奉和翁文堯十九員外中謝日蒙恩賜金  
紫之汁

面蒙君賜自龍墀誰是還鄉一襲衣三品易懸  
鱗鬣赫八絳展起綵章飛復爲勝事垂千古題  
作新詩啟七微嚴助買臣精魄在定應羞着昔  
年歸

奉和翁文堯員外文秀尤賢畫錦三首

鄉名里號一朝新乃覺台恩重萬鈞建水閩山  
無故事長卿嚴助是前身清泉引入旁添潤嘉  
樹移來別帶春莫凭欄干剩留駐內庭虛位待  
才臣

雖言閩越繫生賢誰是還家寵自天山簡媿兼  
諸郡命鄭玄慙秉六經權鳥行去沒孤煙樹漁  
唱還從碧島川休說遲迴未能去夜來新夢禁  
中泉

君王百賜紫還鄉金紫中推是甲裳華構便將  
垂美號故山重更發清光水澄此日蘭宮鏡樹  
憶當年栢署霜珍重朱欄兼翠拱來來皆自讀  
書堂

奉酬翁文堯員外神泉之遊見寄嘉什

含雜假夢喜同遊野外嘶風並紫駟松竹迥尋  
青嶂寺姓名題向白雲樓泉源出石清消暑僧  
語離經妙破愁爭奈愛山尤戀闕古來能有幾  
人休

寄翁文堯拾遺

唐設高科表用文吾曹誰作諫垣臣  
既山秀氣曠千古鳳闕華恩鍾二人起草便論天上事如  
君不是世間身龍頭鳳尾前年夢今日須憐應  
若神洵卯年冬在宛陵夢文堯作狀頭及第又  
申四月十二夜在清源夢到殿前東道自

西厲聲唱翁某  
拜右省拾遺

唐黃先生文集卷之三

唐黃先生文集卷之四

唐監察御史閻黃滔著

五言排律

省試一一吹竿 乾符二年

齊竿今歷試真偽不難知欲使聲聲別須令箇  
箇吹後先無錯雜能否立參差次第教單進官  
商乃異宜凡音皆竄跡至藝始呈奇以此論文  
學終憑一一窺

明月照高樓

月滿長空朗樓侵碧落橫波文流藻井桂魄拂  
雕楹深鑿羅紈薄寒搜戶牖清水鋪梁燕噤霜  
覆瓦松傾卓午收全影斜懸轉半明佳人當此  
夕多少別離情

廣州試越臺懷古

南越千年事與懷一旦來歌鍾非舊俗煙月有  
層臺北望人何在東流水不回吹愆風雜瘴沾  
檻甬經梅壯氣曾難揖空名信可哀不堪登覽  
處花落與花開

襄州試白雲歸帝鄉

杳杳復霏霏應緣有所依不言天路遠終望帝  
鄉歸高嶽和霜過遙關帶月飛漸憐雙闕近寧  
恨衆山連陣觸銀河亂光連粉署徵旅人隨計  
日自笑比麻衣

省試奉詔漲曲江池

以春字爲韻乾符二年

池脉寒來淺恩波住後新引將諸派水別貯大  
都春幽咽疏通處清冷迸入辰漸平連杏岸旋  
闊映梅津沙沒迷行徑洲寬恣躍鱗願當舟楫  
便一附濟川人

題宜一僧正院

五級凌虛塔三生落髮師都僧頂有託孤嶠遂  
無期井邑焚香待君侯減俸資山衣隨疊破菜  
骨逐年羸茶取寒泉試松於遠澗移吾曹來頂  
手不合不題詩

和王舍人崔補闕題福州天王寺

郭內青山寺難論此嶺奇白雲生院落流水下  
城池石像雷霆啓江沙鼎鼐期嶽僧來坐夏秦

客會題詩岡轉泉根滑門昇鮮級危紫微今日  
句黃絹昔年碑歇鶴松伍閣鳴蛩徑出籬粉垣  
千堵束金塔九層支啼鳥笙簧韻開花錦繡姿  
清齋奔井邑玄髮剝熊羆極浦征帆小平蕪落  
日遲風篁清却暑烟草綠無時信士三公作靈  
蹤四絕推良遊如不宿明月擬何之

寄獻梓潼山侯侍郎

時常拾遺諫諍

漢宮行廟略簪笏落民間直道三湘水高情四  
皓山賜衣僧脫去奏表主批還地得松蘿塢泉  
通雨雪灣東門添故事南省缺新班有新命不起片  
石秋從露幽牕夜不關夢餘蟾隱映吟次鳥綿  
蠻可惜相如作當時事悉閒

壬癸歲書情

故園招隱客應便笑無成謁帝逢移國投文值  
用兵孤松憐鶴在疎柳惡蟬鳴馬迷歸處青  
雲失曩情江頭寒夜宿壠上歉年耕冠蓋新人  
物漁樵舊弟兄易生唯白髮難立是浮名惆悵  
灞橋路秋風誰入行

河南府試秋夕聞新鴈

湘南飛去日蘄北乍驚秋叫出隴雲夜聞為客  
子愁一聲初觸夢半白已侵頭旅館移欹枕江  
城起倚樓餘燈依古壁片月下滄洲寂聽良宵  
徹躊躇感歲流

和吳學士對春雪獻韋令公次韻

春雪下盈空翻疑臘未窮連天寧認月墮地屢  
兼風忽誤邊沙上應平火嶺中林間妨走獸雲  
際落飛鴻梁苑還吟客齊都省劄官掩扉皆堦  
北移律愧居東書幌飄全濕茶鑪入旋融奔川  
半畱滯疊樹互玲瓏出戶行瑤砌開園見粉藂  
高才輿詠處真宰答殊功

省試內出白鹿宣示百官

乾寧二年

上瑞何曾乏毛羣表色難推於五靈少宣示百  
寮觀形奪場駒潔光交月兔寒已馴瑤草別孤  
立雪花團戴多慙端士抽毫躍史官貴臣歌詠  
日皆作白麟看

出關言懷

又乞書題出關西謁列侯寄家僧許嶽釣浦雨  
移洲賣馬登長陸沾衣逐勝遊菜腸終日餒霜  
鬢度年秋詩苦無人愛言公是世仇却憐庭際  
草中有號忘憂

塞上

掘地破重城燒山搜伏兵金徽互鳴咽玉笛自  
淒清使發西都聳塵空北嶽橫長河涉有路曠  
野宿無程沙雨黃鶯囀轅門青草生馬歸秦苑  
牧人在虜雲耕落日牛羊聚秋風鼓角鳴如何  
漢天子青塚杏含情

壺公山

古老相傳古仙姓陳名壺公於此  
山成道因而名焉

八面峯巒秀孤高可偶然數人遊頂上滄海見  
東邊不信無靈洞相傳有古仙橋如珠夏在池  
象月垂穿山頭有池而圓兼  
橋樹朱實夏在髮髯嘗聞樂茗甞

半插天山寒徹三伏松偃出千年樵牧時迷所  
倉箱歲疊川嚴祠風雨管怪木薜蘿纏青草方  
中藥蒼苔石裏錢瓊津流乳竇春色駐芝田烏  
兔中時近龍蛇蟄處臚嘉名光列土秀氣產羣

賢瀑鑲瑤臺路溪昇釣浦船鼇頭擎恐沒地軸  
壓應旋蠲疾寒甘露藏珍起瑞烟畫工飛夢寐  
詩客寄林泉掘地多雲母綠霜欠木綿井通鱸  
吐脉僧隔虎棲禪山間有井通海盈縮之候貞  
元中有僧號法通咸通中有  
僧號弘播於其絕頂獨禪昏行至降虎而法通  
曾下山遇兩虎爭一牛乃叱而隔之分令各啖  
之危磴千尋拔奇花四季鮮鶴歸玄圃少鳳下  
碧梧偏桃易炎涼熟茶推醉醒煎村家蒙棗栗  
俗骨爽猿蟬谷語昇喬鳥陂開共帶蓮落楓丹  
葉舞新蕨紫芽拳翠竹雕羌笛懸藤煮蜀牋白  
雲長掩映流水別潺湲作賦前儒闕冲虛南國  
先省郎求牧看野老茸齋眠潘郎中存寔詩云  
雙旌牧清源吟看  
之爲畫屏云壺公之高洛陽之深夢魂所思  
寺歷興衰創碑湏一二鐫清吟思却隱簪紱奈  
繫牽

七言排律

投翰長趙侍郎

禹門西面逐飄蓬忽喜仙都得入蹤賈氏許頻  
趨季虎荀家因敢謁頭龍手扶日月重輪起數



是乾坤正氣鍾五色筆驅神出沒八花博接帝  
從容詩酬御製風騷古論自人情鼎鼐濃豈有  
地能先鳳掖別無山更勝鼇峯攀鴻日淺魂飛  
越爲鯉年深勢唵鳴澤國雨荒三逕草秦關雪  
折一枝筇吹成暖景猶葭律引上織蘿在嶽松  
願向明朝薦幽滯免教號泣觸登庸

廊時李相公

秦城擇日發征轅齊戒來投節制尊分虎名高  
初命相攀龍迹下愧登門夜聽謳詠銷塵夢曉  
拜旌幢戰旅魂華舍天開寧有礙綵毫雖乏敢  
無言生兼文武爲人傑出應乾坤靜帝闈計吐  
六奇誰敢敵學窮三略不須論功高馬卸黃金  
甲臺迴賓惟白玉鐔九穗嘉禾垂綺陌四時甘  
雨帶雕軒推恩每覺東溟淺吹律能令北陸暄  
青草連沙無血濺黃榆鑣塞有鸞籟笙歌合沓  
春風郭雞犬連延碧岫村遊子不緣貪獻賦永  
依棠樹託蓬根

成名後呈同年

業詩攻賦薦鄉書二紀如鴻歷九衢待得至公  
搜草澤如從平陸到蓬壺雖慙錦鯉成穿額忝  
獲驪龍不寐珠蒙楚數疑休下泣師劉大喝已  
爲盧人間灰管供紅杏天上煙花應白榆一字  
連鑣巡甲族千般唱罰賞皇都名推顏柳題金  
塔飲自燕秦索玉姝退規單寒終預此敢將恩  
獄息斯須

投刑部裴郎中

兩榜驅牽別海涔它門不合覓知音瞻恩雖隔  
雲雷賜向主終知犬馬心禮闈後人窺作鏡廟  
堂前席待爲霖已齊日月懸千古肯誤風塵使  
陸沉拜首敢將誠吐血蛇形唯待諾如金愁聞  
南院看期到恐被東墻舊恨侵緇化衣空難抵  
雪黑銷頭盡不勝簪數行淚裏依投志直此滄  
溟未是深

五言絕句

輦下寓題

對酒何曾醉尋僧未覺閒無人不惆悵終日見

南山

寄題崔校書郊舍

一片寒塘水尋常立鷺鷥主人貧愛客沽酒往

吟詩

秋思

碧嶂猿啼夜新秋雨霽天誰人愛明月露坐洞

庭船

芳草

澤國多芳草年年長自春應從屈平後更苦不

歸人

輦下書事

北闕新王業東城入羽書秋風滿林起誰道有

鱸魚

七言絕句

入關言懷

背將蹤跡向京師出在先春入後時落日灞橋

飛雪裏已聞南院有看期

過長江

曾搜景象恐通神地下還應有主人若把長江  
比湘浦離騷不合自靈均

題靈峯僧院

繫馬松間不忍歸數巡香茗一枰棋擬登絕頂

畱人宿猶待滄溟月滿時

司馬長卿

一自梁園失意回無人知有換天才漢宮不鎖

陳皇后誰肯量金買賦來

和同年趙先輩觀文

玉兔輪中方是樹金鼇頂上別無山雖然迴首

見煙水事主酬恩難使閒

出京別同年

一枝仙桂已攀援歸去煙濤浦口村雖恨別離

還有意槐花黃日出青門

歸思

薊北風煙空漢月湘南雲水半蠻邊寒爲旅屬

暖還去秦越離家可十年

東林寺貫休上人篆隸題詩

師名自越徹秦中秦越難尋師所從墨跡兩般  
詩一首香爐峯下似相逢

寓江州李使君

使君曾被蟬聲苦每見詞文卽爲愁况是楚江  
鴻到後可堪西望發孤舟

遊南寓題

江山節被雪霜遺毒草過秋未擬衰天不當時  
命鄒行亦將寒律入南吹

九日

陽數重時陰數殘露濃風硬欲成寒莫言黃菊  
花開晚獨占樽前一日歡

夏州道中

隴鴈南飛河水流秦城千里忍回頭征行渾與  
求名背九月中旬往夏州

經慈州感謝郎中

金聲乃是古詩流况有池塘春草儔莫遺宣城  
獨垂號雲山彼此謝公遊

寓題

吳中煙水越中山莫把漁樵漫自寬歸泛扁舟  
可容易五湖高士是拋官

寄宋明府

北闕秋期南國身重關煙月五溪雲風蟬已有  
數聲急賴在陶家柳下聞

花

莫道顏色如渥丹莫道馨香過蒹蘭東風吹綻  
還吹落明日誰爲今日看

閏八月

無人不愛今年閏月看中秋兩度圓唯恐雨師  
風伯意至時還奪上樓天

別後

夢裏相逢無後期煙中解珮杳何之虧蟾便是  
陳宮鏡莫吐清光照別離

嚴陵釣臺

終向煙霞作野夫一竿竹不換簪裾直鈎猶逐  
熊羆起獨是先生真釣魚

馬嵬三首

鐵馬嘶風一渡河淚珠零便作驚波鳴泉亦感  
上皇意流下隴頭嗚咽多

龍腦移香鳳輦畱可能千古永悠悠夜臺若使  
香魂在應作烟花出隴頭

錦江晴碧劔鋒奇合有千年降聖時天意從來  
知幸蜀不關胎禍自蛾眉

奉和文堯對庭前千葉石榴

一朵千英綻曉枝綵霞堪與別爲期移根若在  
芙蓉苑豈向當年有醒時

翁文堯以美疹暫滯令公大王益得異禮

觀今日寵待之盛輒成一章

滋賦誠文侯李盛終求一襲錦衣難如何兩度  
還州里兼借鄉人更剩觀林鄭在舉場日時曰  
滋賦誠文中外相獎

木芙蓉三首

黃鳥啼煙二月朝若教開卽牡丹饒天嫌青帝

恩光盛畱與秋風雪寂寥

卻假青腰女剪成綠羅囊綻綵霞呈誰憐不及  
黃花菊只遇陶潛便得名

須到露寒方有態爲經霜衰稍無香移根若在  
秦宮裏多少佳人泣曉妝

奉和翁文堯戲寄

握蘭宮裏數名郎好是乘輶出帝鄉兩度還家  
還未有別論光彩向冠裳

和陳先輩陪陸舍人春日遊曲江

劉超遊召邨詵陪爲憶池亭舊賞來紅杏花旁  
見山色詩成因觸鼓聲回

靈均

莫問靈均昔日遊江籬春盡岸楓秋至今此事  
何人雪月照楚山湘水流

卷簾

綠鬟侍女手纖纖新捧嫦娥出素蟾衛玠官高  
難久立莫辭雙卷水精簾

啓帳

得人憎是繡芙蓉愛鎖嫦娥出月蹤侍女莫嫌  
擡素手撥開珠翠待相逢

去扇

城上風生蠟炬寒錦帷開處露翔鸞已知秦女  
昇仙態休把圓輕隔牡丹

唐黃先生文集卷之五

唐監察御史閻黃洎著

碑記銘

泉州開元寺佛殿碑記

混沌死而天地生道德銷而仁義作情軍業網  
始脉旋波天謂洛龜河龍文有生而不文無生  
乃產金聖人於西國鑽智慧火乾煩惱海理不  
吾吾而一貫生生其姿電燿於周室其波派漾  
於漢代繇是館移鴻臚城崇白馬斯有寺之始  
也寺制殿象王者之居尊其法也其後金地蓮  
肩周旋四海烏飛兔走或故或新至如神運之  
靈莫靈矣亦靡得而歸然則我州開元寺佛殿  
之與經樓鐘樓一夕飛爐斯革故鼎新之數也  
初僕射太原公以子房之帷幄布泉城以叔度  
之袴襦續泉民而謂竺乾之道與尼瞞鼎宜根  
乎信而友乎理矧開元句字五十載之聖容實  
寺之冠洎帥閩也愈進其誠繕經三千卷皆極  
越藤之精書工之妙駕以白馬十乘送以府僧

唐黃先生文集卷之四

迎以郡僧置茲之樓旣而蜀雨不飛識者以爲物之尤罕留於世敬之至必動乎神是必爲地祇所搜龍宮之索不然者曷與斯故新之數期厥理則明我宜悄然不已仲弟檢校工部尚書爲茲郡之秋也武則拍孫吳之背文則席夏商於前而復龍虎之內以填以虢大舜孟龍之旨乃割俸三千緡鳩工度木煙巖雲谷之杞梓榱桷投刃以時趨功以隲食以月粟付以心倅不暮年而寶殿湧出棟隆舊綺梁修新虹八表四隅悉半乎丈柱盛鏡礎方珪叢斗楣承蟠螭飛雲翼拱文椽刻楠鞞鶴杈杓或經緯以開織或丹雘而纈耀晶若蟾窟業如鰲背風夏觸而秋生僧朝梵而谷應昇者骨水觀者目波而五間兩厦昔之制也自東迦葉佛釋迦牟尼佛左右真容次彌勒佛彌陀佛阿難迦葉菩薩衛神雖法程之有常而相貌之欲動東北隅則揭鍾樓其鍾也新鑄仍偉舊規西北隅則揭經樓雙立嶽峯兩危屨雲東瞰全城西吞半郭霜韻扣而

江山四裏金字駢而講誦千來是知天地日月鬼神不欲一存其物將有待於後人也設使斯殿也斯樓也不有之故其何以新我公之作之爲其何以布之哉三略六韜流通貝多戈霜劍雪爲甘露潔信英智之所措也旣畢召化內之緇錫數邁于千齋而落之累中慈雲五色慧日重輪譚者以爲梵天之宇化於是矣靈山之會儼於是矣我公之倅試大理評事宋君曰駢才推博古識洞真如請立貞珉垂於不朽公以小儒不佞俾刻斯文僧正臨壇大德僧宣一桑門之關捷者曰寺有記亡之矣垂拱二年郡儒黃守恭宅桑樹吐白蓮花捨爲蓮花道場後二年昇爲興教寺復爲龍興寺逮玄宗之流聖儀也卜勝無以甲茲遂爲開元寺焉嘗有紫雲覆寺至地至今凡草不生其庭大矣哉自垂拱之迄開元四朝而四易號及句諒兆水於木垂雲雉草謂泉蓮之與雲草天啓地靈之如是則開元實寺之冠斯又冠開元焉金聖人無爲也堯舜亦無爲

也誠參錯其道巍巍聖儀永與諸佛如來俱豈不其然愚是以奮筆於一公之說乾寧四年丁巳冬十一月日記

大唐福州報恩定光多寶塔碑記

金聖人之教功與德魯聖人之教忠與孝以忠孝之祈功德莫之大也天復元年辛酉天子西巡岐汴交兵京洛顛顛我威武軍節度使相府鄆琊王王公祝天地鬼神以至忠之誠發大誓願于開元之寺造塔建號壽山仍輔以經藏乞車駕之還宮也其三年甲子以大孝之誠發大誓願于茲九仙山造塔建號定光仍輔以經藏為先君司空先秦國太夫人元昆故司空薦祉于幽陰也大矣哉赫赫忠誠懇懇孝思以國以家以明以幽胡天地之不動歟胡鬼神之不感歟釋之西天謂之窅堵波中華謂之塔塔制以層增其敬也造之獲無量無邊功德初我公以宏才妙略之有潘維以仁智神鑒之謀遠大謂閩越之江山奇秀土風深厚而府城坐龍之腹

烏石九仙二山聳龍之角屹屹巖巖屏屏顏顏兩排地面雙立空際恠石如墉迴崗若揖東衝滄海以鏡豁西走建溪而帶縈氣色蒙茸風雲蓬勃非仙宮佛寺不可以乘龍之角大龍之腹何烏石二而九仙曠烏石山有神光天王二寺豈非代虛其

作地祕其期以待我公况古仙鍊骨之所昇真之跡耶一旦之新城月圓壬戌歲我公卜築二其外城號月城

山之嘉氣雲連森上介掀大旆或旬或朔眷于粉堞之上時行時止卜於煙巒之掘得峻中之

平平中之峻凸而不隆凹而不卑樹翳奮以奇委草芊蕞而別翠遂從弘願啓茲塔之基焉塔

之科也恐山之偏憂地之入將塹平壤五十尺之深百有餘尺之闊杵土積石而上上上逮二十

尺瞥然虹見瑩然穴貯俄以珠寶之獲坐以金錢大不及拳光能奪目于時清風四來海天擴

開煙霞蔚蔚於城隅鸞鶴盤旋於林表舉閩之軍傾閩之俗以趨以走以歌以詠既而畚鍤投

般倕奮內斃以塼凡四十萬口外構以木蓋百

其巧七層八面玲瓏窳篠榭欄楯轆轤杖杪雲楣翼環珪斗鱗感彫鏤丹牖曲盡其妙方七十有七尺高二百尺相輪之四十尺叅之也懸輪之鐸一百九十懸層之鐸五十有六角瓦之神五十有六其內也則門門面面續以金像不可勝紀登之者若身在梵天瞻之者覺神離瞻部業業然觸圓青而直上野鶴經之而高翔疑掠其腹鱗鱗然墜峭碧而崛起地祇感之而下捧疑彈其力其相輪也我公誓願之日仲氏司徒自清源聞而感鑄而資雖從人力悉類神功謹按妙法蓮花品自地湧塔千佛之前其幢幡瓔珞瑪瑙車渠七盤四懸乘虛耀日乃多寶之佛發大誓願之感現也繇是以斯塔取如來之嘉號號之曰定光以其感殊之現眸於自地之湧故聯之於多寶本於孝思薦劬故冠之以報恩此其義也夫如是大雄之力出死入生至誠之神感天動地若乃沉沉夜壑浩浩世塵莫不以茲玄符承彼慧日超於三千大千之世遊乎

二十八天者哉苟不之然則凡彼經文悉爲之虛語耳又焉能垂信於百千年之後哉既而巍巍峩峩金輝鐵牢其東則翼以經藏焉其藏也外構以扇八角兩層刻梅檀鏤金銅飾朱漆之炳煥仍衛以華堂七間名之轉經焉致其沙門比丘比比厥跡以爲拜唱跌讀叢談聚聽之湊日繫乎月月繫乎時軒軒闐闐奚景福之不幽資乎又感應天王殿一間兩厦其天王也變毗沙之身於感通之年現神質爲龜城之助條腰衣褐屣足乘雲雙吐目光兩飛霞彩乃千百億化身之一爲壽山草木之應今望于此厥感寧亡其西則翼之別殿曰塔殿其塔也我公萌誓願之先因心以制十有三層之妙形匪偉而誠有爲去聲殿斯奇而塔斯處其比則報恩變相堂九間紫瑠璃之地等娑婆之世七寶叢樹五色騰光明明見闍提之心一一標如來之說又僧堂五間上五間下之與茶堂五間直聯曲交冬温夏涼又華鍾之樓迥起青音下折刀山長明



燈之臺圓籠孤光香輝漆壤其東南之一臂復  
建地藏殿一間兩厦功德堂五間僧堂五間張  
如別構而制匪異其殿也坐以菩薩之麗若欲  
飛動其堂也駢錯儀像或金範或幅繡千形百  
質恐悉諸天之聖侶粵間去聲焉公廳四間一厦  
或備旌鉞之觀止我公或四季之旦三旬之八  
聚僧設會拜首追祝勤恪恪罔所不至舉閩  
之高卑舉閩之少耄攀之望之無不動心涕臆  
君子謂豈唯冥薦于先蓋以孝敬民也又庫厨  
五間浴室三間接之井井重以樓焉環周輻輳  
之行廊凡三十有三間惣費財六萬餘貫如山  
之疊如洞之濇噴噴隆隆叢爲一宮其大也琢  
文石以爲軒彫修虹以爲梁其小也取良木於  
靈山篩嘉壤於飛塵雖掩映乎人間實參差乎  
象外其經也帙十卷於一函凡五百四十有一  
函惣五千四十有八卷皆極刻藤之精書工之  
妙金軸錦帶以爲之飾天祐二年乙丑夏四月  
朔我公宿誠于州東烹于肆及脇降之辰大陳

法會以藏平聲其經緇徒累千士庶越萬若緇若  
士一而行之正身翔手右捧左授自州之祀起  
於我公傳至于藏觀者如堵墻佛聲入霄漢懽  
花照乎全郭香煙連乎半空雪頂之僧指西土  
之未有駘背之叟慶東閩之天降可謂之鴻因  
妙果者也始者我公之登壇也其一之年偃干  
戈興禮樂二之年陳耒耜均賦與三之年疊貢  
輸祇寵澤萬乘臣其職四隣視其睦百姓天其  
政故一川之鏡如靈臺之月如融融怡怡愉愉  
熙熙乃大譏儒釋之書研古今之理常曰文武  
之與釋氏蓋同波而異流若儒之五常仁義禮  
智信仁者含弘也比釋之慈悲爲之近禮者謙  
讓也比釋之恭敬爲之近智者通識也比釋之  
聖覺爲之近信者直誠也比釋之正直爲之近  
而義者殺也其爲異諸武之七德至如戢兵保  
土安民和衆之類亦猶川陸之徂秦適洛焉然  
則皆謂之煩惱吾父國也子民也朝爲社稷之  
計暮作稼穡之念若俾求智慧火乾煩惱海則

非吾之所能若建金地繕金文陳法會一衆僧  
冀乎不可思議乃吾之所志也於是月陳三齋  
時或雪峯之僧圍繞千徒臥龍之僧圍繞五百  
以至萬錢之繕或間嘉蔬五袴之歌或叅雲梵  
慈航駕岸法雨垂空必致菩薩化身羅漢混俗  
以降也時人謂靈山之會日儼矣又以府之寺  
至于清源或存或燼或抽金積俸增而新之而  
府之開元大中神光曩塔之數與寺俱焉新于  
大中神光乃規舊制而精燿宏壯則邁前時開  
元則輔之經藏加之轉輸之盛尊大君也定光  
多寶報恩於劬勞故以塼塼者專也謂山度之  
材有蠹朽之日火化之壤無銷鑠之期其本乎  
土也資乎火也及投諸水火則不歸乎土不壞  
於水歷千秋而其質堅然乃以專至堅貞之誠  
寓于是則斯誠也如是得無感乎則彼珠之爲  
符驗矣且夫珠也或領乎龍或銜乎蛇或胎乎  
蚌故水懷而川媚今茲珠也不自乎龍不自乎  
蛇不自乎蚌匪懷水而媚川而孕厚地之二十

尺豈非斯之感歟不然則始從融結而孕之也  
若以始從融結而孕之則厥初已兆我唐之有  
我公也厥初已兆我唐之有我公則我公之言  
烏石之有神光天王九仙代虛其作地秘其期  
以待我信矣塔之訖功顧小從事洎有禮官甲  
科之忝明王研許之幸庶幾於聖人立身揚名  
之道命爲之記用旌厥德於無窮洎不敢牢讓  
作禮而推之言夫陶天地爲後時鎖生死於無  
朕其道不可以真虛求聲影曠應誓願於有爲  
現感通於至誠其道乃可以精諦至嚴敬致今  
我公以精諦嚴敬積功累德以泝流于世斯塔  
也嶽嶽崇崇兼乎仁孝之鴻名借天地日月江  
山之永遂刻于貞石焉其詞曰

金聖人教德與功兮魯聖人教孝與忠兮巍巍  
賢傑二美鍾今建茲寶塔惟追崇兮祝天瀝懇  
先延鴻兮報劬薦祉祈幽通兮仙山之秀夷且  
隆今曠古爲期俟仁風兮月圓珠現契遭逢兮  
融結之初兆英雄兮豈徒巉巉懿懿工兮火壤

之貞積磨礱兮芥材之取厥匪同兮七層八面  
相玲瓏兮金鈴寶鐸交丁冬兮影落澄清馴魚  
龍兮頂觸圓碧分鴻濛兮續儀軌像疊其中兮  
齊天極地為初終兮金文貝字構重重兮講讀  
千來聲西東兮靈山盛會日雍雍兮甘露法雨  
常蒙龍兮鴻名冥祉借無窮兮

靈山塑北方毗沙門天王碑

列藩之業有地有地之職有民有民之道典禮  
樂悼忠孝以行事興禮樂悼忠孝以行事然後  
謀謀者也築城池居其一城既築進道德以居  
之樹神祇以尸之為一方之巨防雖永古而無  
疑我相府瑯琊王王公之有閩越也具列藩之  
業修有地之職行有民之道自乾寧四年丁巳  
至天祐二年壬戌凡六年禮樂興忠孝敦乃謀  
及城池城池及謀乃尸及神祇於是於開元寺  
之靈山塑北方毗沙門天王一鋪全部落已鎮  
干城焉大矣哉所謂闡六韜濬七德建陽功配  
陰騰夫毗沙門梵音唐言多聞也始自于闐利

利之英奇膺世尊帝釋之錫號居須彌山北住  
水晶宮殿領藥義衆為帝釋外臣以護南贍部  
洲其道入大乘得無生法忍住聲聞證不還果  
謹稽我公之築城也恆守地養民之本隆暫勞  
永逸之策其名舉一而生三法陽數也曰大城  
焉南月城焉北月城焉周圍二十六里四千八  
百丈基鑿于地十有五尺杵土胎石而上上聲  
高二十尺厚十有七尺外甃以磚凡一千五百  
萬片上架以屋其屋曰廊其大城之廊也一千  
八百有十間自廊凸而出之為敵樓樓之層者  
二十有三又角立之樓六其二者層復層焉皆  
欄干鈎聯參差煥赫而廊之若干步一鋪又各  
以鼓而司更焉凡三十有六謂之更鋪其四面  
之門八其南曰福安門福安之東曰清平門西  
曰清遠門其北曰安善門安善之東曰通遠門  
其東曰通津門通津之北曰濟川門其西曰善  
化門皆鐵扇銅扇開陽闔陰門之上仍揭以樓  
三間兩挾兩翕修廊雙面遠碧門之左右又引

而出之爲之亭兩間一厦又匪樓之門九曰暗

門焉又水門三其二樹櫺節波卸帆入舟鳴絃

柳浦迴環一郭堤諸萬戶注之以堰二渡之以

橋九鏡瑩虹橫交舫走蹄斯大城之制也粵南

月城也東貯九仙西盛烏石之二山嘉樹蓄雲

茂草藏獸城上之廊一千十有三間其中七間謂之徘徊

敵樓四十有九樓之層者三其門二曰登庸門

郭璞記南臺江沙合卽有宰相而我公膺期今登庸門外橋名沙合橋道清門其

上之樓其下之扉左右之引亭建暗門八水門

二其堰一其橋五及廊之更鋪二十悉與大城

類其外之東西復距而出之謂之橫城其東也

城上之廊四十二間五厦其中兩間是兩面之敵樓其門一

斯南月城之制也伊北月城也城上之廊六百

四十二間敵樓二十有六樓之層者十其門二

曰道泰門嚴勝門其上之樓其下之扉左右之

引亭建暗門四水門二其橋一及廊之更鋪十

有四復與南月城類又甯而出之謂之橫城城

上之廊五間一厦其門一斯北月城之制也其

東畫長川以爲洫西連乎南句盤別浦以爲溝

悉通海鱸朝夕盈縮之波底澤鱗介岸泊蝶鱗

北截越王之故山派西湖以爲隍若鰲之負如

甌之置軒軒然翼翼然真謂天設之府神開之

地也既而我公一旦膝分席枝鱗軍堵臺陳大

會以落之而言曰惟閩越之爲藩屏也建汀二

疆束其右巖千而壑萬溟海巨流瀕其左濤雷

而浪霆信乎江山奇險無以加之矧今新之以

城壁城壁之以鐵石古人言得地又言守地又

言堅壁豈不以得地而居守地以城城以堅壁

信不疑矣然則吾之戴恩忝土勤勤懇懇不以

江山奇險之爲奇險不以城壁鐵石之爲鐵石

也修道德樹神祇以居之毗沙門之天王自天

寶中使于闐者得其真還愈增宇內之敬旋大

夫芮國公荆渚之壘也凡百城池莫不一之斯

舊城之北往規也舊天王在子城北也斯新城之制今城

也且勝莫勝於開元寺尚莫尚於寺之靈山阜

寺之良控城之乙祖僧六葉鴈其下珉石一拳

星其上廬山灣落星劔池徹寫飛山奔揖足以  
象水精而瑩宮殿掀廟貌以衛城池爰將擇工  
之精搜塑之妙製乎聖質俄然化出身被金甲  
手擎鴈塔地祗下捧天將前擁光灼灼而如將  
動搖神英雄而若欲叱咤觀之者皆謂須彌拔  
宅於是矣于闐分身於是矣而復翼僧堂而右  
遼膊鐘樓而左突毳錫百萃其夏午蒲鯨六吼  
其宵加信爲塵間之北方連營之靈域也訖命  
小從事洎刊貞石而碑之洎不敢牢讓齋戒三  
日抽毫而書猗歟天王因果則釋氏英勇則兵  
權啟願而願從云戰而戰勝至如揮額汗以爲  
童子却修羅之師擎手塔以貯彌陀解天鼓之  
赴爰皆肝鬲克致感通洎唐有土藩之黷也豆  
面以行疹儀金以現人嚙戈以生鼠與彼時之  
玄應蓋大同而小異况邇則咸通季蠻之侵蜀  
蜀人亟祈禱丞倏以乘空目光燿以照地蛇將  
奔穴龜竟全城如是則護南贍部洲豈虛言哉  
今我公之至誠通日月弘願質鬼神以曠世之

功業託無生之法力豈昔時之有是而今日之  
不然哉雖體蒼蒼而無言固乃昭昭而有鑒輒  
爲之銘其詞曰

受命帝釋封邑須彌金甲儼被藥叉雄隨越七  
金山突修羅師人大乘妙與聲聞差于闐分身  
皇唐衛國若加善禱咸蒙聖力塞鴈煙塵龜城  
戈戟虜騎猶東蠻車未北現以真儀亡乎悖德  
懿彼閩越大哉侯王仗鉞務本築城爲防石取  
它山壤塹聯崗疊百厥雉累千平廊却鐵之觸  
疲羽之祥奔馬轡並馳車軌方巢鳳於樓螯龍  
於隍如嶽斯立如翼斯張不有依憑曷旌扁鑄  
台略俄啓神驅遽設鐵鬚卓堅漆瞳曝眈捧足  
神俯持劒將列月殿巍我靈山截辟法遠無生  
權唯有兵昔之若是今肯忘情閩山永高閩江  
永清厥宜識之盤石斯城

丈六金身碑

釋氏之稱釋迦牟尼佛千百億化身而古今之  
世以諸佛菩薩其或鑄成塑成刻成其或壁繪

幅繪乎像不可勝紀况多應現感通之自其非  
之乎我公粵天祐三年丙寅秋七月乙丑鑄金  
銅像一句丈有六尺之高後二十有三日丁亥  
繼之鑄菩薩二句丈有三尺高銅爲內肌金爲  
外膚取法西天鑄成東越巍巍落落毫光法相  
初我公登壇之三年己未秋一夕雨歇天清風  
微月明瑤兔無煙銅龍有聲俄夢天之西際燿  
以照物絲雲鑄裂大佛中座嶽嶽以觀止熙熙  
而啟言曰斷予一臂衛之一方既覺而思現乎  
形昭像也斷一臂誓誠也衛一方保衆也始嘉  
其異姑默其事後創其意乃命自賓席之逮將  
校將校之逮步乘步乘之逮衆庶其有植信根  
之深者映惠燭之明者許一以金投吾俸中將  
積于肆俟以銅易而後鳩工鴻鑪卜境擇日鑄  
斯佛于九仙山定光多寶塔之右古仙徐登上  
昇之地其日圓空鏡然江山四爽燾燾之上聲  
騰爲煙雲盤旋氤氳五色成文又有羣鳥或若  
鴻鵠或如鸞鵲交翔而間鳴自寅而及午斯佛

也一瀉而成翌日我公禮閱之乃與夢中一類  
其形儀長短大小無少差其一臂工以之別鑄  
而會其像大工慮其不就計以一我公神之而  
臂別鑄而會之乃昭符夢中露其夢於是迎入府之別亭磨瑩雕飾克盡其  
妙朝夕瞻拜時不之怠冬十有二月丙申會僧  
千十以幡以幢以鍾以磬引歸于開元寺壽山  
之塔院獨殿以居之翼二菩薩于左右三十二  
相足八十種好具螺鬘以成髻珠隱隱以炫  
額檀信及門而膝地童耆遍城而掌膠夫如是  
豈非千百億化身之一乎不然者焉得入乎夢  
而如乎神成乎形而如乎夢夢不之告工以之  
缺者哉其應現感通復爲之殊矣大矣哉且先  
天地生之謂道後天地設之謂象道者也以無  
爲爲志之也授心印於虛空象者也以有爲爲  
志之者疊慧力於報應論者感句以之爲風馬  
會不謂象猶道之較也無象道不行矣始者摩  
騰竺法蘭二梵僧不慎其像東其道且西耳惜  
乎不與三皇五帝同世而出設與三皇五帝同

世而出必能從容朴素遲回仁義詐偽未之亟  
 竄也柰何天將後之豈徒然哉豈不以仁義之  
 生也曰堯與舜仁義之亡也曰癸與受至于列  
 國之際強秦之立癸受之悖疊疊其躅天謂仲  
 尼之祖述堯舜憲章文武終不能獨制之故東  
 釋迦牟尼於中土大陳出生入死之理天堂地  
 法之事以警戒之雖人世之風波萬態逆飈而  
 幽府之鐵線一無苟免上智聞之若鏡之磨中  
 智聞之若泉之澄下智聞之若火之燒謂之爲  
 有則河沙芥子之說虛誕難測謂之爲無則應  
 現感通之事尋常立驗故能銷嗜慾更禍福一  
 貴賤則爲禪教化之一源湛然不動感而遂通  
 者也而以金厭地蓮厭宮張法橋以度人無刑  
 網以束俗世之敬之可也怠之可也黷之可也  
 繇是有委之國君委之大臣之旨旣而委之則  
 人非常人道非常道我公曠代之生也有神僧  
 識伏鉢之雄也應江沙期合仙人識築城之盛  
 也契菩薩說初丙午歲我公至清源未有時有僧號涅槃於衆中駭而指之曰金

輪王之第三子降人間幸勉之專生殺柄又閩  
 之侯未嘗至宰輔晉時郭璞記曰南臺江沙冷  
 卽有宰輔相我公之登台席也江沙臺馬又梁  
 時王霸怡山上昇山在府城之西五里光啟丁  
 未歲衛之爛柯山道士徐景立因於其仙壇東  
 北隅取土掘得瓷瓶七口各可容一升水其中  
 悉有炭上揔蓋一青磚刻文字云樹枯不用伐  
 壇壞不須結未滿一千歲自有孫列後來是  
 三皇潮水蕩福殃巖逢一年間未免有銷亡子  
 孫依吾道代代封閩疆其壇東南有皂莢樹古  
 云真君於此樹上山昇其後枯矣至咸通庚寅  
 歲復榮茂也又媽山僧號大安頓坐西禪者乾  
 符中曰府城之到九仙三橋其夫神通爲佛魂  
 中乃菩薩行化今之新城及馬交曰夢神非夢而罕通夢非神而不感我公之  
 慶鍾也其如是矣其明年正月十有八日乙未  
 設二十萬人齋號無遮以落之是日也綵雲纈  
 天甘露粒松香花之氣撲地經梵之聲入空座  
 客有右省常侍隴西李公洵翰林承旨制誥兵  
 部侍郎昌黎韓公偓中書舍人瑯琊王公滌右  
 補闕博陵崔徵君道融大司農瑯琊王公標吏  
 部郎中譙國夏侯公淑司勳員外郎王公拯刑  
 部員外郎弘農楊公承休弘文館直學士弘農  
 楊公贇圖弘文館直學士瑯琊王公倜集賢殿  
 校理吳郡歸公傳懿皆以文學之奧比偃商侍

從之聲齊襄向甲乙昇第巖廊韞望東浮荆襄  
南遊吳楚謂安莫安於閩越誠莫誠於我公依  
劉表起襄漢其地也交轍及館值斯佛之成斯  
會之設俱得放心後於菩提樹上歇意馬於清  
涼山中我公乃顧幕下者滔俾刻貞石以碑之  
滔以甲科忝第盛府蒙招刊勒之職不敢牢讓  
謹推於厥旨經云作佛像之功德斗量海以有  
盡塵碎劫以無窮至若青黛之畫辟支一金之  
補毗婆戲爲之而以草木思見之而刻栴檀其  
猶蛻現其生羽金其報而况今乃儼至誠從靈  
感銅乎萬萬金乎千千虔鼓鑄於神仙之山卜  
貞吉於火土之數其積功累德豈可以邊以涯  
而言之哉或曰梁武帝之隆釋氏今古靡倫奚  
報應之昧乎對曰梁武帝隆釋氏之教不隆釋  
氏之旨所以然也夫帝王之道理世也釋氏之  
教化人也理世之與化人蓋殊路而同歸彼宵  
旰于萬有故一夫不獲若已隕諸隍中此濟度  
于觸類故欲凡一有情悉皆成佛梁武帝則不

然以民之財之力剝將三百祈功覬德則歸諸  
已帝億兆而不乳削頂領以言覺所以私所以  
然也今我公爲邦則忠孝於君親自與兵之來  
之泉皆名直進獨我公以俸錢爲直進牧人則  
三司之運悉如舊焉闕庭大稱其美父母于生民造塔四其一曰壽山以昭皇帝辛  
酉歲西巡發誓願以祝熊羆乞車駕之復宮闕  
其二曰報恩多寶定光追薦于先世其三其四  
大中神光爲軍旅也爲人民也繕經五藏其二  
進于上其三附于壽山定光大王意同乎塔月  
三其齋或千僧或千佛疏乎誠首則君親次則  
軍旅人民而已後焉况斯佛已之而不已與賓  
席將校步乘衆庶共成之故其地出明珠海出  
珊瑚幾於蓮花妙品之繁車渠瑪瑙幢璫瓔珞  
周乎多寶之湧也開元定塔基掘地丈有五尺  
海中得珊瑚樹夫其玄覘之如彼靈感之若此  
凡二百餘株矣則斷一臂衛一方斯昭昭矣豈與彼而論哉滔  
是輒奮筆而無愧爲其詞曰  
託入佳夢鑄成鴻鑪毫光法相銅肌金膚恍惚



現形昭彰合符不有爲也其如是乎唐一其宇  
越百其區伊閩之設于地之殊西城甌仞東塹  
鰲隅匪德莫處惟仁靡逾懿其臺簷飛作醍醐  
焦山草木不得不蘇苦海波瀾不得不枯仙花  
罔謝慧日寧徂永茲一方盤石其都

莆山靈巖寺碑銘

釋波東流湧爲花宮花宮之構咸宅靈秀靈秀  
之啓其或神授則知融結之始已有待於金聖  
人也粵靈巖寺乃莆山之靈秀焉神授焉懿夫  
嶽立大山堆下數峯回乙臂坤石嵌松瘦昔梁  
陳間邑儒榮陽鄭生家之生嚴乎一堂架以詩  
書旣而秋一夕風月清朗俄有神人鶴髮麻衣  
丈餘其狀見于堂曰誠易茲爲佛宇善莫之大  
生拜而諾瞬而失旋以堂居僧像佛獻其居爲  
金仙院卽陳永定二年庚申也鶴髮麻衣西天  
之謂故號金仙  
山水推其奇鶴髮增其異緇錫日萃院落日峻  
隋開皇九年昇爲寺焉左漱寒泉右擁疊巘危  
樓豁壺公之翠上方視鮎海之波唐景雲二年

辛亥寺僧志彥入內背又講四分律唐宗嘉之  
錫號聰明彥因獲言所居寺之自復有僧無際  
持妙法蓮華經感石上湧白泉僧歿而泉變清  
焉遂膺勅額爲靈巖寺太和二年殿中彭城劉  
公軻募提泉印聆寺之勝不卸而宿候吏不蔬  
而午掬泉而漱隨手以涸其石今坎于上方之  
上其僧復有玄悟玄準慧全省文靈敞無了悉  
間生祇園堅持密行或臨壇表德或降虎示真  
厥衆如雲厥施若市洎武宗皇帝乙丑之否邑  
之東有敬善寺民井而居之乾有玉澗寺民畝  
而田之獨茲之奇豪人互以金輪爲幽宅之卜  
若有之衛竟不克遂敞公了公及旬帽首條腰  
沉蹤處晦逮宣宗皇帝之復索之於石鱗雲根  
歸之於蕪基燒址山靈之感行羶之募投金執  
斷匪招匪勸不越閩而其宇鱗鱗其徒翼翼敞  
公咸通六年秋八月云滅靡風而大樹折庭靡  
觸而大殿傾瓦了公八年冬十月坐亡色身不  
壞今龜陽之號真身大師者也則知僧以行而

神其亦地以靈而感若乃軒軒月殿謁藹松門  
醍醐雨天瑠璃鏡地慧燭九枝而吐燄慈雲五  
色以垂陰推於既越居之甲乙今僕射瑯琊王

公牧民之外雅隆淨土論及靈勝以為東山神

泉之比神泉寺在府城之東山其泉亦自僧感而湧也繕經五千卷於

茲華創藏而藏焉平天祐二年春二月也初

侍御史濟南林公藻與其季水部員外郎蘊貞

元中谷茲而業文歐陽四門捨泉山而詣焉四門

宋晉江泉山在郡城之北其集有與王氏書云蒲陽讀書即茲寺也其後皆中殊

科御史省試珠還合浦賦有神授之名水部應

賢良方正科擅比干之譽策云臣遠祖比干因諫而死天不厭直更

生徵臣也歐陽垂四門之號與韓文公齊名得非山

水之靈秀乎元和才子童孝標邵楚萇朱可名

寄詩以題大和中穎川陳蔚江夏黃楷長沙歐

陽碣兼愚慕三賢之懿躅葺齋于東峯十年成

通乾符之際豪貴塞龍門之路平人藝士十攻

九敗故穎川之以家寃也與二三子率不西邁

而愚奮然凡二十四年于舉場幸泰甲第東歸

之尋舊止蒼苔四疊嘉樹雙亞今東峯雙龍眼樹即在巖書齋

陰也訪舊僧雲扁十扣雪頂一存於是謹祝金

儀益誓丘禱以謝茲山之靈秀刻銘貞石兼補

前賢之未述其詞曰

山奇孕神地勝惟靈螢窻既夜鶴髮斯形一畝

請宮雙蓮建扁洞深夏寒林茂冬青松竹壑樂

峯巒豁屏晶迷嶂窟茫眺鱗溟持經僧志湧石

泉冷四分律講萬乘君聽勅飛額降寺以靈名

不有地祥焉動天庭大士鴻生珠明桂馨良牧

聳聞華構藏經浩劫不泯匪茲曷丁敬祝巉巖

勒石以銘

龜洋靈感禪院東塔和尚碑

三教之垂萬古也咸以師弟子授獨釋氏之師

弟子削姓以名別為父子之流葉東塔和尚葉

真身大師其道偕極不可思議以父子言克盡

弓裘之善和尚法號志忠俗姓陳世居仙遊祖

諱璠父諱節繼以好尚山水崇佛友僧生和尚

自于乳抱鼻逆羶辛九歲詣真身大師為童子

一見之兩如宿契年十五落髮初大師之卜龜洋也雲木之深藤蘿如織狼虎有穴樵採無逕俄值六眸之巨龜足躡四龜俯仰其首如作禮者三逡巡而失遂駐錫卓菴名其地曰龜洋焉龜洋之泊也孟不及村畝不及菑山產菜號苦蓋以之充卯而齋惟大師與和尚俱歲移月更名馳迹漏檀信尋而施漁獵投而事時謂之二菩薩僧其地或來人之稍乖嚴潔則立有蛇虎驚吼之恠及武宗皇帝乙丑之否稟之而條帽潛匿大師允檀信之迎隱於數家和尚棲於巖穴之內不離茲山相伍者麋鹿馴伏者虎狼既而靡耕菑杜施丐還取苦益之卯至今茲院之逢歉歲一卯之風不泯宣宗皇帝復寺之始議者以靈巖之奇勝非我菩薩僧不可以宏就由是都人環乞大師以居故和尚獨荐龜洋之址焉松堂揭而覺路喧天金磬敲而道花滿地誠以上昇道士不受籙成佛沙彌不具戒和尚且不之然旋將西遊受具足戒於襄州龍興寺大

中十二年東還由廬陵與草菴和尚值草菴曰來自何山曰六眸山曰六通乎曰慧非重瞳和尚蓋行高而言寡是日對答如流既及本山人地愈盛院落則不營而咬供捨則不化而來咸通三年靈巖力圓乃迎大師返于茲八年大師坐亡法身不壞南北歸敬闐然無時和尚以之煩十三年遂南五步里之山得峯之秀室而禪焉卽今南畝也廣明元年弟子智朗惠朗玄鑿藏輝景閑弘幹鴻超悉以植性祇園分光慧炬以謂我大師承法馬祖親得心印則和尚焉今以宿曉而晦辭煩卽靜不可使六眸靈感之地留形示滅之異葉其葉而不之大乎於是迓乞歸于院將以弘張法輪式救迷津其如感通雖然現沒有數中和三年龍集壬寅三月十日示滅壽年六十有六僧夏二十有五後二旬之一日建宰堵波于東岡焉嗚乎和尚之道不粒而午不宇而禪與虎狼雜居所謂菩薩僧信矣其三月之朔語其衆曰至道之有顯晦師弟子不

欲雙立昔大師之去也留形爲之顯今吾之行  
矣速藏爲之晦故將儀貌若生而蓋棺晦明不  
逾而啓土從付囑也其上足景閑弘幹以凡紀  
道名須資詞筆懇實行實扣愚求文滔早訪蓮  
扇今悲松塔敢辭抽思用刻貞銘爲之銘曰  
六眸獻山二葉開蓮號及菩薩正真自然雲林  
匿迹狼虎叅禪仙花撲地智月懸天示滅之滅  
顯晦岐焉布金左岡建塔開阡實歸上界寧曰  
下泉松風栢雨空悲歲年

華嚴寺開山始祖碑銘

師法號行標俗姓方祖榮父安甫之盛族師生  
于建中二年辛酉韶亂卽穎悟異於諸童九歲  
投玉澗寺監寺神皎出家將二年皎嘉其拔萃  
命之落髮師以梵行未至不敢預大僧數至貞  
元十七年方薙鬢髻翌日遠講所習涅槃經一  
寺歎服旣而辭其師北遊抵京薦福寺受戒品  
請章教大師法會章教奇之令首其衆凡十年  
士君子之造者無不聳慕尋爲功德使推入道

塲憲宗善之元和十一年東歸復于玉澗焉法  
雨隨車慈雲被物泊武皇帝除佛舍籍釋子於  
戶部師則巾華陽衣縫掖晦迹樵客廬于西巖  
石室律身守道如居千衆及宣皇帝復寺刺史  
耶那王公迎以幡花舍於郡開元寺俾爲監領  
大中六年師以環足之煩擁旅之數乞歸故山  
先時玉澗之北巖泉石之奇也卜而居之縣令  
中山甄宿與甫之士庶爭沐醍醐共隆蘭若煙  
繚蔽虧朱碧掩映前俯平川後峙奔嶠地自人  
勝名由道高刺史河東薛公仰其孤風復馳開  
元之僧衛以入郡日扣華嚴大義幾忘食寢洎  
解印與之偕至北巖題之爲華嚴院以徹祠部  
焉師咸通六年七月五日示滅壽八十有五僧  
夏六十有四後四十有五日建窆堵波于西岡  
十一年其徒從紹疏師行實于闕昇其院爲華  
嚴寺有徒三十人皆肅肅可觀不忝師門於嚴  
師儀梵翫麟言詞雅直沖默而明敏慈恕而剛  
毅儒書皆通三皇五帝之道言未嘗及而人知

其博古也經論綜貫天堂地法之說舌未嘗舉而人皆務崇善也所至清風凜凜政所謂釋子之高傑者也弟子道光道圓令詢悉器傳師道愚冠扣師關壯以隨計乾寧二年忝登甲科東還荐造金地歲周二紀膠掌而拜影堂腹藁而銘遺美不可使桑門大士泯而無迹焉故銘曰智月不缺乘虛照物道花不衰吐艷無時洞徹照灼傑然吾師稟薦福戒分章教枝厥宗得雋內庭擢之銜香徹印雲間資期數有汗隆道無磷緇德風徒襲法舸寧維山幽跡高身沒名垂松塔雖故竹毫可追稽首影堂敬刻斯碑

福州雪峯山故真覺大師碑銘

大師法號義存長慶二年壬寅生於泉州南安縣曾氏自王父而下皆友僧親佛清淨謹志大師生而鼻逆薰血乳抱中或聞鐘磬或見僧佛其容必動以是別鍾愛於膝下九歲請出家叶而未卽十二從家君遊莆田玉澗寺寺有律僧慶玄持行高潔遠拜之曰我師也遂留爲童子

馬十七落髮淳朴貞古了與流輩異暨武宗皇帝乙丑之否乃束髮於儒冠菜中而蓬跡來府之芙蓉山弘照大師見奇之故止其所至宣宗皇帝之復其道也涅而不緇其身也衰然而出北遊吳楚梁宋燕秦受具足戒於幽州寶刹寺訖巡名山扣諸禪宗突兀飄飄雲翔鳥逝爰及武陵一而德山止於珍重而出其徒數百咸莫之測德山曰斯無倍也吾得之矣咸通六年師歸于芙蓉之故山其年圓寂大師亦自馮山擁徒至坐于怡山王真君上昇之地其徒熟已嗣德德累累而欵關師拒而久之則有行實者始以師同而議曰師之道巍巍乎法門園遶之所不可造次其地宜若鶯嶺猴江之爲卜府之西二百里有山焉環控四邑峭拔萬仞峭崿以支圓碧培塿以覲羣青惟石古松棲鰲龜鶴靈湫邃壑隱見龍雷山之半頂之上則先冬而雪盛夏而寒其樹皆別垂藤蘿羊茸而以爲之衣交錯而不呈其形奇姿異景不可殫狀雖霍童武夷

無以加之實閩越之神秀而古仙之未攸居誠  
有待於我師也祈以偕行去聲秋七月穿雲躡薛  
陟險昇幽將及之師曰真吾居也其夕山之神  
果效靈翌日巖谷爽朗煙霞飛動雲卷旣立月  
構旋隆繇是柅法輪於無爲樹空門於有地行  
實乃請名其山曰雪峯以其冬雪夏寒取鷲嶺  
猴江之義斯則庚寅逮于乙未師以山而道侔  
山以師而名出天下之釋子不計華夏趨之如  
赴召乾符中觀察使京兆韋公中和中司空穎  
川陳公每渴醍醐而不克就飲交使馳懇師爲  
之入府從人願也其時內官有復命于京語其  
道其儕之拔俗悟空者請蛻浮華而來剃信宗  
皇帝聞之翰林學士訪於閩人陳延郊得其實  
奏於是聖錫真覺大師之號仍以紫袈裟俾延  
郊授焉大師授之如不授衣之如不衣居累夏  
辛亥歲朔遽然杖屨其徒啓而不答雲以隨之  
東浮于丹丘四明明年故府侍中之有無諸句  
尅句洗兵於法雨致敬於禪林護師之道常東

望頂手後二年自吳還閩大加禮義今閩王誓  
衆養民之外雅隆其道凡齋僧構刹以之龜焉  
爲之增宇設像鑄鐘以嚴其山優施以克其衆  
時則迎而館之于府之東西甲第每將儼油幢  
聆法輪未嘗不移時餘乎一紀勤懇懇熊罷  
之士因之投跡檀那漁獵之逸其或弭心鱗羽  
戊辰年春三月示疾吾王走暨暨至粒藥以授  
師曰吾非疾也不可罔子之工卒不之餌其後  
札偈以遺法子函翰以別王庭夏五月二日鳥  
獸悲鳴雲木慘悴其夜十有八刻時滅度俗壽  
八十有七僧臘五十有九以其月十五日塔其  
藏焉其塔也其徒僉云以山之奇堂之峻法堂  
大師之生也王去聲是其歿也不宜捨諸故坎其  
中焉若干尺之高若干尺之周皆彫珉石錯火  
壤磷磷然業業然四隅則環宇以麻玲瓏窳窳  
雲霞時入風雨罔侵其日奔閩之僧尼士庶僅  
五千人閩王涕之子降左金吾衛將軍檢校刑  
部尚書延稟始陳祭是設齋焉大矣哉大師之

見世于是罔量其僧耶自始及茲凡四十年東西南北之夏往秋適者不可勝紀而常不減一千五百徒之環足其趨也馳而愈離辯而愈惑

常曰三世諸佛十二分教到此乃徒勞耳其庶

幾者若干人其一號師備擁徒于玄沙今安國也其

二號可休擁徒于越州洞巖其三號智孚擁徒

于信州鵝湖其四號慧稜擁徒于泉州招慶其

五號神晏今府之鼓山也分燈之道皆膺聖獎

錫紫袈裟而玄沙級宗一大師招慶玄晤大師

鼓山定慧大師之命焉其曹早曰法雖無說名

以文垂自少林之逮曹溪無不刻碑而紀頌我

師其默乎一旦忽其曹句首曰從智如堵而扣

愚求文滔老且病刊勒之加多已辭避欽師之

道不覺聳然偉夫恭聞釋波之東注也流其象

則不流其旨流其旨則不象其形厥初大迦葉

之垂二十八葉至于達磨達磨六葉止于曹溪

分宗南北德山則南宗五葉大師嗣句其今六

葉焉雪峯之分玄沙洞巖鵝湖招慶鼓山其道

皆離貝葉以祇其七非滔之能言也但美數公  
歲蕤其葉衆多殷勤之請遂爲之銘而應其求  
其詞曰

曹溪分派誰繼南宗一言冠絕六葉推雄無物  
之物非空之空不瑩而明不增而隆縮靡秋毫  
舒靡鴻濛不有靈鏡曷揚真風懿彼閩越巍乎  
一峯洞壑斯異雪霜罕同天之有待師也云鍾  
名將道協跡與仙崇奔走厥徒百千其叢庶幾  
幾人莫不玄通分燈照耀樹本玲瓏聖君寵疊  
賢王敬重不生不滅曷始曷終刻貞石於斯文  
旌厥德于梵宮

唐黃先生文集卷之五

唐黃先生文集卷之六

唐監察御史閔黃滔著

墓誌銘

司直陳公墓誌銘

姬孔之教與日月以懸天顏閔之馨作芝蘭而出地可不誅清塵於桂苑揭貞石於松阡敬白楊之別生悲風示黃壤之下藏嘉氣者哉漢太丘長二十三世孫南安縣尉諱真生處士堯堯生大理評事齊忠信篤敬不類今世嘗有白雀巢其庭宇佳蓮產其池塘識者謂其後必大有子九人皆力儒學公其長也諱嶠字延封韶亂好學弱冠能文與高陽許龜圖江夏黃彥修居莆之北巖精舍五年而二子西去復居北平山兩地穴管寧之榻十霜索隨氏之珠然後應詔諸侯求試宗伯而以咸通乾符之際龍門有萬仞之險鶯谷無孤飛之羽才名則温岐韓銖羅隱皆退黜不已故公自丁丑之及丙申高價馳而逸步躡既而大盜移國德公文行之深者安

州鄭郎中誠孫拾遺秦嘆而勉之久乃持輦下之屈名適蜀中之貢府致鄉士倒屣場席開路清風既爾竊為權官沾諸將求識而薦之公時已出經試比言之者缺一築帝而亡是舉光啓二年收開三年榮登故相榮陽鄭公禮部上第大哉公為人謹信居家純孝事繼親彌善廬先君墓泣血有聞其所為文扣孟軻楊雄戶牖凡三百篇有表奏牘頗為前輩推工且大唐之設網士得之於是者歲幾人焉矧復有避宦者之節若走衝虛之車焉榮陽公自以得人其春首門人脫麻攝京兆府叅軍司空太原公帥閩解榻以缺一辟之為大從事受大理評事兼監察御史今府相繼擁干節旄益賢其參畫奏大理司直兼殿中方期輟從藩屏入踐諫垣不幸寢疾浹辰不起矣享齡七十有五光化二年十月三日嗚呼將來失其龜鏡斲者喪其般倖雖登大年終恨朝露三年庚申正月十七日丙午葬于泉州莆田縣崇教里北平故山禮也公兩娶



魯園林夫人榮陽潘夫人其子三人仲曰說買石太湖刊文愚與公同邑閩越江山莆陽為靈秀之最貞元中林端公藻冠東南之科第十年而許員外稷繼翔其後詞人疊疊若陳厚慶陳泛陳黯林顥許溫林速許龜圖黃彥修許超林郁俱以夢筆之詞簾金之學半生隨計沒齒銜冤曠乎百年而公追二賢之後七年而徐正字寅捷八年而愚<sup>缺</sup>莫不江山之數耶倚歎昔之負高才不以位而碑者襄陽惟孟先生焉今也累懿德不隆位而碑者以陳夫子始愚沾巾宿草無媿抽毫其辭曰

江山之秀鍾乎人純孝高節并其身掬茲二美  
 摛為雄文以之登桂科以之列蓮賓斯為君子  
 誰曰未仁烏乎九原宜樹貞珉

祭文

祭陳侍御 嶠

維光化三年歲次庚申正月庚寅朔十五日甲辰將仕郎守國子四門博士黃滔謹以清酌之

奠敬祭于侍御陳君延封之靈伏以靈閩之江山莆稱秀絕首武德之科級自貞元之英哲其後繼生碩儒疊疊鴻都交懷荆璞互握隋珠皆指期於拾芥終慟哭於彎弧洎宣皇之後年則夫子之斯出持曾參之孝行袖孟軻之文帙薦賦諸侯上書聖日射宮而勁挺弦矢藝圃而歲蕤華實難亨者吾道難偶者至公管仲三奔非戰之過孫弘十上葢時未通七千里而辛勤上國二十年而惆悵東風人皆一一以興憤我獨孜孜而養蒙既而鳳闕飛塵龜城挂榜儀曹方急於中興權宦輒窺其上賞殊不知楊吟誦於犬子曷薦延乎商鞅古為不然吾肯斯做誰不奇夫子之節誰不高夫子之名水霜却污松柏居貞渭水之釣有守武城之逕寧行逮夫岷峨歲改岐雍煙清天子復舍元調見有司新都省權衡巍巍令問赫赫嘉聲遂從寰海迴蒼蓬瀛振輝光於甲乙開道路於孤平望高而先脫麻衣家遠而須榮鄉土十二人林君茂躅一百年

莆邑大數君侯設醴以前席里巷拜塵而如堵  
雷車轆轤鶴駕翩翩初命就門見東周之三語  
前程不日俟西漢之七遷旋以孔罇引滿徐榻  
解懸白壁黃金而疊矣玳簪珠履以加焉列藩  
所得者賢才古人所重者知已既將推珍於席  
上豈獨矜詞於雪裏莊周說劍則韓魏呈鐔郭  
隗昇臺則樂鄒覲止繡衣曜日聽馬嘶煙飛詔  
而賓階次第假途而棘寺盤旋莫不漢帷駐策  
薛石畱殘從容渥澤寵異淹延胡言薤露忽敗  
椿年嗚呼石火風燭驚波逝川聖賢之不免矣  
古今之共痛焉泊江鄉則中外親姻帝里則參  
差硯席于名而後乎一紀論友而仰乎三益蟬  
槐結念幾同京洛之愁鷲柳看時各署神仙之  
籍別來輦下歸自甌中塵忝而郊詵桂綠因依  
而王儉蓮紅斷金益固投漆攸同見行藏於柱  
史論倚伏於塞翁實期以始者文場之懿德以  
邇來使府之清風伏蒲北省起草南宮更雪當  
時之寃滯少爲吾黨之隆崇是何天之喪道之

窮恩恩大夜默默玄穹滔復曉夕以思江山之  
事林君則以合浦垂名夫子以申秦得意高步  
斯振宏規靡異前輩曠世後來遂志俱蟠使下  
之栢俱擅乙中之二林端公貞元七年首闈越  
名後十年莆邑許員外榮登自此文舉之士繼  
踵而悉不偶時曠百年始鍾於延封其文以申  
秦續篇擅名後六七年徐正字及第兼滔塵忝  
林端公曰延封榜皆第十二人皆開路於後人  
皆終使府大判官判官皆推是言之豈偶然耳  
賢哲相望今昔一致嗚呼延封昨日而冰壺仙  
霧今辰而丹旆芻靈雖死生之理能一終痛傷  
之懇罔寧况以平生樹德幽宅刊銘無慙郭泰  
之賢賤毫曷措爰枉趙歧之寄涕淚交零水咽  
雲愁風悲日暮精靈一閉於泉壤歲月空蒼於  
瓏樹椒壺略備蘭俎聊具申永訣於斯言庶冥  
感其誠素嗚呼哀哉

祭先外舅

伏以彼蒼者穹禍淫福善噫何斯言之或謬歟  
錢鏐壽而顏淵天盜阨牖而嵇康刑屈原寃而  
文考溺冉惡疾而左喪明胡其然哉胡其然哉

伏惟明靈柳蔥松峭山巖鶴孤落落君子行行  
 魯儒始者辭鷗西邁希鵬北徂高高蟾桂赫赫  
 鴻都和贄之寧三泣宋盧之侯一呼而以氣直  
 志大數竒道汗大中季之計車奔走咸通際之  
 名路崎嶇於是涕唾聲華毫釐簪笏枕中罷竟  
 於名位壺裏別窺於日月東尋玉籙則龍虎差  
 峩南訪金沙則羅浮突岷北固風清西陵月明  
 蘭舟泊岸金磬飛聲塵埃謝傳之叔姪夢寐茆  
 家之弟兄古觀秋住靈蹤日行松下之齋官肅  
 肅雲山之醮火熒熒爐燃北癸鼎化西夷羽人  
 傾蓋府帥投誠說浙西周體范居陶象端適衛蓋婚  
 嫁之須子匪貨財之所繫愈高雲鶴之道遙益  
 笑匏瓜之繫滯何武江都蕭牆禍儲羊腸莫守  
 蝸角旋孤說淮南蕭條陳蔡之圍聖賢大困惆悵  
 崑崙之火玉石俄俱綿邈吳山蒼茫閩海遽聲  
 沉而響絕存時移而歲改絡秀愁積孟光泣倍  
 山頭之鶴駕無覩木底之鯉書空待宅相征輪  
 梁園洛濱見徐甲之移主知伯陽之蛻身海山

失翠煙樹亡春泊竊惟早歲忝拜清塵蒙以拾  
 青相器投漆相親鑒義之必晉朝名士識陳平  
 為漢代英臣爰將淑女俾結嘉姻十載不攀於  
 桃李兩誠空貫於松筠愚以感明靈之殊義戴  
 明靈之至仁金重季布枝輕却詵逡巡東越拖  
 擲西秦實期歸釣嚴灘終棲鄧谷戶外山碧樽  
 中酒綠將仰止於樂木冀參差於衛玉豈意寂  
 寥音信髮髯幽明聖人之齊始卒君子之一枯  
 榮天上之鵲橋宜度人間之鴛被須成開簾鳥  
 轉迴轡蜩鳴東牀則黯黯愁色南渭則哀哀哭  
 聲嗚呼哀哉平生氣槩昔日忠貞龜齡曷昧駒  
 隤斯驚在物之理豈人之情愚輒疑道家有形  
 全氣全兵解木解考斯事矣或其義也不然者  
 胡埋南祖之蛇罔念北翁之馬嗚呼哀哉列塚  
 開吁重泉九原古之所制今也斯存伏惟明靈  
 魏夫人遺蓮鋒而所喻葛仙翁墜竹枝以為論  
 固以神遊蓬島洞入桃源然則不樹松柏罔貽  
 子孫是用葬喬山之冠劔招湘浦之精魂滕公

啓室宋玉申言曰楚山青今淮波綠劉雞飛今  
隨鷓鴣道蹤脫屣辭彼俗楊柳霜多不堪矚螺  
江淺兮甌山陰繼昇天兮徐董任風爲輪兮雨  
爲轡東歸來兮北追尋陳桂席兮奠椒漿樹馬  
鬣兮開壽堂千秋萬歲兮舊江鄉魂歸來兮山  
之陽詞咽淚逆猿悲鳥傷東波送恨西日沉光  
雪耀霜明而莫覩之焚蘭蕪以空芳孀妻捧奠  
出女尸喪嗣男而杳杳江嶺鄙子而明明肺腸  
劔以求心而克許樂以悲告而寧忘願明靈之  
冥感鑒蘋藻於壺觴嗚呼哀哉

祭崔補闕 道融

故右補闕博陵崔府君之靈惟靈大唐有進士  
科無巖穴詔故鵠版之降不易其人元和之起  
也則有陽諫議城凜凜清風其不起也則盧諫  
議仝昭昭高道一以權豪之忌空福道民一以  
堯舜之世但樂箕穎其後陸君洿以忠勳應召  
惠君寔以忠諫赴徵未委起草伏蒲何如人也  
洎博陵崔君之生也迥稟高奇兼之文學近則

繼李飛之蛻隨貢遠則同毛義之志奉親東浮  
謝公舊州式避戈戟道於仙巖潯谷克業經綸  
而以美酒肉糴澤馨川媚五辟三顧懸榻開樽  
不辭小國之權蓋切高堂之養既而大君之思  
夢說四輔之急薦雄繁三詔而就門參七人而  
列職仲舒謁帝必演春秋呂望投竿定爲師傅  
奈何龍蛇起陸烏兔無光莫扶劉氏之宗祧空  
泣袁安之涕泗甌中越絕養素守蒙賢王之結  
嘉姻時議之期良輔豈意皇天不祐白日無憑  
消渴之函茂陵少微之入瑤桂芝焚蘭蕪梁壞  
山頽雖人生之有定期實土德之爲不幸嗚呼  
閩中二月烟光秀絕脂轄赴關鯤鳳嘈噴其猶  
南浦魂斷北梁淪咽而況昨日軒車今朝塗芻  
唱薜露以出門飛粉旌而戒途五離擇日九泉  
卜居其在樵蘇其在博沽至於路行尚皆悲吁  
矧其嶽嶽之曰男子鏘鏘之號魯儒識通龜策  
握耀蛇珠數百篇有唐之詩數千字中興之書  
國風騷雅王佐謀訃沉光之猶衝斗垂翼之未

搏扶賞志歿地其痛何如雲物爲之無色剛忍爲之不愉消飲風永嘉傾蓋無諸多君於士元廊廟待我以叔度陂湖交言旣異投分斯殊方俟彈冠仰修程於霄漢誰云執紼悲落景於桑榆豈鬼神之害良善而吉凶之昧賢愚顏回先死盜跖後殂世之災青生之毒痛愴恨風燭淒涼隙駒着匪豐俎酒匪馨壺歎松蒿而永往託殯藻以聊舒明靈有感鑿而歆歎已乎已乎噫

祭陳先輩鼎

維光化四年歲次辛酉正月二十七日祭于陳君之靈闔山秀氣齊國清塵天之授受鍾我仁人卓矣生世學而立身衛玠則旁輝其舅曾參則大孝於親始者隨計歸越上書入秦擅價而侯門傾動呈功而鳳藻精新咸通之年九霄也鷓路乾符之際萬仞也龍津旣而旣嶺經兵蜀川迎帝匪無隨駕之懇實切問安之計肩負焦飯志銷丹桂雖深藏豹之誠難遏化鯤之勢都

堂昔日困一千章之交鋒大國中興作第二人之登第杏園醉後華表歸時往歲井邑茲辰羽儀旋屬姑蘇積疊勾踐興師於是板輿避地草檄從知百越之江光淘湧四明之山翠參差長鯨旣剔逸足難羈東別朱門南還故里一朝而奄至泣血三載而蔑聞見齒仲由此後千鍾之祿悠哉毛義終身一檄之榮已矣修程不顧盛德逾馨田園草綠戶牖山青與夔龍而抗跡追園綺而忘形且期齊鶴算壽陟龜齡是何修短之期莫測吉凶之闕難局明神罔祐大禍斯丁士林慘怛詞苑伶俜泊始自童年至于壯歲江鄉爲竹馬之友京輦作谷鷲之會三朝被別樓遲泣荆璞之艱十上遭時次第到瑤蟾之內誰言倏忽遽嘆存亡痛人琴之俱絕緬膠漆以空傷嗚呼用新平生德行曩昔文章近則孟浩然雖人間不仕遠則卜子夏乃地下爲耶誠以高科而貞退固從陰騰以舒張遊水東流跋烏西匿昨辰而椒桂獻酬今日而藻蘋滴瀝且彭祖

之延永壽亦至銷磨而巨卿之哭故人得無悽  
惻况乎東西多故南北程遙不得親隨薤露送  
別松塋旣闕殷勤而執紼空將嗚呼以沾纓謹  
以依稀蔬果一二精誠願冥符於胎蟹申永訣  
於幽明

祭林先輩用謙

維光化三年歲次庚申十一月日敬祭于林君  
執光之靈惟靈夫渥注之足以千里之爲程已  
馳之而俄沮懈谷之音以六律之爲府旣叅之  
而忽泯夫不永其終始何痛如之嗚呼林君得  
以言矣君負相如之詞賦慕邨氏之科名一紀  
秦城千門禰刺雖衆口大譽其鳳藻人罕如焉  
而三春累困於鸞喬數何奇也然則女貞而十  
年必字藥靈而九轉須成果契至公克昇上第  
旣已東堂得意南國言旋龍珠則動彩於握中  
鴈序則增輝於天際將冀盛清風於吾道豈期  
歎逝水於人生屈原之難問者天蔡澤之不知  
者命螺江煙景方纓丁令之羽毛駒隙光陰俄

啓曾參之手足誠壽夭靡移於夙契且鬼神何  
害於善人禍福吉凶悠揚曖昧悽涼物理慘怛  
人情今則壽域斯開貞魂永蟄壠頭水咽山上  
雲愁鄧攸之繼世無兒語畱身後雀曙之遺孤  
有女詩在生前雖衰盛之同休亦存亡之至痛  
酒京關進退硯席參差幸忝先鳴彌欣繼捷未  
賀桂枝之入手忽從薤露以傷心修短有茲吁  
嗟何極靈輻戒路丹旒飄風遠寓丹誠聊陳薄  
奠願垂冥感鑒歆於斯嗚呼哀哉

祭右省李常侍洵

惟靈金石呈姿陂湖稟量伊彼昭代生乎德門  
膺河清嶽峻之期擅賈虎荀龍之號時稱最怒  
家謂無雙月中則桂樹連枝日下則駕行接翼  
故得隣家醜婦競頻西子之眉洛下諸生皆掩  
謝公之鼻爲大廷之領袖定千古之風流旣而  
魏闕飛塵蜀都迎駕雖則急賢于行在而志作  
賦於閒居畱連雪水之煙波容與松江之歲月  
其奈珠以川媚蘭於澤馨從吳苑之琴樽疊堯

天之雨露金臺蒲省驄馬螭頭誠幾三顧以就  
 門猶作八元而在野其後七昇赴命二妙對駮  
 天駟呈材蛟龍得水入鼇山而侍從登鳳閣以  
 優游名由實生位以德舉天子乃擢王褒為諫  
 議昇孝若於貂璫前彰潤色之功後養燮調之  
 業旋以攬槍未落歧雍多端忘越嶺之崎嶇慕  
 荊州而倚托東閣之畱連斯重北轅之行邁方  
 營誰料彼穹者天俄奪之魄漳濱一鬼驟苦劉  
 禎殷氏兩楹遽鍾夫子山頽梁壞壁碎芝焚雖  
 人世之死生實七林之摧沮今以湖湘梗澀伊  
 洛迢遙北叩之路連天松楸莫附南巷之號至  
 血丘壙權儀煙雲慘澹於原頭猿鳥悲涼於林  
 際泊曩從上國獲戴殊私近慶外藩薦承厚顧  
 每佇十旬之入拜寧期二豎以來攻彭殤雖謂  
 其同休幽顯其如乎永隔靈輻戒路丹旒讎風  
 昨辰而椒桂獻酬今日而蘋繁滴瀝人生到此  
 天道何言雙淚空流九泉無曙東波嗚咽西日  
 蒼茫輒寓茲誠謹陳薄奠敢祈冥感髮髯歆斯

祭司勳孫郎中

惟靈趙璧呈姿隋珠稟價為乎國器生之德門  
 劉家則三叔揚芳馬氏則五常擅美故得數枝  
 邠桂交茂鵠原一本田荆分輝雞樹理窟則曲  
 臺得雋寶人則華省垂名絲是迴拔蘭宮騰光  
 水鏡臺推二妙日俟七昇不幸岐雍多艱干戈  
 未偃補傾乏石救濁非膠爰攀鴈序於五湖因  
 轉驥程於百越誰料皇天不祐彌爾斯榮遽折  
 椿齡俄隨薤露山頽梁壞芝蕙蘭焚雖脩短之  
 有定期實簪紱之為至痛今則江湖梗澀京洛  
 迢遙權卜露岡寓安壽域川上之東波嗚咽雲  
 間之西日慘悽大夢莫迴下泉長暮滔早於輦  
 轂歷踐軒墻旋振羽於丘門獲陪塵於阮巷顏  
 回短命既恨當年温氏冥裝復從今日人生若  
 此天道何言涕淚空流幽明驟隔嗚呼哀哉輻  
 車明發丹旒晨飛輒憑蘋藻以寓誠用薦塗芻  
 於永訣願垂冥感髮髯歆嗚呼哀哉

祭宋員外

故軍倅觀察推官檢校主客員外郎廣平宋君  
希邈之靈惟靈物有盛則有衰人有生則有死  
古今不易之數毫髮無差之理然則厥壽苟百  
壽終則滅厥身苟修身歿名畱是以顏子天而  
其言不朽原壤老而於道何求吁嗟希邈謁然  
清休蘭杜敗而終馥松柏折而終秋德木千尋  
人材八尺窺雲鶴於風裁濺陂湖於胃臆旣而  
臺築黃金禮先白璧爲席上之至珍運幕中之  
婉畫洛水波清泉山翠橫優游五府輝映雙旌  
兩地之隆崇物望一方之煦始人情緜是入曳  
珠履出居武城尊俎克彰於今譽絃歌迴振於  
嘉聲才業大聞君恩薦至爰從棘寺以寵陟旋  
慶蘭宮之澤被丹鳳飛詔銀魚受賜雖棠陰蓋  
地能資樹德以行春而醴酒疊觴終以持盈而  
戒意九仙樹碧八座塘深駐清源則一府延頸  
赴無諸則一郡沾襟嗚呼希邈持何道致人如  
斯之欽豈非秉仁義忠孝以行已無是非毀譽  
以萌心者哉奈何晉公二豎漳濱一鬼惡去藥

石之內樂入膏肓之裏再耕惡疾以相攻長卿  
消渴而不止艾煙百冗藜杖二年禍被三彭之  
所迫靈非九轉以寧痊嗚呼哀哉石火風燭驚  
波逝水誠修短之無改矣奈痛傷之有等焉芝  
焚桂蕤璧碎珠捐至於路行孰不涕漣愚一揖  
清塵偏容瑣質初憐淡以如水後乃投而若漆  
十年之寒暑無變三益之金蘭愈密洎夫秦城  
駐跡儉府叨招竊惟上榻幸忝同寮南貳隼旗  
雖寄懷而稠疊北依龍節終積戀以迢遙沙岸  
迎歡津樓送別且言不日之後會誰料終天之  
永訣人生夢幻夫復何言世路存亡難勝痛咽  
嗚呼哀哉昨日而牋函寓意今朝而殯藻興詞  
駒隙之光陰如此龜臺之學習何斯幽明驟隔  
音信無期加以道路修阻弓旌繫維慟哭寢門  
而莫逮叫呼穹碧以奚爲聊馳一奠之椒桂用  
敘千秋之別離噫噫噫噫噫噫而已而已而

祭錢塘秦國太夫人

維天復二年歲次壬戌敬祭于故秦國太夫人



之靈天生帝王則若文母方鍾至聖生人臣則若陶母方降大賢信夫韜昂宿之耀於曾襟掬嵩山之氣爲懷抱豈容易哉伏惟明靈天資婦道神授母儀金石不足喻其貞明芝蘭不足表其芬馥訓逾孟織智邁謝圍顏氏子則提育聖人曹大家則師資諸女旣作閨門之上瑞乃生英傑於皇家立曠代之鴻勳擁兩藩之龍節食則萬錢調膳祿則三世及親見綵衣則衣錦之姿見冰鯉則和羹之味騰輝女史興詠國風推於古今實無倫比乃由懿德致此大榮嗚呼靈藥難求流光易謝本冀霜松而永壽忽驚風燭以斯零竟成舉世之悲傷空切至誠之號慕泊幸攀令嗣復忝親隣論交旣契於金蘭抹泣乃同於親屬輒陳薄奠用表悲誠敢冀明靈依侑歆鑒

祭南海南平王代閩王

故南平王之靈惟靈五羊奧區番禺巨壤漢爲列郡唐作雄藩摠百蠻五嶺之殷有出將入相

之盛是故地啓嘉數天生大賢濬六韜三略之才謀韜五袴二天之政術俾其於家受詔衣錦馮牙控二十四州之繁難當二十八齒之美茂光揚千古冠絕一時鍾其明靈其昭昭矣至若恢張霸業揚歛清波臺陟九層靡慚郭隗劔提三尺授自呂虔爰持副貳之雄姿遂領節旄之重寄繇是澤施甘露令肅秋霜掀文房武庫以連雲騰逸氣英風而偃草上榻則阮瑀下賢則左車從善則軾間宣威則斷案故得越伏波之銅柱獻欸而來感鄂公之鐵鞭呈祥以見火山改色珠浦生光無煩處默之酌泉大鄙趙陀之累土然後鳴鐘出入調鼎昇聞致交趾之封疆歸石門之教化九遷渥澤克居浴鳳之池雙立節旄遠過跼鳶之水雖士鮪列第兄三地山簡兼荆湘四州語未同年事推曠世嗚呼是何才德之若彼功業之如此而彼穹者天不壽其齒畢雲龍之契會與龜鶴而等倫矧天子方欲使降皇華恩宣金冊表裏東周之盛旌崇南越之

隆胡二豎之亟攻竟三醫之莫救泰山頽壞俄

興孔氏之歌漢水淒涼遽罷羊公之市實國家

之不幸實藩鎮之不幸某早塵興國旋忝睦隣

雖瓊樹之未親若銅盤之已接方定金蘭之至

分豈期幽顯之驟殊况以幸結良姻累交專介

幕下崔員外昨馳禮幣嘗詣門墻爰蒙執手之

權弘敘親仁之旨今則遽悲存歿益歎彭殤故

將荐舉征塵躬申薄奠九泉注望於歎逝以難

勝五月指期表同盟之必至嗚呼哀哉曩馳羔

鴈今遺蘋繁伊人事之有茲顧痛傷而何極然

則荀龍賈虎大馮小馮雖嗟松壠之長歸終慶

荆枝而繼茂之永言歡好寧息初終幸明靈之一

臨鑒此丹赤嗚呼哀哉

唐黃先生文集卷之六

唐黃先生文集卷之七

唐監察御史閻黃滔著

書

與王雄書

蒙示盛文拜納之日焉可無言滔不業文誠可  
儷偶其辭以贅方寸既再而思夫儷偶之辭文  
家之戲也焉可責其戲於作者乎是若揚優喙  
干諫舌啼妾態叅婦德得不爲罪人乎是乃掃  
除聲律直寫一二強名曰書幸垂聽覽頃越之  
亭工遊蜀之錦肆錦工以之示肆人皆哂越工  
曰誠狂雪之與梭霞異諸然其經緯之如此文  
章之若彼咸言其極滔今獲閣下之文雖莫我  
知亦庶幾於越工之言蜀錦至如典謨之比寧  
敢輒言若復韓校書兩寓沈先輩永崇高中丞  
安邑劉補闕已上十篇書指陳時病俗弊叙述  
飭躬處已講論文學興廢指切知已可否雖常  
人俗士聞見之亦宜感動况吾曹乎則知綿十  
舉而未第者抑有由也夫以唐德之盛而文道

之衰嘗聆作者論近日場中或尚辭而鮮質多  
閣下能揭元次山韓退之之風故天所以否其  
道窒其數使若作騷演易皆出於窮愁也復何  
疑焉今之人皆謂番禺駢寶貨遊者或務所獲  
酒之來也得閣下之文為至寶奇貨克所獲豈  
不厚於它人哉願閣下脂轄躍躡薦計貢闈高  
取甲乙然後使人人知斯之寶貨異於是也元  
次山韓退之之風復行於今日也無令鄭濬孫  
奉季瑞閔廷言陳嶠數公寂寞而已幸惟志之  
不宜酒再拜

答陳礪隱論詩書

隔遠之久每思陸凱之風雅馨香故人秦樹吳  
江梅花一枝為之寓酒無陸君之風雅有故人  
之馨香越山台嶽去年輒以詩八首為之贊昔  
陸氏茂范君之報今酒切希叟之瓊瑤不知何  
以勝據焉况四始六義之莫備匪萌是望伏蒙  
希叟錫以長牋飾之過詞不勝其驚悸而後踴  
躍也敢一二陳之酒始者匠故交之為詩希叟

通季初貢於小宗伯試禹拜昌言賦翌日罷特  
持斯賦於先達之門忽叨見錢之目俗云以詩為未錢而  
市物以賦為持錢而市物是時張喬許彬林希劉皆咸有詩  
名而退飛不已酒既竊其目尤疹二三子落空  
拳之所不敢俟終日遂更以賦數年以賓榻之  
無才畫勝景之多餘暇不能忘情於舊輒薦披  
榛焉于以寓誠敢期希叟之是知乎錫以長牋  
飾之過辭初捧之而驚悸旋諷之而踴躍踴躍  
之謂如見古賢焉何也希叟示以先立行次立  
言言行相扶言為心師志之所之以為詩斯乃  
典謨訓誥也且詩本於國風王澤將以刺上化  
下苟不如是曷詩人乎今以世言之者謂誰是  
如見古賢焉况其籠絡乎天地日月出沒其希  
夷恍惚着物象謂之文動物情謂之聲文不正  
則聲不應何以謂之不正不應天地籠萬物物  
物各有其狀各有其態指言之不當則不應錄  
是聖人刪詩取之合於韶武故能動天地感鬼  
神其次亦猶琴之舞鶴躍魚歌之遏雲落塵蓋

聲之志也琴之與歌苟爾况惟詩乎且降自晉

宋梁陳之來詩人不可勝紀莫不盛多猗頓之

富貴疊隋侯之珍不知百卷之中數篇之內聲

文之應者幾人乎大唐前有李杜後有元白信

若滄溟無際華嶽于天然自李飛數賢多以粉

黛爲樂天之罪殊不謂三百五篇多乎女子蓋

在所指說如何耳至如長恨歌云遂令天下父

母心不重生男重生女此刺以男女不常陰陽

失倫其意險而奇其文平而易所謂言之者無

罪聞之者足以自戒哉逮賈浪仙之起諸賢搜

九仞之泉唯掬片水傾五音之府只求孤竹雖

爲患多之所少柰何孤峰絕鳥前古之未有咸

通乾符之際斯道隳明鄭衛之聲鼎沸號之曰

今體才調歌詩援雅音而聽者懵語正道而對

者睡噫王道興衰幸蜀移洛兆於斯矣詩之義

大矣哉若酒也誠未足與言而已矣自向叨希

周雄文者乎乃惶惕銘戴之無窮伏惟察而憐

之不宜酒再拜

與羅隱郎中書

故表文遺文盛序古人之重存歿爰捧諾金感  
涕之誠實刻肌骨然以郎中十五兄相逢京輦  
得志金蘭雖備熟於行文恐未周於平昔而酒  
以內外之戚始終所詳敢以少才爲之前序誠  
以麟經下筆諸生而不合措辭而史馬抽毫漢  
代而還陳別錄伏惟慈造必踐前言西望禱祈  
可以鑒料

啓

南海韋尚書

酒伏念高爲碧落詎側管以能窺深作滄溟固  
持蠡而莫測焉可愛賁瑣智直杖小才叙昂宿  
之鍾蕭述尼山之降孔旣將越禮誠可加刑然  
則有曠代之遭逢獲千年之際會設若芻扁辯  
囿內退言泉不惟上負於良時抑亦下辜於卑  
志是致齋身擲管沐髮裁辭伏惟尚書象外三  
山人間七寶體天地方圓之製法陰陽昇伏之

機自從見作人龍翔爲鳥鳳騰輝瑞謀流慶皇家文章則游夏固遷事業則伊臯周召飛揚天上踐履朝端且自古六官所重莫先於吏部逮今貳職所難無出於侍郎而尚書五陟東西兩司詮管矧復品量庶彙選度羣材載萬乘之安危繫四方之休戚晉魏則大難斯地國朝尤不易其人歷數除書少聞再命朝廷不欲止於駕省便入鳳池須加分閭之專用飾作霖之盛特以番禺巨壤南越名區外控蠻陬旁通番貨昔者石門酌泉之事合浦還珠之風日月遷綿規程革易以尚書勵辭玉留錢之節執投香載土之心用將揭二賢廉潔之波新五嶺崎嶇之俗俾以佩豹韜而直下建龍節以遐征非止鎮臨且申龜鏡昭然足驗儼若可觀然後飛驛騎以徵黃降鵠書而命說恢張帝道陶冶生靈所以知高祖創基太宗纂業更得無疆之祚仍歸有截之風何以言之伏以尚書萬頃包含千尋峭拔膺嶽峻河清之數切飲氷食蘗之誠識洞古

今居無喜愠將以鏘履聲而朝紫殿擴心秤而啓洪鈞自然道臻於堯舜義軒時復於禹湯文武百蠻向化萬國歸心雖在愚蒙亦能辯識而滔器同魏瓠凡若莊樗握無蛇口之珍額有魚身之點今者遽持幽賤獲覲旌幢兢營方忝於拂塵獎遇旋叨於薦賦且凡開場試士就鋪屬詞從物外之課虛向燈前以應限縱若仲宣閣羣公之筆長卿量陳后之金空有所長或聞未至况滔雖勤篆刻且昧精奇張平子固合陋都陸士衡所宜撫掌寧期尚書親廻嚴重庭賜褒稱變泥沙爲丹牘之姿植管蒯作芝蘭之秀魯史驟榮於一字晉庭俄採於片言超越尋常震驚流革况方今武功草偃文教風行計奔歲貢於九州榜擢詞人於都省至如生於草澤來自溝塍或能有闕文中甲乙求登殊尤選蓋止於同人延舉先達吹噓未嘗有聖日名侯大朝重德面開金口首借丹梯以此推言便宜自賀瑤枝玉榦虛扁皓月之中羽駕雲裝寧遜碧霄之外

已知寒步可造遙程藉以宇內跡單天涯親老  
一旦有茲殊遇得此吉祥買臣何愧於負薪毛  
義實榮於捧檄感深唯泣喜極翻驚瀝膽臍肝  
空寓鄭莊之驛糜軀碎首何裨元禮之門攀謝  
兢惶罔知所措下情無任戰越悚惕屏營之至

薛推先輩

酒體物非工屬詞無取每欲効嘖於越女常思  
裂撰於靈光今者先輩提江筆以雲飛擲孫金  
而羽化賢愚塞望遠近騰聲凡是懷刺來人操  
觚學者莫不竟爲市詣爭作鏡窺所以耻不遊  
門勇於執鞚遂投鄙拙上瀆精奇佇聆架屋之  
譏莫俟披沙之諭豈料茂聞撫掌纒復知音林  
先輩至伏話仁恩超越涯分對彼鷩遷之侶當  
于鳳集之時遽起蘭言爰開金口大垂激發曲  
賜吹噓榮邁序都事逾折簡傾身聳聽踟影瞻  
風如飛水雪以清心若韻笙簧而到耳感深旋  
泣喜極增憂未知腹蟹行蹤巢蚊寓跡獲采片  
言於叔向何酬一字於仲尼雖切朝暉尤加夕

惕然而伏念近世以科網英髦膺張取捨雖例  
從都試實採自衆聞故其負藝而來懷才以至  
是皆闈投哲匠神拜先鳴苟有所稱便馳殊譽  
然後方冲桂月遞躡蓬山如酒今則有此遭逢  
受期獎錄來從特異出自非常便可釋疑永將  
去惑雖慙陋質粗抱丹心旣得地以戴丘倍推  
誠而倚玉在面陳而莫盡於筆寫以寧周攀感  
依投不任榮懼謹詣宅祇候起居陳謝

刑部鄭郎中二首

酒學異生知才非夙構雖叨進取莫俟遭逢郎  
中模楷詞林檄航名路每慮或遺於片善常憂  
不採於一言比者伏蒙曲念虛蕪榮流咳唾誨  
以磨鉢未至刻楮非工冥心於雪夜花朝空徵  
六義屬意於國風王澤罔造二南將令罷課緣  
情迴從體物伏自穰城去騎灞岸歸蹄時邁青  
陽景融朱火於是凝神扣寂閑跡探幽蓋希副  
非次之恩知非敢切平生之志業昨者伏遇南  
宮拜命北闕朝天豈唯上賀於高翔仍喜旁陳

其末藝永期指教畢願攀依而以淺近懷慙雕  
鏤積愧前而復卻決以還疑空眷戀於門墻竟  
遲迴於書幕今則難逃皎鏡須詣平衡冀分妍  
醜之姿式定重輕之品伏惟特固朝暉之旨俯  
憐夕死之心薦賜發言重將辯惑臨風股慄伏  
紙心冲傾寫依投不任激切試賦一軸謹詣宅  
祇候陳獻

又

伏惟郎中樂府至音儒家上瑞既負雄文於卓  
絕仍搜律韻於精微始者袖入名場騰於人口  
以謂若生逢孔氏偃商則失於四科出值毛萇  
周召乃慙於二雅實已當千莫讓而又恥一不  
能復以餘波濡於體物字字並凌雲之勢篇篇  
皆擲地之聲大使前哲懷慙專工積愧酒業非  
精至藝本雕鏤猥蒙仁恩曲賜借示自旬日已  
來齋心繕寫沐髮吟哦愈盡頭風沉成心醉且  
杞國迴船之妙千古所稀而泥金禹<sub>缺</sub>之奇三  
篇不偶是何摘華若是飄驚失手於斯則知用

兵而管仲三奔射策而孫弘十退豈戰之過蓋  
時所違此乃今古玄機聖賢定數契日月虧盈  
之理等陰陽昇伏之期用以否其道而泰其身  
窒於前而通於後逮今一人側席四輔求財則  
煥爛除書飛入雲山之裏昭彰懿德馳歸省闈  
之中徒恨傷麟終幾失馬若無往歲焉有茲辰  
遂使一換暄寒三更揚歷頭居東署首列西曹  
皆是重難無非清顯既明前事因卜將來佇當  
潤色絲綸翱翔近密輝飾於典謨訓誥啓陳於  
堯舜禹湯鎮壓澆風恢張吾道凡居進取皆切  
攀祈况處恩知豈任禱祝所歸公望非自私誠  
賦集謹詣宅起居陳納

謝試官

伏念鸞雞爲鳳有識咸驚投磔參瓊良知足鄙  
豈可高懸皎鏡迫揭平衡而乃呈六極之陋容  
掛一絲之蔑質得不臨風扇面對景忡心然巧  
冶開鑪莫遺鈇鐵精工執斷不問圓方又安可  
內鑰言樞上壽德宇是敢因依借喻一二披誠

涓涓甲薄姿蟻封微狀學雖勤於刻汁藝則愧

於鑲水徒以獻豕辭遼賁花躬魏稅駕而旋同

飲龍操弧而果異麗龜遂至千仞禹門額蒙點

銳兩朝楚國足被別空竟於豐獄以沉埋誰以

蜀桐而激發伏惟博士鳴歧瑞質歌郢至音蔥

籠而張柳風垂迥拔而嵇松雪峭自提攜江筆

鏗擲孫金投身而傾動龍宮揮手而震驚蟾窟

時爭墊角俗竟嚙倉今則珠履賓塔玉京羽駕

欲高飛於魏闕先下歷於虞庠故得槐市三千

杏壇七十依於考擊竊彼飾禡而滔丘錦小才

路蒲末學既非禰鶻大懼溫犀固當絕望超隅

甘心滅刺然則嘗彈流水罔協鍾聰曾躡浮雲

莫迴樂顧是亦難參雅調不號逸羣矧其器乏

正聲價懸駿骨苟叨明試不偶至公則異時何

路以致身他日無門而振跡坐爲棄物立謝明

時是乃洞寫血誠仰祈風鑿伏惟博士曲垂厚

顧猥降隆私將憐其蟻蛤剖胎只自迴旋於皎

月塘蝦奮臂無辭頽碎於高車非敢染黿所希

留馬千瀆清嚴下情不任惶惕屏營之至

盧員外

昨輒以近試賦輕黷門墻韻匪擲金理宜誚石

豈期轉禍爲福以寸獲長戶部鄭郎中伏話員

外仁恩大賜獎錄拜聆嘉耗跪對吉辭感惕兢

惶進退失措實以從古干時之道至今取第之

由莫不路邈鰲頭程懸驥尾苟非先鳴汲引哲

匠發揮縱或自強行將安適伏以員外斷籬積

學計斗負才龜鏡詞林梯航陸海是故門駢鄭

市俗塾郭巾爭俟栽培互希丹飾而滔牛涔淺

狹燕戲微茫豈合攀投徒爲激切員外燕中市

駿稷下館人皆使有歸不言無敢復流厚旨曲

降降私滔是敢引事推言微文借喻且傑如韓

信未歸漢祖以誰知美若西施不入吳宮而孰

驗所以螫劔而凌虛吐耀焦桐而駭耳飛聲然

後感動良知遭逢至鑿事雖小異理或大同伏

惟稍降尊嚴俯垂惻隱如涓昧爲貢士淺作文

夫方今不右武功大先文教矯辭人於鴛谷繪



宗伯於龍門其有負馬之文華韞顏之德行或  
栖栖以至或嶽嶽而來未嘗不坐馳日下之名  
立貯殼中之望是何謝茲振發而處彼幽沉煩  
年厠角逐之場衆口蔑殊尤之譽齊國篲秃荆  
山眼枯漸覺途窮虛云舌在豈可堅期御李確  
慕依劉志空切於投林醜難逃於側管伏惟員  
外魏車委照軒匣揚光儻憐其刻意探幽焦心  
體物雖則異於披沙之說然略幾於架屋之譚  
許列書筠令叅撰杖今者或因薦士敢乞編名  
所希從數仞牆伴二三子增輝瑣質擅價主人  
皆由一顧之仁翹矜百金之諾含毫汗下伏紙  
魂驚非切覬覦所憂誅戮叨越干犯下情無任  
戰懼屏營之至

侯博士 圭

涪口諷雄詞心祈藻鑿在他處則早逾一紀來  
上國則已建二年常測管以推誠每持蠡而注  
念蓋期御李非敢希顏所以竊贊荒蕪薦塵墻  
仞聳蟻封於丘岳疏蛙渚於陂湖敢望吹噓佇

聆誚責昨日進士林郁忽傳尊旨遽話殊私伏  
惟博士曲降恩知俯迴獎錄不置蓋甌之地爰  
興讀蛻之言事邁常倫榮過始望傾身拜命踟  
影瞻風若聽成韶如吞甘醴敢便認爲知己蓋  
將決定曾襟實以當今文教風行詞人輻輳莫  
不俱陳素業各務所歸而博士負擲地鴻名標  
揆天逸勢吐揚雄之五藏陋班固之兩京故其  
接踵望塵駢肩執刺爭爲秤挂互作鏡窺或聞  
由也升堂賜之入室是則千門改觀萬戶飛聲  
若瑤壁之飾來類金絲而振出所謂功伴造化  
言繫慘舒作詞林培植之家爲陸海梯航之主  
必當不私其一顧誤彼衆聞以涪數載辛勤一  
生疑惑唯傾丹懷翹矜重言冀將卜以妍咄斷  
其可否今則出於門館發自齒牙事既殊常道  
方自信枿同寐覺夙若神通呈材之獲般窺鬻  
馬之蒙樂顧已逢哲匠肯愧他人蜀壁端居管  
牀兀坐旣佩茲馨效益勵彼顛愚苟無疑於鑠  
氷則求工於刻楮怵躍兢悚罔知所裁下情無

任感恩激切之至

蔣先輩二首

滔自違門仞尋達家山拜慈親而聚族生光述  
弘造而一時泣下蓋以生平事業出自宗師豈  
惟特異之恩知仍契非常之事分昨者資持惡  
賦刺謁清塵本期劉子俊家特以蓋甌之地陸  
士衡處置於撫掌之間豈期以寸獲長驚鴛竊  
價伏蒙校書先輩驚人賞錄越等褒稱篇篇而  
喻作金聲一一而讀爲蛻字迥施異禮疊錫嘉  
言及門則倒屣於仲宣侍座則授經於左氏周  
旋許與覲縷指揮卑令如蘿附松更使以膠投  
漆俾從秋賦首出門牆顯示輩流別加援引且  
古人之慕元禮纔獲御車學者之師仲舒未曾  
識面以斯修省莫有比倫永言遭逢得謂卓絕  
矧國朝之設科待士較文取人往歲主司則斷  
於獨鑒近時公道則採自衆稱絲是重望朝賢  
有名先達得以主張斯道梯級將來至若有負  
兼才且非所業或文章而稱詞賦或律韻而譚

古風猶自彼唱此傳影隨響答其况專功與善  
本面說人又若校書先輩鳳藻凜天鴻名傑俗  
今時賈馬昔日班張猶在場中多士便瞻於咳  
唾旣行天上一言何啻於興衰當以調啞使鳴  
吹寒冷暖伏自歸寧膝下駐跡江干白日思惟  
中宵起坐旣名爲得路當別議感恩况緣家邈  
東閩路遙北闕一迴逐計數載違親頃者累繕  
蕪詞歷投碩匠或蒙開口少值動心以此鼓勇  
無門自疑不暇今則從大藩之賓榻得當代之  
主人豁如釋氏之破迷醒若神醫之愈疾一家  
相賀舉目增輝進取有茲肺肝可察伏以上京  
迢遞難於獻歲支離須俟新春方議假道進發  
芸馨酷烈蓮幄清虛昨陪侍於遊從今綿隔於  
烟水別無言語併陳於殷浩函中空有夢魂常  
遠於燕昭臺下

又

滔伏念希逸知名於靈運不作門人左思擅價  
於士安非爲弟子雖則清風凜若懿範昭然得

將爲千古高譚未免是一時闕事讎思到此因  
敢形言酒賈持淺蕪塵觸門仞遽竊披沙之論  
爰蒙折簡之知事實驚時榮將越望而又謂前  
賢之未至垂厚意以特殊將令別議依投用堅  
恩德資今日顧憐之旨作它時汲引之由苟開  
如此之懷豈是偶然之事赫赫昭代鏘鏘衆人  
榮持哲匠之發揮薦向良時而角逐則何患龍  
宮之杳杳何憂蟾月之高高足以雪曩歲之湮  
沉挾張彌刺壯平生之意氣棄擲終繻如此若  
不激切擊丘淒涼誓劒豈謂脩文學古何名勵  
節砥躬伏自虔侍清塵仰叨殊遇未嘗一夕不  
將心禱於神明縱極千言難以筆書於丹赤攀  
謝感激罔知所容

楊狀頭贊圖

酒驥持末學遽竊殊知伏自豫章數旬滄浦一  
路扁旅舍而夜唯假寐遂征帆而日但沾衣蓋  
以度載遭逢仰思情旨先輩主中興之文學作  
來者之著龜伏蒙採酒所業異於等倫憫酒所

舉困於曩昔大張金口精發瑤函且午火燒空  
一陰司月面泉石或病乎炎毒處城池而奈彼  
鬱蒸况土風則竹屋玲瓏煙水則葉舟蕩漾纔  
曉而烏光赫透欲風而魚沫臄飄雖付於醴酒  
醅醕或亡杯混又屬其羽書重疊時觸高明誠  
知不乏餘波爭奈罕聞暇日豈可更抽秘思別  
運真蹤每摘一幅之霞牋咸滴千痕之雨汗雖  
才過倚馬曾無起草之詞而字悉如蠅幾苦生  
胝之筆未知單賤何補生成賞行而便是金丹  
舉步而則昇雲漢矧復公言私論要訣神方一  
一指蹤頭頭傳授將克周於頂踵俾無失於毫  
釐以此推恩而前古所稀以此行道而方今誰  
比士林名路一朝有知己如斯白日青天萬世  
唯子孫爲誓下情無任感恩泣淚悚謝之至

代鄭郎中上興道鄭相

伏念石甫受知於途中醜蔑申言於堂下旣情  
非曩舊復地隔尊卑尚能感動至公遭逢殊禮  
而酒神資所向天授其時獲曠代之因依得千

年之幸會豈可永緘丹赤上負陶鈞伏惟相公  
特降恩慈俯垂惻隱昔年羽化曾陪鷲谷之春  
今日雲飛俄隔鳳池之路信鶴雞之果異諒牛  
驥之終懸徒增倚玉之榮幾積續貂之愧况相  
公負英才而作礪持碩望以登庸始者四海傾  
心一人側席朝聞坐幄暮見飛霖扇澆薄爲淳  
風激讒邪歸直道均施鑪冶高揭權衡使鈇汞  
之不叅令錙銖之各等故得方圓任器高下隨  
宜黜陟無偏賢愚有序滔早甘退跡忽喜逢時  
速從學省之前銜爰踐蘭宮之峻級已爲塵忝  
誠合揣循竊思頃年九陌秋天都堂雪夜常容  
披霧每許叅瓊逮夫片玉昇科兼金列勝雖登  
龍羣彥同戴丘山而附鳳一心偏投膠漆旣以  
宗盟屬意仍從知舊留情重疊依投綢繆獎錄  
途使慶鐘末路福逮今辰旣預門墻仍從埏埴  
宛得御車之便無煩擁篲之勞但以滔弱羽難  
高么絃易斷始自筮仕及于登朝未嘗暫識清  
途略遊華貫亦人地之所拘限何窮通之切咨

嗟洎夫郢俗褰帷穰城建隼連叨竹使尤愧棠  
陰雖阜蓋紅旌別過素望而霜臺粉暑終繁丹  
心今則榮竊握蘭幸當襍被馮唐歷踐誠知戴  
白之年貢禹棲遲且有彈冠之地

代鄭郎中上靜恭盧相

伏以天覆地載縱鬼神之與皆臻陰伏陽升雖  
鱗介之微必動道旣如此人焉忽諸伏惟相公  
持重器以爲霖負英才而坐幄傳丹青於直道  
扇鑪冶於至公致一物之無遺使萬方之有賴  
滔顧惟瑣陋獲忝鈞鎔旣契之於無私固施之  
於不報豈宜遽責感激竊拜門墻但以事出非  
常恩從特異若不披於丹赤則終有負於神明  
伏惟俯降尊嚴暫垂聽察滔才非敏幹性本顛  
愚自從振跡春闈投身宦路徒綿歲月莫致飛  
馳却則窮途前皆散地是亦用之則未爲國士  
捨之則益類腐儒因自揣循每加退縮然而竊  
念古人不遠賢路非逢皇朝自科擢英髦爵昇  
品秩其或來從草澤生匪簪裾亦常列入清途

參爲盛觀所以益持孤子尤切兢修節勵松筠  
心傾葵藿常注目於煙霄之上每馳覓於省闈  
之中逮夫玄鬢凋空壯心折盡曾無影響空極  
瞻攀豈期相公纔揭權衡便垂採掇俾遭逢於  
聖日今允愜於平生所謂材並得宜物無遺性  
信造化之功不及豈推遷之令能侔義貫古今  
恩逾卵翼况相公峻于埏埴切彼弼諧當今士  
今如林朝稱不乏足得廓其公選擇以良才而  
滔已懷耕釣之心近閉雲林之跡設令漏網未  
曰遺賢是何特達開懷周旋軫念青山在目方  
將魚鳥以同歸鴻渥連天忽歷煙霞而曲被從  
杏壇之舊籍踐蘭署之清資豈是常情諒非小  
事伏自榮叨幘被幸竊含香未嘗一夕暫安片  
時不感常若千鈞之在頂每將孤劔以誓誠但  
以有地受恩無門歷懇只眄高車而激切空持  
敝帚以屏營淚則汎瀾心唯恐悚瞻風拜賜對  
景懷仁洵彼言泉固申陳而未盡託於筆札豈  
寫載以能周攀謝兢惶罔知所措

代鄭郎中上令狐相

某今月四日轉授刑部郎中伏蒙相公仁恩特  
賜寵誨事從非次言異常倫感激兢惶進退失  
措伏以某材非可採藝不足稱出自門墻樹爲  
梯級纒榮地部復陟秋曹持鷓鴣決起之姿到  
鸞鷲曾棲之地相公憐其拙滯忽此騫翔疊降  
恩輝荐畱手筆指今忝幸叙昔經過始者九遷  
曾假虞邦之道向來一字爰垂魯史之褒義極  
生成彩逾丹雘拜窺垂露跪捧隆私汗浹背流  
淚盈背下未知順風弱力撮土微形獲叅一日  
之高蹤何報千鈞之重意唯謹緘於篋笥常誇  
向於搢紳爲宦路之遭逢作仕流之卓異攀謝  
懇切不任下情

代陳蠲謝崔侍郎

某啓戶部鄭郎中伏話鄭隱先輩專傳侍郎尊  
旨伏蒙於新除永樂侍郎處特賜薦論跪對吉  
辭拜聆嘉耗感激兢惶罔知所容某詞學踈蕪  
進取乖拙一叨貢士累黜名場足間之別處縱

橫額上之黥痕重疊今春伏遇侍郎精求俊彥  
歷選滯遺某又名礙龍頭乖豹變都由薄命  
纒負至公以此怔忡莫寧惶惑無已在良時而  
自失於異日以何歸謂一生而便可甘心歎二  
紀而徒勞苦節豈料侍郎堅垂記錄確賜憫傷  
令後人而副取前心指陋質而說爲遺恨將使  
蔡經之骨終繫仙家士燮之寬却還人世蓋施  
陰德豈止陽功喜極翻驚感深唯泣明年春色  
致身雖出於他門今日恩光碎首須歸於舊地

西川高相

相公嶽降宏才神資偉望象外而藹然妙旨人  
間而凜若清風當以四三傑於漢庭九八元於  
堯日聖上以南澄爲水克仗英威西鎮龜城涸  
資妙略所以未歸台輔且據重難巍峩兩地之  
勲冠絕一時之盛凡在中外孰不具瞻

蔣先輩

三吳煙水百越山川兵戈杳隔於音塵門館久  
違於趨覲空自明祈日月暗祝神祇相如徵出

於上林賈誼召來於宣室不然者隱於商嶺棲  
向傳巖克俟搜羅直膺夢寐焚香稽首以日繫  
時滔一滯江鄉六更寒燠都由惡命早失良時  
迢遞一名進取則大朝有難零丁數口退休則  
故國無家歸蜀還吳言發涕下

沈侍御

侍御麟鳳瑞姿蓬瀛絕境叔度與陂湖比量仲  
尼將日月齊明自飛翥九霄梯航陸海鄭門若  
市季諾如金爲學園之芝蘭作詞林之杞梓今  
則提携陳檄登陟燕臺冠張牙角以巍峩幄折  
蓮花而照耀假途如此殊拜寧遙凡在人情孰  
不傾矚

段先輩二首

判官先輩萬頃襟神四科文行比鸞鶴而既冲  
霄漢喻龜龍而須瑞皇王今者賓幕清風士林  
重價雖欲留歡於五辟其如積望於九遷伏計  
卽有新榮別膺殊命滔蒙知旣異感德常深辭  
違遽變於暄寒禱祝敢忘於朝夕

又

昨於道路累附狀伏計迤邐上達滔行役近已  
 到潮州伏以一路經過二年飄泊言則涕下靜  
 而魂銷固非繁情於杯酒笙歌留戀於雲山煙  
 水拋擲進趨之道遲迴溫清之期伏計夙鑒如  
 愚必當知不得已又安可遠舍丹赤莫寓聽聞  
 且聖代近來時風愈正取舍先資於德行較量  
 次及於文章無論於草澤山林不計於簪裾絳  
 冕少有三舉五舉多聞十年九年而滔自廁跡  
 其中且迷津不暇况乎來則無終軍意氣動則  
 有楊朱路岐將卜一歸僅關兩試人事如此光  
 陰幾何先輩特賜恩知殊為誘誨時或軫念固  
 應動心然亦否極則通彩來自聖他日而若無  
 好命今辰而焉有良知唯當依倚栽培諮詢可  
 否陳琳牋檄寧容久借於外藩夫子門墻虔俟  
 再趨於上國

賀正

伏以司雞啟朔建虎堯辰仙人則歛栢延齡詞

客則浮椒獻頌伏惟相公膺茲令節納彼嘉祥  
 邵伯甘棠蓋地之芳陰更闢亞夫細柳連天之  
 瑞色長新與青陽而同發生揭鴻鈞而普播物  
 永貞國柄堅律師壇

又

伏以青陽變律乃二儀革故之辰獻歲開正是  
 四氣惟新之日伏惟僕射與春符契觸物貞亨  
 迎瑞節於鳳銜榮兼四輔建碧幢於甌越永保  
 千年凡於動植之間長受暄和之賜

趙起居

滔今月二十日輒以所業賦一軸陳獻清嚴持  
 腐草之造扶桑鞭欵段之觸騏驥所宜唾面敢  
 俛回眸伏以起居為八韻之咸詔作九流之溟  
 渤凡言進取湏自品題而滔二紀飄零三朝困  
 辱若不仰投門館虔佇發揚則永携疑玉以洗  
 瀾長伴啞鐘而泯默攀託祈禱倍萬等倫

崔右丞 二首

滔獻賦命奇食貧計盡難安桂玉湏逐萍蓬伏

念瀾漣行塵周秦去路平言南北猶悄神鬼况  
今攀託門墻依憑獎顧以坑谷蒼黃之態戴丘  
山岌嶮之恩得不欲別還留將行復却丹誠聚  
血雙淚流珠矧當杏苑煙晴柳溝風暖陌上而  
羣英得意塵中而衰髮傷離設令勇若荆軻固  
亦慟如阮籍伏以右丞弘施陰德濬哲仁心儻  
或萋枯肉骨之未忘則膠柱刻舟而敢怠寧言  
今日唯惕將來遲回數仞之墻邊移時忍去愴  
恨九重之城外舉策何之感戀屏管罔知攸處  
滔依樓門館感激生成頻年忝極薦之書詞逾  
一鶩累勝以未亨之數愧積遷鶯莫不惕息肺  
肝兢惶頽面旣茲負累合在棄嫌而又薦以羈  
遊仰干賤輪雖弘容之不改且循省以何安永  
炭交懷芒刺在背今則已莊行計卽擬出京不  
唯推戴岳之誠指於皎日抑且切戀軒之志泣  
向清風攀感屏管罔知指喻

韋舍人

滔近者輒持齋戒虔寓牋毫瀝南山待旦之誠

告北陸移暄之律理雖可憫罪或難逃伏惟舍  
人義路無疆詞源絕岸設鑄顏之鑪冶恢薦禰  
之牋函今則主文侵入院之期哲匠走致書之  
日儻蒙在於公道申以私恩念滔夙陷義圍薦  
臨文陣化鯁海闊乘風水以未知爲鯉年深逼  
雲雷而愈懼特因薦士敢乞編名則獲從金籙  
以上聞焉有玉皇之不齒立辭坑谷繫在生成  
攀託禱祠涕淚沾迸

工部陸侍郎

滔伏念聚蚊響於出震之音其雖懸越奔羽族  
於鳴岐之德乃不參差事旣同途理宜瀝懇伏  
惟侍郎韞縑縑之奧學負詞賦之重名相如則  
逸格揆天孫綽則英聲擲地播於金石流入典  
謨竊以滔架屋懷慙披沙莫喻固自循揣豈宜  
贊投但以水合朝宗雲須觸石錄是年賞鄙拙  
首扣門墻實爲舉場之中貢士所業律詩古調  
詞賦歌篇前則貞元元和之風耳聞其事近則  
咸通乾符之事目觀其風求知已則咸禱於兼



功斷否臧則須歸於本而然後人方必信道逮無疑則滔一生辛勤數載攀祝必若題品不出於侍郎金口薦揚不出於侍郎瑤函縱能別契亨通固宜終慙暗昧矧以迷津未已泣刑方深比者先輩陳樵早同硯席會將姓字虔爲啟聞伏知侍郎猥賜獎容異於倫等其後薦自同志嘗聆玉音而侍郎文學著龜朝廷領袖滔不敢以後來舉態近日時情僭瀆尊嚴躬陳一二今則又摧髻鬣又近風波溝隍無必出之門肝鬲在須傾之地免叔向則他日莫議活士燮則神術所能願推恩於留馬埋蛇庶受賜於萸枯翼卵下情無任攀託依投激切惕懼之至

翰林薛舍人

滔伏以十一日纔除主文旋瀝精懇罪責則可言於躁切憫傷則宜恕於單危非不三省九思沉吟牋管而以途窮日暮恐懼風波亦猶抱沉病者悉將虔告於神靈懷至痛者無不上呼於穹碧伏以學士舍人軒銅照膽蜀秤懸心仰惟

燭臨當極幽奧且夫禮司取士寒進昇名若無哲匠以斷成未有良時而自致不然者則安得權懸至鑒代有遺人伏惟學士舍人標表士林檉航陸海凡言進取須自門墻今以文柄有歸至公弘播則精力固同於造化嘉言乃作於著龜而滔折角有年交鋒無託羽毛零落髻鬣摧殘若不自學士舍人推恩極山岳之隆攘臂到溝隍之底則還慙抱甕難出戴盆兼近者面獲起居親承念錄哀滔昔年五隨計吏刑雙足以全空今復三歷貢闈救陸沉而未暇許垂敏手拯上重霄謹以誓向鬼神刻於肌骨中興教化一身免沒於風塵下國兒孫百世敢忘於厮隸下情無任攀投懇悃之至

裴侍郎

滔伏念薦孟明則子桑所能免叔向匪祈奚莫議推言及是瀝懇爲宜上瀆清隆敢希容聽伏惟侍郎中丞頃持文柄大闢至公垂爲聖代之準繩懸作貢闈之日月滔爲後無私之兩榜遂

乖必字於十年伏蒙侍郎中丞曲賜憫傷直加賞錄連歲薦論瑣質傾極重言而以弱植難培么絃易斷且驚負累空費生成既而不罪龍鍾愈隆恩遇昨者面容跪履親俾窺天仍加琢玉之品題更啟如金之然諾便於此日上翥重霄今則已除主文只祈陰德延頸於溝隍之底瞻恩於丘岳之隆雖龜龍不瑞於匹夫而犬馬合由於本主沾巾墮曉瀝膽披肝不在他門誓於死節下情無任攀託依投懇悃之至

楊侍郎

伏以義文不兆之文何人復演魯史不褒之事曠古誰稱厥理非遙斯言可喻伏以侍郎榮司文柄弘闡至公歷選滯遺精求文行泉下則大臣有感揭起銷沉場中則寒族無差酌平先後所以如滔者曾于衡鏡經定否臧若不蒙指向後人說爲遺恨則宰輔之爲薦舉帝王之作知音而主且不言人誰肯信繇是湏出侍郎金口湏自侍郎瑤函今則論啟無私恩加瑣質錫生

成於此日迥分付於將來早從握內以擠排便是眼前之科第然後念以漸臨風水莫如蓬島之音塵俾拜雲天親吐蘭言而誨諭留心及是自古所希莫不拳跼循涯闌干抹泣質向神鬼誓於子孫鸞谷乘春雖託他門而振羽糜軀異日涸歸舊地以論恩瀝肝膽以無窮寓牋毫而莫載下情無任感恩懇悃之至

薛舍人

今月二十八日張道古參軍仰傳仁恩伏承舍人學士不以涓幽沉榮賜論薦初疑夢寐旋認生成不知所容兢惶戰悸伏以舍人學士半千膺數全碩負才嘉名冠絕於九流逸步翱翔於四戶頃者重於知已避以文闡隆行望於聖賢蓄基負於台鼎竊惟薦士豈易其人而滔蹤跡蹉跎藝能淺薄敢期弘造遽及茲辰金口開時講貫則處其異等瑤函發處推揚則寘彼極言事出殊常榮非所望感深唯泣喜過齟齬不知微生何酬厚遇中興教化餘年獲出於溝隍下

國兒孫累世敢忘於廝隸

趙員外

伏以曠轡流輝已侵窮臘禹門飛浪卽到登時  
莫不顯多士之精誠佇有司之新命竊惟萌朕  
已見昇沉若滔也折角有年爭鋒無主空乘龍  
鍾之態仰希傷憫之求此亦有類守株其疎若  
網伏惟員外學士猥隆恩遇克異等倫近者面  
獲起居親叨然諾自歸族舍徹坐寒宵歷將往  
事以思惟洞見今辰之通塞且夫春官取士寒  
進昇名若無哲匠之斷成未有良時而自致不  
然者則安得權懸至鑒代有遺人伏以滔別無  
知音只投門館儻或員外學士止推言於公薦  
不攘臂於私恩則滔也望絕飛馳甘爲簸棄至  
若白雪巖谷青草汀州敢辭依舊秉耕踵前沉  
釣然以來時耆舊別後交親皆謂中興雪先朝  
之困辱寧期上國看後輩之飛鳴必疑有過於  
措持無聞於卿士旣頽面而斯乏湏蠻貊而云  
行是以瀝膽披肝碎身殞首永將死節不替他

門伏惟員外學士義路連天仁心匪石敢希接  
拯畢賜生成珠岸盤根始作不枯之草金丹入  
口能還已逝之魂祈禱依投啟喻罔盡下情無  
任攀託懇悃之至

唐黃先生文集卷之八

唐監察御史閻黃滔著

序

穎川陳先生集序

唐設進士科垂二百年有司之取士也喻之明鏡喻之平衡未嘗不以至公爲之主而得喪之際或失於明鏡或差於平衡何哉俾其負不羈之才蘊出人之行歿身名路抱恨泉臺者多矣嗚呼豈天之竟否其至公也抑人之自坎其命邪穎川陳先生實斯人之謂歟先生諱黯字希孺父諱贇通經及第娶江夏黃夫人賢而先生無昆仲姊妹十歲能詩十三袖詩一通謂清源牧其首篇詠河陽花時面豆如豆新愈瘡之牧戲之曰藻才而花貌胡不詠歌先生應聲曰玳瑁應難比斑犀定不加天嫌未端正滿面與裝花繇是聲名大振於州里十七爲詞賦作蘇武謁漢武帝陵廟賦便爲作者推伏二十爲文先生松姿柳態山屹陂注語默有程進退可法早孤

事太夫人彌孝熙熙愉愉承顏侍膳雖隆雲路之望終確綵衣之戀既而及其子蔚冠太夫人勉之曰付蔚於潘岳之筵俟爾於郗詵之桂方起於鄉薦求試貢闈已過不惑之年矣乃會昌乙丑逮咸通乙酉其間以寧家兼在疚之斷絕往來吳楚之江山辛勤秦雍之槐蟬嘆嗟知已之許與與同郡王肱蕭樞同邑林顥漳浦赫連韜福州陳旣陳發詹雄同時而名價相上下嗚呼斯八賢皆以不羈之才出人之行懇懇乎進趨恂恂乎鄉黨而無所成豈天之竟否其至公耶抑人之自坎其命耶俾有司失其明鏡差其平衡之如是結冤氣於名路之中銜永恨於泉臺之下豈不甚歟先生之文詞不尚奇切理也意不偶立重師古也其詩篇詞賦賤檄皆精而切於官試尤工滔即先生之內姪也非而趨隅頃隨註之歲先生下世後二十五年而忝登甲第東歸之求遺藁其季子遠泣曰兵火也少得其文三十一首賦若干首他處得詩若干首敬

俟增而後述天復元年滔叨閩相之辟旋使錢塘與羅郎中隱遇隱曰咸通初與先生定交於蒲津秋賦之場賦則五老化爲流星詩則漢武橫汾先生之作也爲試官嚴郎中郡之吟諷秋場五十人之降仰今遺藁可叢願序之旣還不  
及求增謹以所得之文賦詩牋檄分爲五卷抹淚搦管爲之前序將寓正郎爲之後序正郎負宇內之雄名用釋泉臺之永恨時天復二年秋七月也

讚

龍伯國人讚

國人之釣也一釣聯六鼈而存者一鼈而已其猶背蓬萊方丈嬉遊神仙偉夫設六者不餌其何如哉洪濤七其洲渚塵世幾其躁妄則以古以今之君皆秦漢也推是言之斯人也不謂無功於有國故追以讚之曰

磻溪之釣兮釣更殷周龍伯之釣兮釣減嬴劉腹膾背虛兮一聯月鉤巨骨駢器兮鴻臙疊羞

豈惟一時今表竒東海抑乃萬祀今垂社中洲  
一品寫真讚

夫山嶽之隆莫隆於嵩華江海之大莫大於溟渤故天之生聖賢於百千年也乃稟其竒秀以爲之氣色包其浩蕩以爲之胸襟落落汪汪如龍如鳳然後總兵符於握內懸相印於腰間胸膺生靈扶持邦國大矣哉將如是則命良工持筆之精賞墨之妙寫千儀貌移於繒素不可以不叙不述小從事滔職忝文詞齋戒而獻讚曰嵩華千天氣貌斯然溟渤紀地胸襟靡異謂如龍也至靈謂如鳳也嘉瑞列素在壁良工善移一時丹雘兩面風姿秋月寫彥回之質岸寶山分叔則之表儀松森峭壁日映咸池聖君急麟閣之繒明朝當詔旨之飛索而觀之

雜文

夷齊輔周

列位於朝無言於君曰輔歟抗跡於野有言於君非輔歟麟鳳龜龍王者之嘉瑞朝其庭乎暮

其沼乎武王聖人也周公聖人也召公賢人也  
天下三分以其二分以火殷辛且致夷齊之扣  
馬設使盡天下之三分姑至殷辛之自火然若  
太伯之君吳則百穀合穎於舜耕九鼎同波乎  
禹珪仲尼之又盡善也寧獨韶乎既而異諸則  
周之道首陽之餓乃諫死作夷齊輔周

### 吳楚二醫

吳人之疾不救其屬善醫憫其家竭其術以治  
之楚人之疾救其屬善醫欲其家逆其術以治  
之君子痛二醫之行若乎治亂比于知殷之不  
救而救之仍藥之以九竅李斯目秦之救而不  
救之卒鳩之以二世嗚呼殷之亡也疾之甚矣  
秦之亡也醫之罪也後之有國有家者得不慎  
乎醫

### 禱說

天有日月民無一旦之薦地有江山歲有四時  
之禱得非彼之至明烏免無得而私焉此之至  
大神龍其或權焉是則尊有天下無不日月其

德而億兆之心咸急江山之禱

### 綿上碑

至忠之爲人臣君不之德怨甚爲忠乎至孝之  
爲人子親不之德怨甚爲孝乎苟非忠與孝則  
介推蕤若枯株名叅悖德又焉可祠儀忌赫于  
千春哉且重耳得國之初賞功之際鍾鼎鱗次  
獨推漏澤覺覺然而索懇至焚林而推以一  
時之失爲歿身之怨可乎設終身之失特何加  
之別使志忠而疑至孝而惡去聲又何如哉則周  
公宜怨於成王大舜宜怨於瞽叟以功急賞則  
漁父宜腰於伍劔魯連宜罄於齊粟矧推之且  
養不志祿其甘乎始事君後急賞豈賣忠而買  
爵乎愚謂介推之意不然以重耳之不德愈知  
其母之賢既得其與爾俱隱之言從其德則其  
言晦逃其跡則其言彰其言彰則其母名斯大  
孝之志也仲尼云立身揚名以顯父母立已之  
身揚已之名猶冀泝流父母豈母賢之未名而  
已不名之乎祿親者衆名親者鮮使獲其言若

祿其甘是瀆其賢推是以死其君怨取賢其母  
名斯介推之意也

噫二篇

或謂聾者曰師曠也瞽者曰婁婁也無不悖其  
辭之戲或謂魯儒曰顏閔也蜀儒曰楊馬也無  
不喜其辭之矣是何彼以視聽之亡而苟能自  
鑒此以耳目之貌而反不自知噫

芝蘭草也松桂木也喻於君子而榮之桀紂君  
也李斯大臣也盜跖華胄也喻於小人而耻之  
則知蛇克銜珠而奚蛇龍苟醜身而匪龍噫

文栢

仲尼之道顏閔得之為四科後人得之為顏閔  
鳥獸得之為麟鳳草木得之為文彩故廟之堂  
有文栢焉頃為官于國子者乃一枝器有司得  
而竄諸噫聖人之道未嘗不缺也若天之西北  
地之東南日之吳月之虧也故聖人窮於陳蔡  
宋衛顏天麟傷皆有以也設使不有陳蔡宋衛  
之事則何以象天地日月之盈虛乎顏不天則

何以感子之慟麟不傷則何以明子之道時君  
缺之也斯栢也不為其官者乃而竄諸則何以  
繩後之權者謂必權者是取之器也故天以傾西北而拱  
列宿地以缺東南而朝百谷日以吳而成早暮  
月以虧而見盈縮子以陳蔡宋衛而示損顏以  
慟而益彰麟以憂而示時君斯栢也以刃而後  
永則知聖人之道不缺則不全于不朽也

公孫甲松

公孫甲善畫松漢武帝時公卿牙求之或旬或  
月或季得之如至寶武帝暇顧東方朔曰卿得  
甲之松乎對曰臣未嘗得之色沮帝怪朔徐而  
進曰臣見公孫甲之善畫松舉國舉朝之人奇  
之狂然其所棲鶴其形吟風清韻或森踈澗底  
或翳鬱庭際而過者罕不或之目臣痛其假能  
奪真故不求之且丹青其筆物至於是枝葉其  
口人胡以勝臣敢以陳之昔妲己之假奪比干  
之真斬尚之假奪屈原之真宰詬之假奪伍員  
之真是三者皆以至真至誠卒不能制其假矧

不逮者乎武帝悄然改容翌日雪司馬史於旣刑臺戾太子於不及

### 唐城客夢

客有宿唐城之鄙夢一神曰吾幸以神神之道獲司茲土之休戚饗其二仲之馨今值子之道得以休焉且北而徂山之曲乃見蒼翠一林其中則楮煙墨宇椒瀝坎地羣焉昨充飛而不舉入謁廟貌乃夢中之見者也或曰不羞不繆不緡胡跡句斯廟也能倒錯倚伏胎蠻生死雖有道與不善一焉客曰果如是乎思其夢頗憤其神神之言乃藝詞以讓其略曰風雲其力溪壑其心福善禍淫賈茲反覆其神神之道耶前夕荐夢其神慶客投拜曰微子吾乃不日爲上帝譴矣向者悉吾左右蔽爲不之察也幸子之教咸得族而併之矣客逢其里人以廟詢曰近者淫祀而罔應故不祀丘禱而無咎且二仲之馨存焉

### 至比

至比言妖孽之至於人無不誠而懼士言妖孽之至於國無不逆而怒何哉曰至能前知妖孽之至不能却明妖孽之由士能前知妖孽之至乃能却明妖孽之由故異也至言可禳則設淫祀指虛應故誠於可爲懼於所聞士言可禳則殺姐已活比干故逆於聞怒於不可爲嗚呼設直士世用之如邪至鯁辭國納之如簧言則有國有家者何逮乎患

唐黃先生文集卷之八終



唐黃先生文集附錄

唐昭宗實錄

乾寧二年二月乙未勅高宗夢傳說周公遇子牙列位則三公弼諧則四輔朕纂承鴻緒克紹寶圖思致洽平未臻至化今大朝方興文物須擇賢良冀於僉選之間以觀廊廟之器今年新及第進士張貽憲等二十五人並指揮取今月九日於武德殿祇候委中書門下准此處分仍付所司丙申試新及第進士張貽憲等於武德殿東廊內一人盧賡稱疾不至宣令昇入又云華陰省親其父渥進狀乞落下分二十五鋪分不許往來內出四題曲直不相入賦取曲直二字爲韻良弓獻問賦以太宗所問工人木心不正脉理皆邪爲理道取五聲字輪次各雙用爲韻詢于芻蕘詩回文正以芻字倒以蕘字爲韻品物咸熙詩七言八韻成令至九日午後一刻進納丁酉宣翰林學士承旨戶部侍郎知制誥陸扈祕書監馮渥於雲韶殿考所試詩賦各賜

衣一襲氈被等已亥勅朕自君臨寰海八載于茲夢寐英賢物色巖野思名實相符之士藝文具美之人用立于朝庶禋於理且令每歲鄉里貢士考覈求才必在學貫典墳詞窮教化然後升於賢良之籍登諸俊造之科如聞近年已來茲道浸壞鷄多披於隼翼羊或服於虎皮未聞一卷之師已在遷喬之列永言其弊得不以懲昨者崔凝所考定進士張貽憲等二十五人觀其所進文書雖合程度必慮或容請託莫致精研朕是以召至前軒觀其實藝爰於經史自擇篇題今則比南郭之竿音果分一一慕西漢之辭彩無媿彬彬旣鑿妍媸須有升黜其趙觀文程晏崔賞崔仁寶等四人才藻優贍義理昭宣深窮體物之能曲盡緣情之妙所試詩賦辭藝精通皆合本意其盧贍韋說封涓韋希震張蟻黃滔盧鼎王貞白沈崧陳曉李龜積等十一人所試詩賦義理精通用振儒風且躡異級其趙觀文等四人并盧贍等十一人並與及第其張

貽憲孫溥李光序李樞李途等五人所試詩賦不副題目兼句稍次且令落下許後再舉其崔礪蘓楷杜承昭鄭稼等四人詩賦最下不及格式蕪類頗甚曾無學業敢竊科名浼我至公難從濫進宜令所司落下不令再舉其崔疑爵秩已崇委寄殊重司吾取士之柄且乖慎選之圖辜朕明恩自貽伊咎委中書門下行勅處分奏來其進士張貽憲等二十四人名准此處分賜陸辰馮渥銀器分物其落下舉人並賜絹三匹中書門下覆奏伏以文學設科風化是繫得其人則儒雅道長非其才則趨競者多實在研精仍資澄汰昨者宣召貢士明試殿庭題目盡取於典墳賦詠用觀其工拙異周睿鑒盡叶至公升黜而懲勸並行取捨而憲章斯在其趙觀文等二十四人望准宣處分崔疑商量別狀奏聞丁未勅國家文學之科以革隋弊歲登俊造委之春官蓋欲華實相符爲第一用近寢詛謬虛聲相高朕所以思得貞正之儒以掌其事而聞

刑部尚書知貢舉崔疑百行有常中立無黨學窺典與文贍菁英洎遍踐清華多歷年數累更顯重積爲休聲遂輟其憲綱任之文柄宜求精當稍異平常朕昨者以聽政之餘偶思觀閱臨軒比試冀盡其才及覽成文頗多蕪類豈宜假我公器成彼私榮既觀一一之吹盡乏彬彬之美且乖朕志宜示朝章尚遵合垢之恩俾就專城之任勉加自省勿謂無恩可貶合州刺史廣

言所載一同

### 莆陽志

黃滔字文江乾寧二年乙卯趙觀文榜進士光化中除四門博士尋遷監察御史裏行克威武軍節度推官王審知據有全閩而終其身爲節將者滔規正有力焉中州若李絢韓偓王滌崔道融王標夏侯叔王拯楊承休楊贊圖王侗歸傳懿避地于閩悉主於滔時閩中所爲碑碣皆其文也今浮圖荒隴舊刻猶存

### 五代史補

黃滔在閩中爲威武軍推官王審知饋之魚黃  
滔方與徐寅對談遂請寅代爲謝棧寅援筆而  
成其略曰銜諸斷索才從羊續懸來列在瑀盤  
便到馮諼食處時人大稱之

丹鉛總錄

明 楊慎

黃滔律賦如明皇回駕經馬嵬云日慘風悲到  
玉顏之死處花愁露泣認朱臉之啼痕褒雲萬  
疊斷腸新出于啼猿秦樹千層比翼不如於飛  
鳥景陽井云理昧納隍處窮泉而詎得誠乖馭  
朽攀素練以胡顏可喜也

甲  
乙  
集  
十  
卷

四部叢刊初編集部

上海商務印書館縮印  
常熟瞿氏藏宋書棚本

第一卷

除抗羅隱昭諫

曲江春感

皇庑

寄鄭補闕

牡丹花

黃河

汴河

西京崇德里居

投所思

經張舍人舊居

維城作

陪曹使君遊

寄姑蘇曹使君

送章碣赴舉

寄楊秘書

金庭勝事見示敘

得寶尚書書二首

雪

暇日寄曹使君

寄右省王諫議

焚書坑

始皇陵

送沈先輩

春日葉秀才曲江

西京道德里

憶夏口

武牢關

途中獻孟中丞

長安秋夜

秋晚寄友人

春晚寄鍾尚書

秋日有酬

所思

送魏校書

四皓廟

浮雲

早發

香

鄴城

第二卷

七夕

送臧漬

清明日曲江懷友

送鄭州嚴郎中

孫負外赴闕

衡陽泊木居士廟

鍾陵見楊秀才

登孫權城

寄盧校書

賀盧員外賜緋

春日獨遊禪智寺

送韋士赴

右土廟

金陵夜泊

上江州陳負外

廣陵開元寺作

上鄂州韋尚書

早春巴陵道中

酬臧漬見寄

送李司空朝覲

見裴郎中題名

憶池陽有寄

題岳麓寺僧舍

出試後投所知

湘南春日懷古

江州望廬川

金陵寄寶尚書

清溪江今公宅

鄭州獻盧舍人

別池陽所居

送內使周大夫

酬黃從事見寄

編

西施

自遣

白角篋

銅雀臺

鶯鷓

金錢花

梅

第三卷

錢尚父生日

寄前戶部陸郎中

登瓦棺寺閣

費穆君所居

途中寄懷

京口見李侍御

秋日酬張特立

登高詠菊

登夏州城樓

水邊偶題

傷洛陽公

杜陵秋思

過江陵感事

夜泊毗陵無錫縣

桃花

筆筆驛

過故兵部李侍郎

商驛樓東望有感

寄南城韋逸人

梅花

高駢所造迎仙樓

和禪月大師見贈

謁文宣王廟

代文宣王荅

重送朗州張員外

秋夜讀常修三篇

過試投所知

漢江上作

秋夜寄進士顧榮

寄渭北徐從事

徐冠南逼感事

寄三衢孫員外

送盧端公歸臺

楊帝陵

馬嵬坡

柳

隋堤柳

孟浩然墓

秦紀

仙掌

第四卷

詠月

宿荊州江陵館

撫州別阮兵曹

新安投所思

江邊有寄

送友人歸夷門

湘中見進士喬誦

上雪川裴郎中

錢塘江湖

送人赴職任復中

臨川投穆中丞

早春送張坤

東歸途中作

送臧漬歸池州

湘中贈范鄒

寄張侍郎

渚官愁思

閑居早秋

建康

送傅少府

經故洛陽城

夏州胡常侍

寄進士盧休

贈先輩今狐補闕

送秦州從事

裴郎中赴闕

秋日寄裴郎中

西塞山

秋日客舍酬友人

東歸

李侯射 哭孫貞外

篋中得王郎中書 決

子規 姑蘇臺

王濟墓 京中晚望

寄寶澤處士二首

第五卷

秋風生桂枝 思故人

寄陸龜蒙 題方干詩

秋江 寄制誥李舍人

秋日懷孟夷庚 送李右丞分司

郴江遷客 感舊

鷹 秋日寄狄補闕

寄易定公乘億 寄大理徐郎中

寄蘇拾遺 寄許融

寄禮部鄭員外 菊

臺城 舊遊

寄虔州薛大夫 蘇小小墓

寒食日早春城東 秋日懷賈隋進士

亂後逢友人 殘花

秋日富春江行 寄侯博士

送沈光侍御 寄秉皓侍御

寄金吾李孫常侍 與于韞玉話別

封禪寺居 鏡

投寄亭右丞 紅葉

期徐道者不至 歲除夜

雪 旅夢

秋寄張坤 傷華髮

九江早秋 初秋寄友人

秋居有寄 雪霽

埃子 初夏寄顧紹宗

寄第五尊師 寄西華黃鍊師

第六卷

所思 送人歸湘中

送蕭中丞赴闕 送人歸湘中

自貽 暇日感懷寄吳兢

偶興 題鑿石山僧院

圍城偶作 烏程

送楊鍊師 暇日投錢尚父

覽齊史 感別元帥尚父

尚父建小樓三首 題玄同先生草堂首三



城西作

冬暮城西曉眺

秋霽後

茅齋

使者

途中逢劉知遠

遁跡

隴頭水

秦中富人

思歸行

即事中元甲子

魏城逢故人

游江夏口

春思

黃鶴驛偶題

安陸贈徐孺

寄鍾常侍

中秋夜不見月

羅令公附卷有迴

寄處默師

病中上錢尚父

第七卷

送梅處士歸寧國

經故友所居

大梁從事居汜水

杜處士新居

絕境

雪中懷故人

秋晚

昇遷橋

姑蘇真娘墓

靈山寺

倚棹

秋夕對月

寄樹士魏負外

宿彭蠡館

螢

早秋宿葉隨所居

蝶

春居

輕颺

燕

陝西晚思

除夜寄張達

寄羅令公五首

投錢塘元帥尚父

又

錢塘府亭

野狐泉

宿紀南驛

贈無相禪師

遣興

江南酬高崇節

鶯聲

放玉臺體

第八卷

戲呈義興邑宰

聽琵琶

經林工部墓

題張逸人所居

昇平公主舊第

寄黔中王從事

關亭春望

寄徐濟進士

寄韋贍

雪溪晚泊寄裴庶子

送姚安之赴任

寄喬逸人

塞外

裴庶子除太僕卿

詠史

中元夜泊淮口

寄池州鄭負外

歸夢

送州使君

送雲川鄭負外

酬寄右司李負外 蓮塘驛

甘露寺火後 春日登石頭故城

送宣武徐巡官 夕暮寄裴郎中

駕幸蜀四首 題潤州妙善前石羊

寄竇常侍 臺城

看雪上周相公 寄陸郎中昆仲

偶題 故都

董仲舒 獻尚父大王

蜂 簾二首

第九卷

送顧雲下第 村橋

送劉校書 官池秋夕

奉使宛陵 金陵思古

送王使君赴蘇臺 憶九華

送裴饒歸會稽 送程尊師之晉陵

寄句曲道友 貴池曉望

寄崔慶孫 寄楊秘書

酬章處士見寄 送丁明府赴任

寄前宣州竇常侍 秦望山僧院

送光祿崔卿赴闕 寄程尊師

定遠樓 送程尊師東遊

江亭別裴饒 江南寄周僕射

錢塘見芮逢 江都

歲暮感懷寄友人 送張綰游鍾陵

送晉光大師 息夫人廟

漂母塚 感懷

扇上畫牡丹 書懷

七夕 柳

羅敷水 正月七日立春

貴遊 嚴陵灘

第十卷

牡丹 縣齋秋晚酬友人

第五將軍入道 寄無相禪師

秋日有寄 送前南昌崔令

下第作 丁亥歲作

北邙山 三衢哭孫負外

送蘄州裴負外 重九日廣陵道中

東歸別所知 旅舍書懷寄所知首

秋思 西京道中

粉 贈漁翁

下第寄張坤

東歸別常翰

言

簡今生日

晚眺

野花

病驄馬

秋浦

南康道中

北固亭東望寄點師

華清宮

韓信廟

章公子

望恩臺

帝幸蜀

王夷甫

鷺鷥

書淮陰侯傳

青山廟

小松

竹

漫天嶺

甲乙集目錄

甲乙集目錄

甲乙集卷第一

餘杭羅

昭諫

詩

曲江春感

江頭日暖花又開江東行客心悠哉高陽酒徒半彫落終南山色空崔嵬聖代也知無棄物侯門未必用非才滿船明月一竿竹家住五湖歸去來

皇陂

皇陂欲澗深復深陂西下馬聊登臨垂楊風輕弄翠帶鯉魚日暖跳黃金三月窮途無勝事十年流水見歸心輸他谷口鄭夫子偷得閑名直至今

寄鄭補闕

夫子門前數仞墻每經過處憶遊梁路從青瑣無因見恩在丹心不可忘未必便為讒口隔只應貪章諫書忙別來愁悴知多少兩度槐花馬上黃

牡丹花

似共東風別有因絳羅高卷不勝春若教解語

應傾國任是無情亦動人芍藥與君為近侍芙蓉何處避芳塵可憐韓令功成後辜負穠華過此身

黃河

莫把阿膠向此傾此中天意固難明解通銀漢應須曲纜出崑崙便不清高祖誓功衣帶小仙人占斗客槎輕三千年後知誰在何必勞君報太平

汴河

當時天子是閑遊今日行人特地愁柳色縱饒粧故國水聲何忍到揚州乾坤有意終難會黎庶無情豈自由應笑秦皇用心錯謾驅神鬼海東頭

西京崇德里居

進乏梯媒退又難強隨豪貴殫長安風從昨夜吹銀漢淚擬何門落玉盤拋擲紅塵應有恨思量仙桂也無端錦鱗賴尾平生事却被閑人把釣竿

投所思

顛顛長安何所為旅魂窮命自相疑滿川碧嶂

無歸日一塌紅塵有淚時  
雕琢只應勞郢匠青  
育終恐悟秦賢浮生七十今三十  
從此恹惶未可知

經張舍人舊居

行塵不是昔時塵  
謾向朱門憶侍臣  
一塌已無開眼處  
九泉應有愛才人  
文餘吐鳳他年詔  
樹想栖鷲舊日春  
從此恩深轉難報  
夕陽衰草淚沾巾

維城作

大國旌旗出洛濱  
此中煙月已埃塵  
更無樓閣尋行處  
只有山川識野人  
早得鑄金誇范蠡  
旋聞垂釣哭平津  
舊遊難得時難遇  
回首空城百草春

姑蘇城南湖陪曹使君遊

水蓼花紅稻穗黃  
使君蘭棹泛回塘  
倚風藻荇先開路  
迎旆鳧鷖盡着行  
手裏兵符神與術  
腰間金印鍊為囊  
少年太守勲庸盛  
應笑樊臺兩鬢霜

秋日有寄姑蘇曹使君

多病無因棹小舟  
閑聞閭城下謁名侯  
水寒不見

雙魚信風便唯聞  
五袴謳早說用兵  
長暗合近傳觀稼  
亦閑遊須知謝奕  
依前醉間阻清談  
又

送章碣赴舉

革鹿歌終別酒催  
粉闌星綵動昭回  
久經罹亂心應破  
乍觀昇平眼漸開  
顧我昔年悲玉石  
憐君今日蘊風雷  
龍門盛事無因見  
費盡黃金老現臺

寄楊秘書

潮水平來見鯉魚  
偶因烹處得瓊瑤  
披尋藻思千重後  
吟想冰光萬里餘  
漳浦病來情轉薄  
赤城吟苦意何如  
錦衣公子憐君在  
十載兵戈從板輿

往年進士趙能卿嘗話金庭勝事見示

叙

會稽詩客趙能卿  
往歲相逢話石城  
正恨故人無上壽  
喜聞良宰有豪情  
山朝佐命層層偉  
水接飛流步步清  
兩火一刀罹亂後  
會須乘興雪中行

得宜州寶尚書書因投寄二首

雙魚迢遞到江濱，傷感南陵舊主人。萬里朝臺勞寄夢，十年侯國阻趨塵。尋知亂後嘗辭祿，共喜閑來得養神。時見齊山敬亭客，不堪戎馬戰征頻。

曾逐旌旗過板橋，世途多難竟蓬飄。步兵校尉辭公府，車騎將軍憶本朝。醉裏舊游還歷歷，病中衰鬢奈蕭蕭。遺簪墜履應留念，門客如今只下僚。

雪

細玉羅紋下碧霄，杜門傾巷落偏饒。巢居只恐高柯折，旅客愁聞去路遙。擲凍野蔬和粉重，掃庭松葉帶酥燒。寒窻呵筆尋詩句，一片飛來紙上銷。

中賓僚

暇日有寄姑蘇曹使君兼呈張郎中郡  
嘉植陰陰覆劍池，此中能政動神祇。湖邊觀稼兩迎馬，城外犒軍風滿旗。融酒徒誇無筭儉，蓮蓬少最高枝。珊瑚筆架真珠履，曾和陳王幾首詩。

寄右省王諫議

耳邊要靜不得靜，心裏欲閑終未閑。自是宿緣應有累，可能時事更相關。魚慙張翰辭東府，鶴怨周顒負北山。看却金庭芝朮老，又驅車入七人班。

焚書坑

千載遺蹤一窖塵，路傍耕者亦傷神。祖龍筭事渾乖角，將為詩書活得人。

始皇陵

荒堆無草樹無枝，懶向行人問昔時。六國英雄謾多事，到頭徐福是男兒。

送沈先輩歸宋上嘉禮

青青仙桂觸人香，白苧衫輕稱沈郎。好繼馬卿歸故里，况聞山簡在襄陽。盃傾別岸應須醉，花傍征車漸欲芳。擬把金錢贈嘉禮，不堪栖屑困名場。

春日葉秀才曲江

江花江草暖相隈，也向江邊把酒盃。春色惱人遮不得，別愁如瘴避還來。安排賤跡無良策，裨補明時望重才。一曲吳歌齊拍手，十年塵眼未曾開。

西京道德里

秦樹團團夕結陰此中莊鳥動悲吟一枝丹桂  
未入手萬里滄波長負心老去漸知時態薄愁  
來惟願酒盃深七雄三傑今何在休為閑人淚  
滿襟

憶夏口

漢陽渡口蘭為舟漢陽城下多酒樓當年不得  
盡一醉別夢有時還重遊襟帶可憐吞塞馬風  
煙好是冷江鷗月明更想曾行處吹笛橋邊木  
葉秋

武牢關

楚人曾此限封疆不見清陰六里長一壑暮聲  
何怨望數峯秋勢自顛狂由來四皓須神伏大  
底秦皇謾氣強欲學鷄鳴試關吏太平時節懶  
思量

途中獻晉州孟中丞

太平天子念蕭東又委星郎養育功昨日隼旗  
辭闕下今朝珠履在河中樓移庾亮千山月樹  
待乘宏一扇風不及政成應入拜晉州何足展  
清通

長安秋夜

遠聞天子似羲皇偶捨漁鄉入帝鄉五等列侯  
無故舊一枝仙桂有風霜燈歌短焰燒離鬢漏  
轉寒更滴旅腸歸計未知身已老九衢雙闕夜  
蒼蒼

春晚寄鍾尚書

宰府初開黍未塵四年談笑隔通津官資肯便  
矜中路酒盞還應憶故人江畔舊遊秦望月樵  
前公事鏡湖春如今莫問西禪塢一炷寒香老  
病身

秋晚寄友人

洞庭霜落水雲秋又泛輕漣任去留世界高談  
今已得官途清貴舊曾遊手中綵筆誇題鳳天  
上泥封獎狎鷗更見南來釣翁說醉吟還上木  
蘭舟

秋日有酬

舊業傳家有佩刀近聞揮力更揮毫腰間印綬  
黃樞貴卷裏文章白雪高宴罷佳賓吟鳳藻獵  
歸諸將問龍韜登壇甲子鏤三十猶擬迴頭睹  
錦袍

所思

梁王免死荆榛裏  
煬帝鷄臺夢想中  
只覺惘然悲謝傳  
未知何以報文翁  
生靈不幸台星折  
造化無情世界空  
劉蕡寒灰始堪歎  
滿庭霜葉一颼風

送魏校書兼呈曹使君

亂罹無計駐生涯  
又事東遊惜歲華  
村店酒旗沽竹葉  
野橋梅雨泊蘆花  
僻書發跡官雖屈  
負米安親路不賒  
應見使君論世舊  
掃門重得向曹家

四皓廟

漢惠秦皇事已聞  
廟前高木眼前雲  
楚王謾費關心力  
六里青山盡屬君

浮雲

溶溶曳曳自舒張  
不向蒼梧即帝鄉  
莫道無心便無事也  
曾愁殺楚襄王

早發

北去南來無定居  
此生生計竟何如  
酷憐平明睡長被  
雞聲惡破除

香

沉水良材食相珍  
博山爐暖玉樓春  
憐君亦是無端物  
貪作馨香忘却身

郭城

臺上年年掩翠蛾  
臺前高樹夾漳河  
英雄亦到分香處  
能共常人校幾多

甲乙集卷第





甲乙集卷第二

餘杭羅隱昭諫

詩

七夕

絡角星河舊蕩天一家權笑設紅筵應傾謝女  
珠璣篋盡寫檀郎錦繡篇香帳簇成排窈窕金  
針穿罷拜嬋娟銅壺漏報天將曉惆悵佳期又  
一年

送臧漬下第謁賓鄭州

賦得長楊不直斂却來京口看鶯遷也知絳灌  
輕才子好謁尤常醉少年萬里故鄉雲縹緲一  
春生計淚瀾沈多情柱史應相問與話歸心正  
浩然

清明日曲江懷友

君與田蘇即舊遊我於交分亦綢繆二年隔絕  
黃泉下盡日悲涼曲水頭鷗鳥似能齊物理杏  
花疑欲伴人愁寡妻稚子應寒食遙望江陵一  
淚流

送鄭州嚴負外

欲將刀筆潤王猷東去先分聖主憂滿扇好風

擣鄭圃一車甘雨別皇州尚書磧冷鴻聲晚僕  
射陂寒樹影秋從此文星在何處武牢關外庾  
公樓

孫負外赴闕後重到三衢

遠山高樹思悠哉重倚危樓盡一杯謝守已隨  
御詔入魯儒猶逐斷蓬來地寒謾憶移暄手時  
急方須濟世才宣室夜闌如有問可能全忘未  
燃灰

衡陽泊木居士廟下作

鳥噪殘陽草滿庭此中枯木似人形只應物  
長為主未必浮槎即有靈八月風波飄不去四  
時黍稷薦惟馨南朝庾信無因賦牢落祠前水  
氣腥

鍾陵見楊秀才

孺亭滕閣少踟躕三度南遊一事無祇覺流年  
如鳥逝不知何處有龍圖雲歸洪井枝柯斂水  
下漳江氣色麤賴得與君同此醉醒醒爭奈被  
椰榆

自湘川東下立春泊口阻風登孫權城

吳門此去逾千里湘浦難來想數旬只見風師

長占路不知青帝已行春危憐壞堞猶遮水狂  
愛寒梅欲傍人事往時移何足問且憑村酒暖  
精神

春日憶湖南舊游寄盧校書

旅榜前年過洞庭曾提刀筆事甘寧玳筵離隔  
將軍幕朱履頻窺處士星故書自處命爾恩重匣中  
孤劍在夢餘江畔數峯青金貂見鵬嘉賓散迴  
首昭丘一涕零

賀淮南節度盧貲外賜緋

儉道高貴九霄聞粲粲朱衣降五雲驄馬早年  
曾避路銀魚今日且從軍御題綵服垂天眷袍  
展花心透縠紋應笑當年老萊子鮮華都自降  
明君

春日獨遊禪智寺

遠樹連天水接空幾年行樂舊隋宮花開花謝  
還如此人去人來自不同鸞鳳調高何處酒吳  
牛蹄健滿車風思量只合騰騰醉煮海平陳一  
夢中

和淮南李司空轉運貲外

層層高閣舊瀛洲此地須櫟第一流丞相近年

榮倚望重才今日喜遨遊榮持健筆金黃貴恨  
咽離筵管吹秋誰繼伊舉送行句梁王詩好郢  
人愁

后土廟

四海兵戈尚未寧始於雲水學儀形九天玄女  
猶無聖后土夫人豈有靈一戴好雲侵鬢綠兩  
層危岫拂眉青韋郎年少知何在端坐思量太  
白經

金陵夜泊

冷煙輕傍衰叢此夕秦淮駐斷蓬栖鳥遠驚  
沽酒火亂鷄高避落帆風地銷旺氣波聲急山  
帶秋陰樹影空六代精靈人不見思量應在月  
明中

上江州陳貲外

寒江九派轉城樓東下鍾陵第一州人自中臺  
方貴盛地從西晉即風流舊班久望鷄晴蕭餘  
力猶聞虎夜浮應恨屬官無健令異時佳節阻  
閑遊

廣陵開元寺閣上作

滿檻山川漾落暉檻前前事去如飛雲中鷄大

劉安過月裏笙歌煬帝歸法慶海門帆散出地  
吞淮口樹相依紅樓翠幕知多少長向東風有  
是非

上鄂州韋尚書

往歲先皇馭九州侍臣才業最風流文窮典故  
雖餘力俗致雍熙盡密謀蘭省換班青作綬柏  
臺前引絳為鞬都緣未負江山興開濟生靈校  
一秋

早春巴陵道中

遠雪亭亭望未銷岳陽春淺似相鏡短蘆冒土  
初生筍高柳偷風已弄條波泛洞庭猶獵健谷  
連荆楚鬼神妖中流菱唱泊何處一隻畫船蘭  
作橈

廣陵秋日酬進士臧漬見寄

驛西斜日滿窓蟬獨凭秋欄思渺然數尺斷蓬  
慙故國一輪清鏡泣流年已知世事真徒尔縱  
有心期亦偶焉空媿荀家好兄弟鴈來魚去是  
因緣

送淮南李司空朝覲

聖君霄肝望時雍丹詔西來雨露濃宣父道高

休歎鳳武侯才大本吟龍九州似鼎終須負萬  
物為銅絃待鎔臘後春前更何事便看經度奏  
東封

秋日禪智寺見裴郎中題名寄韋贍

野寺疎鍾萬木秋偶尋題處認名侯官離南郡  
應閑暇地勝東山想駐留百盞釀醪成別夢兩  
行垂露浣羈愁心知只有韋公在更對真蹤話  
舊遊

廣陵春日憶池陽有寄

煙水濛濛接板橋數年經歷駐征橈醉凭危檻  
波千頃愁倚長亭柳萬條別後故人冠纈勇病  
來知己賞鷓鴣清流夾宅千家住會待閑乘一  
信潮

春中湘中題岳麓寺僧舍

蟾宮虎穴兩皆休來凭危欄送遠愁多事林鶯  
還謾語薄情邊鴈不迴頭春融只待乾坤醉水  
闊深知世界浮欲共高僧話心跡野花香草柰  
相尤

出試後投所知

此去蓬壺兩日程當時消息甚分明桃須曼倩

催分熟摘待洪崖遺始行島外音書應有意眼  
前塵土漸無情莫交更似西山見啣破愁腸恨  
一生

湘南春日懷古

晴江春暖蘭蕙薰鳧鷖蕩鷓鴣着屣洛陽賈誼  
自無命少陵杜甫兼有文空闊遠帆遮落日蒼

磯歸雲松醪酒好昭潭靜閑過中流一

弔君

江州望廬山

東南蒼翠何崔嵬橫流一望幽抱開影寒已冷  
水底去脚闊欲過湖心來深處不唯容鬼怪暗  
中兼恐有風雷仙人往往今誰在紅杏花香重

首迴

金陵寄寶尚書

二年歧路有西東長憶優遊楚驛中虎帳談高  
無客繼馬卿官傲少人同世危肯使依劉表山  
好猶能憶謝公此去此恩言不得謾將閑淚對

春風

清溪江令公宅

蠻牋象笺夜深時曾賦陳宮第一詩宴罷風流

人不見廢來蹤跡草何宜驚憐勝事啼空卷蝶  
戀餘芳舞好枝還有往年金甃并牧童樵叟等  
閑窺

鄭州獻廬舍人

時本官王令公收復兩京後

海槎閑暇閑風輕不是安流不肯行難省露濃  
湯餅熟鳳池煙暖詔書成漁籌已合光儒夢堯  
印何妨且治兵會待兩都收復後右圖儀表左

題名

別池陽所居

黃塵初起此留連火耨刀耕六七年雨夜老農  
水旱雪晴漁父共舟船已悲世亂身須去肯  
愧途危跡屢遷却是九華山有意列行相送到  
江邊

江邊

送內使周大夫自杭州朝貢

入都上將近平戎便附輶軒奏聖聰三變前  
朝觀禮一函江表戰征功雲間閣闕何時見水  
底瑀池觸處通知有殿庭餘力在莫辭消息寄  
西風

西風

酬黃從事懷舊見寄

舊遊不合到心中把得君詩意亦同水館酒闌

清夜月香街人散白楊風長繩繫日雖難絆  
口談天不易窮世事自隨蓬轉在思量何處是  
飛蓬

繡

一片綠羅 洞房西室女工勞花隨玉指  
添春色鳥逐金針長羽毛蜀錦謾誇聲自貴越  
綾虛說價功高可中用作鴛鴦被紅葉枝枝不  
礙刀

西施

家國興亡自有時兵人何苦進西施西施若解  
傾兵國越國亡來又是誰

自遣

得即高歌失即休多愁多恨亦悠悠今朝有酒  
今朝醉明日愁來明日愁

白角篋

白似瓊瑤滑似苔隨梳伴鏡拂塵埃莫言此箇  
尖頭物幾度撩人惡髮來

銅雀臺

強歌強舞竟難勝花落花開淚滿纓祗合當年  
伴君死免交憔悴望西陵

鷓鴣

莫恨雕籠翠羽殘江南地暖隴西寒勸君不用  
分明語語得分明出轉難

金錢花

占得佳名繞樹芳依依相伴向秋光若交此物  
堪收貯應被豪門盡斲將

梅

天賜胭脂一昧腮盤中磊落笛中哀雖然未得  
和羹便曾與將軍止渴來

甲乙集卷第二

甲乙集卷第三

餘杭羅

隱昭諫

詩

錢尚父生日

大昴分光降斗牛，興唐宗社作諸侯。伊夔事業扶千載，韓白機謀冠九州。貴盛上持龍節鉞，延長應續鶴春秋。錦衣玉食將何報，更俟莊椿一舉頭。

寄前戶部陸郎中

出馴桑雉入朝簪，蕭洒清名映士林。近日篇章欺白雪，早年詞賦得黃金。桂堂縱道探龍領，蘭省何曾駐鶴心。罹亂事多人不會，酒濃花暖且閑吟。

登瓦棺寺閣

下盤雲跡上雲浮，偶逐僧行步步愁。暫憩已知須用意，漸來爭忍不回頭。煙鐘樹老重江晚，林鐸風輕四境秋。懶指臺城更東望，鵲飛龍闕盡荒丘。

九華山費徵君所居

草堂何處試徘徊，見說遺蹤向此開。蟾樹自歸

三迥後鶴書曾降九天來，白雲事跡依前在青瑣。光陰竟不迴盡夕，為君思曩日野泉鳴咽路。毒苦

途中寄懷

不知何處是前程，合掌騰騰信馬行。兩鬢已衰時未與，數峯雖在病相嬰。塵埃鞏洛虛光景，詩酒江湖漫姓名。試哭軍門看誰問，舊來還似禰先生。

京口見李侍郎

嗟嗟江柳欲矜春，鐵瓮城邊見故人。屈指不堪言甲子，披風常記是庚申。別來且喜身俱健，亂後休悲業盡貧。還有杖頭沽酒物，待尋山寺話逡巡。

秋日酬張特玄

病寄南徐兩度秋，故人依約亦揚州。偶因鴈足思閑事，擬棹孤舟訪舊遊。風急幾聞江上笛，月高誰共酒家樓。平生意氣消磨盡，甘露軒前看水流。

登高詠菊盡

籬畔霜前偶得存，苦教遲晚避蘭蓀。能銷造化

幾多力不受陽和一點恩生處豈容依玉砌要  
時還許上金罇陶公沒後無知己露滴幽叢見  
淚痕

登夏州城樓

寒聲獵獵戍旗風獨倚危欄悵望中萬里山川  
唐土地千年魂魄晉英雄離心不忍聽邊馬往  
事應須問塞鴻好脫儒冠從校尉一枝長戟六  
鈞弓

水邊偶題

野水無情去不迴水邊花好為誰開只知事逐  
眼前去不覺老從頭上來窮似丘軻休歎息遠  
如周召亦塵埃思量此理何人會家邑先生最  
有才

故洛陽公鎮大梁時隱得遊門下今之

經歷事往人非聊抒所懷以傷以謝

孤舟欲泊思何窮曾憶西來值雪中朱履少年  
初滿座白衣遊子也從公狂拋賦筆瑠璃冷醉  
倚歌筵玳瑁紅今日斯文向誰說淚碑棠樹兩  
成空

杜陵秋思

南望商於北帝都兩堪栖托兩無圖只聞斥逐  
張公子不覺悲同楚大夫巖畔早涼生紫桂井  
邊疎影落高梧一杯涼酒他年憶灑向清波寄  
五湖

隱者在江陵忝故中令白公叨蒙知遇  
今復重過渚宮感事悲身遂成長句

往歲鄴侯鎮渚宮曾將清律暖孤蓬才憐受情  
三冬後覓許由基一箭中言重不能輕薄命地  
寒終是立春風鳳凰也合台星折回首岐山憶  
至公

夜泊毗陵無錫縣有寄

草蟲幽咽樹初圓獨繫孤舟夜已闌濁浪勢奔  
吳苑急踈鐘聲出慧山寒愁催鬢髮影何易貧  
戀家鄉別漸難他日親朋應大笑始知書劍是  
無端

桃花

暖觸衣襟漠漠香間梅遮柳不勝芳數枝艷拂  
文君酒半里紅歌宋玉墻盡日無人疑悵望有  
時經雨乍淒涼舊山山下還如此回首東風一  
斷腸

筆筆驛

拋擲南鄉為主憂北征東討盡良籌時來天地  
皆同力運去英雄不自由千里山河輕孺子兩  
朝冠劍恨譙周唯餘壘下多情水猶解年年傍  
驛流

重過隨州故兵部李侍郎恩知因村長

句

周高論百牙琴閑夜思量淚滿襟四海共誰  
言近事九原從此負初心鷗翻漢浦風波急鴈  
下郎溪霧雨深慚愧蒼生還有意解歌襦袴至  
如今

商驛樓東望有感

山川去接漢江東曾伴隋侯醉此中歌遶夜梁  
珠宛轉舞嬌春席雪朦朧棠遺善政陰猶在蘆  
送哀聲事已空惆悵知音竟難得兩行清淚白  
楊風

寄南城韋逸人

杜甫詩中韋曲花至今無賴尚家家美人晚折  
露沾袖公子醉時香滿車萬里丹青傳不得二  
年風雨恨無涯羨他南澗高眠客春去春來任

物華

梅花

吳王醉處十餘里照夜拂衣今正煩經雨不隨  
山鳥散倚風疑共路人言愁憐粉艷飄歌席靜  
愛寒香撲酒罇欲寄所思無好信為君惆悵又  
黃昏

淮南高駢所造迎仙樓

鸞音鶴信杳難迴鳳駕龍車早晚來仙境是誰  
知處所人間空自造樓臺雲侵朱檻應難到蟲  
網閑窻永不開子細思量成底事露凝風擺作  
塵埃

和禪月大師見贈

高僧惠我七言詩頓豁塵心展白眉秀似谷中  
花媚日清如潭底月圓時應觀法界蓮千葉肯  
折人間桂一枝漂蕩秦兵十餘載因循猶恨識  
師遲

謁文宣王廟

晚來乘輿謁先師松栢淒淒人不知九仞蕭牆  
堆瓦礫三閭茅殿走狐狸兩霖狀似悲麟泣露  
滴還同歎鳳悲儻使小儒名粗立豈教吾道受



栖遲

代文宣王荅

三教之中儒最尊止戈為武武尊文吾今尚自  
披裘笠屐你等何須讀典墳釋氏寶樓侵碧漢道  
家官殿拂青雲若教顏閔夷靈在終不羞他李  
老君

重送朗州張貞外

朱輪此去正春風且駐青門聽斷蓬一榻早年  
容孺子雙旌今日別文翁誠知汲善心常在爭  
柰千時跡轉窮酬德酬恩兩無路謾勞惆悵鳳  
城東

廣陵秋夜讀進士常修三篇因題

入蜀歸具三首詩藏於篋笥重於師劔關夜讀  
相如聽瓜步秋吟煬帝悲景物也知翰健筆時  
情誰不許高枝明年二月春風裏江島聞人尉  
所思

過試投所知

桃在仙翁舊苑傍暖煙晴靄撲人香十年北地  
頻偷眼二月春風最斷腸曾恨夢中無好事也  
知囊裏有仙方尋思仙骨終難得始與回頭問

玉皇

漢江上作

漢江波浪淥於苔每到江邊病眼開半兩半風  
終日恨無名無跡幾時迴雲生岸谷秋陰合樹  
接帆檣晚思來對此空愁聖明代忍教纒上有  
塵埃

秋夜寄進士顧榮

秋河耿耿夜沉沉往事三更盡到心多病謾勞  
窺聖代薄才終是費知音家山夢後帆千尺塵  
土搔來髮一簪空羨良朋盡高價可憐東箭與  
南金

寄渭北徐從事

暖雲慵墮柳垂條驄馬徐郎過渭橋官秩舊參  
荀祕監簿疊今伴靈嫖姚科隨鶴箭頻曾中禮  
向侯弓以重招莫恨東風促行李不多時節却  
歸朝

徐冠南過感事獻江南知己次韻

酒闌離思浩無窮西望惟揚憶公萬里漂零  
身未了一家知契意曾同雲橫晉國塵應暗路  
轉兵江信不通今日便成盧子諒滿襟珠淚墮

霜風

寄三衢孫貧外

小數文伯見何時南望三衢渴復飢天子未能  
崇典誥諸生徒欲戀旌旗風高綠野苗千頃露  
冷平樓酒滿卮盡是數旬倍奉處使君爭肯不  
相思

淮南送盧端公歸臺

鸞鳳勢逸九霄寬北去南來任羽翰朱紱兩跨  
王儉府繡衣三領杜林官道從國曾臣濟才  
向牢盆始重難應笑張綱謾生事埋輪不得在  
長安

煬帝陵

入郭登橋出郭船紅樓日日柳年年君王忍把  
平陳業只換雷塘數畝田

馬嵬坡

佛屋前頭野草春貴妃輕骨此為塵從來絕色  
知難得不破中原未是人

柳

灞岸晴來送別頻相偎相倚不勝春自家飛絮  
猶無定爭解垂絲絆路人

隋堤柳

夾岸依依千里遙路人回首認隋朝春風未借  
宣華意猶費工夫長綠條

孟浩然墓

數步荒榛接舊蹊寒江漠漠草萋萋鹿門黃土  
無多少恰到書生塚便低

秦紀

長策東鞭極海隅龍鼉奔走鬼神趨憐君未到  
沙丘日肯信人間有死無

仙掌

掌前流水駐無掌下軒車日日新設向山頭  
高舉手何曾招得路行人

甲乙集卷第三

甲乙集卷第四

餘杭羅 昭諫

詩

詠月

湖上風高動白蘋暫延清景此遠巡隔年違別  
成何事半夜相看似故人蟾向靜中矜爪距免  
限明處弄精神常娥老大應惆悵倚泣蒼蒼桂

一輪

宿荊州江陵館

西游象闕恍知音東下荆溪釋越吟風動芰荷  
香四散月明樓閣影相侵關歌別枕千般夢醉  
送征帆萬里心薜荔衣裳木蘭檝異時煙雨好  
追尋

撫州別阮兵曹

雪晴天外見諸峯幽軋行輪有去蹤內史宅邊  
今獨恨步兵廚畔舊相容十年別鬢疑朝鏡千  
里歸心着曉鐘若不他時更青眼未知誰肯薦  
臨叩

新安投所知

少年容易捨樵漁曾辱明公薦子虛漢殿夜寒

時不食宋都風急命何疎雲埋野艇吟歸去草  
沒山田賦遂初長劍一尋歌一奏此心爭肯為  
鱸魚

江邊有寄

江邊舊業半彫殘每軫歸心即萬端枉折野梅  
山店暖醉聽村笛酒樓寒只言聖代謀身易爭  
柰貧儒得路難同病同憂更何事為君提筆畫  
漁竿

送友人歸夷門

二年流落大梁城每送君歸即有情別路筭來  
成底事舊遊言著似前生花荒懶認詞人會門  
在空憐烈士名至竟男兒分應定不須惆悵谷  
中鶯

湘中見進士喬誦

吳公臺下別經秋破虜城邊暫駐留一笑有時  
堪解夢數年無處不同遊雲羣楚思橫漁艇柳  
送鄉心入酒樓且酌松醪依舊醉誰能相見向  
春愁

上雪川裴郎中

貴提金印出咸秦蕭灑江城兩度春一派水清

疑見膽數重山翠欲留人望崇早合歸黃閣詩  
好何妨戀白蘋自是受恩心未足却垂雙翅羨  
具均

錢塘江湖

怒聲汹汹勢悠悠羅刹江邊地欲浮漫道往來  
存大信也知返覆向平流任拋巨浸疑無底猛  
過西陵只有頭至竟朝昏誰去掌好騎赤鯉問  
陽侯

送人赴職任褒中

物態時情難重陳夫君此去莫傷春男兒只要  
有知己才子何堪更問津萬轉江山通蜀國兩  
行珠翠見褒人海棠花謝東風老應念京都共  
苦辛

臨川投穆中丞

試將生計問蓬根心委寒灰首戴盆翅弱未知  
三島路舌頑虛棹五侯門嘯煙白猶沉高木檣  
月清砧觸旅魂家在碧江歸不得十年漁艇長  
苔痕

早春送張坤歸大梁

蕭蕭羸馬正塵埃又送歸軒向吹臺別酒莫辭

今夜醉故人知是幾時迴泉經華岳猶應凍花  
到梁園始合開為謝東門掩關吏不堪惆悵滿  
離杯

東歸途中作

村橋蒼黃覆釣磯早年生計近年違老知風月  
終堪恨貧覺家山不易歸別鴈客帆知岸落遠  
程霜葉向人飛買臣嚴助精靈在應笑無成一  
布衣

送進士臧漬下第後歸池州

賦成無處換黃金却向春風動越吟天子愛才  
雖及席諸生多病又沾襟柳攀瀟岸狂遮袂水  
憶池陽淥滿心珍重綵衣歸正好莫將閑事繫  
昇沉

湘中贈范郎

丹桂無心彼此諧二年踈懶共江潭愁如酒盞  
終難捨老覺人情轉不堪雲外鴛鴦非故舊眼  
前膠漆是煙嵐勞歌一奏霜風暮擊折湘妃白  
玉簪

寄張侍郎

衰羸豈合話荊州爭李恩多不自由無路重趨

相典馬有詩曾上仲宣樓塵銷別跡堪垂淚樹  
拂他門懶舉頭一種人間太平日獨教零落憶  
滄洲

渚宮愁思

楚城日暮煙靄深楚人駐馬還登臨襄王臺下  
水無賴神女廟前雲有心千載是非難重問一  
江風雨好閑吟欲招屈宋當時魄蘭敗荷枯不  
可尋

閑居早秋

槐杪清蟬煙雨餘蕭蕭深葉墜衣裾噪槎鳥散  
沉蒼嶺弄杵風高上碧虛百歲夢生悲蚊蝶一  
朝香死泣芙蓉六宮誰買相如賦團扇恩情日  
日疎

建康

潮平遠岸草侵沙東晉衰來最可嗟庾舅已能  
窺帝室王郎還是預人家山寒老樹啼風曲泉  
暖枯骸動芷牙欲起九原看一遍秦淮聲急日  
西斜

送舒州宿松縣傅少府

離江漠漠樹重重東過清淮到宿松縣好也知

臨浣水官閑應得看瀟峯春生綠野吳歌怨雪  
霽平郊楚酒濃留取餘杯待張翰明年歸棹一  
從容

經故洛陽城

敗垣危堞跡依稀試駐羸驂吊落暉跋扈以成  
梁冀在簡書雖問杜喬歸由來世事須翻覆未  
必餘材解是非千載昆陽好功業與君門下作  
恩威

夏州胡常侍

百尺高臺勃州大刀長戟漢諸侯征鴻過盡  
邊雲闊戰馬閑來塞草秋國計已推肝膽許家  
財不為子孫謀仍聞隴蜀由多事深喜將軍未  
白頭

寄進士盧休

半年池口恨萍蓬今日思量已夢中遊子馬蹄  
難重到故人罇酒與誰同山橫翠後千層綠蠅  
想歌時一燼紅從此客程君不見麥秋梅雨遍  
江東

贈先輩今狐補闕

中間聲跡早薰然阻避鈞衡過十年碧海浪高

終濟物蒼梧雲好已歸天花迎綠服離鷺谷柳  
旁東風觸馬鞭應念淒涼洞庭客夜深雙淚憶  
漁船

送秦州從事

一枝何足解人愁拋却還隨定遠侯紫陌紅塵  
今別恨九衢雙闕夜同遊芳時易失勞行止良  
會難期且駐留若到邊庭有來使試批書尾話

梁州

湖州裴郎中赴闕後投簡寄友生

錦帳郎官塞詔年汀州曾駐木蘭船福衡酒醒  
春苑到柳暉詩成海月圓歌聲遠山珠滴滴漏  
催香燭淚連連使君入拜吾徒在宣室他時豈  
偶然

秋日泊平望驛寄太常裴郎中

蘋洲重到杳難期西倚郵亭憶往時北海罇中  
常有酒東陽樓上豈無詩地清每負生靈望官  
重方升禮樂司聞說江南舊歌曲至今猶自唱

吳姬

西塞山

吳塞當時指此山吳都亡後水孱顏嶺梅乍暖

殘粧恨沙鳥初晴小隊閑波闊魚龍應混雜壁  
危樓猶正新頑會將一副寒蓑笠來與漁翁作  
往還

秋日汴河客舍酬友人

梁宋追遊早歲同偶然違別事皆空年如流水  
催何急道似危途動即窮醉舞且忻連夜月狂  
吟還聚上樓風煩君更枉騷人句白鳳靈地滿  
袖中

東歸

仙桂高高似有神貂裘弊盡取無因唯將白髮  
期公道不覺丹枝屬別人雙闕往來慙請謁五  
湖歸後恥交親盈盤紫蟹千卮酒添得臨歧淚  
滿巾

廣陵李僕射借示近詩因投獻

朝論國計暮論兵餘力由隨鳳藻生語繼槃盂  
拋俗格氣兼河岳帶商聲閑尋綺思千花麗靜  
想高吟六義清天柄已持堯典在更堪回首問  
緣情

重過三衢哭孫負外

爛柯山下忍重到雙檜樓前日欲殘華屋未移

春照灼故侯何在淡瀾沈不唯濟物工夫大長  
遠容才尺度寬一慟旁人莫相笑知音衰盡路  
行難

篋中得故王郎中書

鳳里前年別望郎丁寧唯恐滯吳鄉勸疎杯酒  
知妨事乞與書題作裏根華鹿未能移海曲縣  
花尋已落河陽九原自此無因見返覆遺蹤淚  
萬行

淚

遍臉橫頤咽復勻也曾譏毀也傷神自從魯國  
潛然後不是奸人即婦人

子規

銅梁路遠草青青此恨那堪枕上聽一種有冤  
由可報不如銜石疊滄溟

姑蘇臺

高秦伯開基日賢見延陵復命時未會子孫  
因底事解崇臺榭為西苑

王濟墓

男兒未必盡英雄俱到時來命即通若使兵都  
由王氣將軍何處事殊功

京中晚望

心如野鹿跡如萍謾向人間性一靈往事不知  
多少夢夜來和酒一時醒

寄寶澤處士二首

蘭亭醉客舊知聞欲問平安隔海雲不是金陵  
鐵太尉世間誰肯更容身  
鼇背樓臺拂白榆此中桂客亦踟躕牢山道士  
無仙骨却向人間作酒徒

甲乙集卷第四



甲乙集卷第五

餘

沈昭諫

詩

省試秋風生桂枝

涼吹從何起中宵景象清  
漫隨雲葉動高傍桂枝生  
漠漠看無際蕭蕭別有聲  
遠吹斜漢轉低拂白榆輕  
寥沈工夫大乾坤歲序更因悲歸客長望一枝榮

思故人

故人不可見聊復拂鳴琴  
鵲繞風枝急螢藏露草深  
平生四方志此夜五湖心  
惆悵友朋盡洋洋漫好音

寄陸龜蒙

李相公在淮南

龍樓李丞相昔歲仰高文  
黃閣尋無主青山竟未焚  
夜船乘海月秋寺伴江雲  
却恐塵埃裏浮名點汚君

題方干詩

中間李建州夏汭偶同遊  
顧我論佳句推君最上流  
九宵無鶴板雙鬢老漁舟  
世難方如此何當浣旅愁

秋江

秋江待晚潮客思旆旌遙  
細雨翻蘆葉高風却柳條  
兵戈村落破飢餓虎狼羈  
吾土兼連此離魂望裏銷

寄制誥李舍人

梁王握豹韜雪裏見枚臯  
上客趨丹陛遊人歎二毛  
門閑知待詔星動想濡毫  
一首長陽賦應嫌索價高

秋日懷孟夷庚

秋日黃陂下孤舟憶共誰  
江山三楚分風雨二妃祠  
知已秦貂沒流年賈鵬悲  
中原正兵馬相見是何時

送李右丞分司

分曹得洛川讜議更昭然  
左省曾批勅中臺肯避權  
所悲時漸薄共賀道由全  
畫頁與清平代相兼直幾錢

郴江遷客

不是逢清世何由見皂囊  
事雖危虎尾名勝泪駕行毒霧  
郴江開愁雲楚驛長歸時  
有詩賦一為吊沉湘



感舊

劍佩孫弘問戈鋌太舊管直言虛有位孤立竟  
無成丘壠笳蕭咽池臺歲月平此思何以報歸  
處是柴荆

鷹

越海霜天暮辭翰野草乾俊通司隸職嚴奉武  
夫官眼惡藏蜂在心蠱逐物殫近來脂膩足驅  
遣不妨難

秋日寄狄補闕

紅塵擾擾間立馬看南山謾道經年往何妨逐  
日閑病中霜葉赤愁裏鬢毛斑不為良知在驅  
車已出關

寄易定公乘信

謝舞仍官柳高奇世少雙侍中生不到園令死  
須降班秩通烏府蠲墨奉碧幢昭王有餘烈試  
為禱迷邦

寄大理徐郎中

佐棘竟誰同因思證聖中事難忘願報理合有  
陰功官序詵枝老幽塵范既空幾時潘好禮重  
與話清風

寄蘇拾遺

早歲長楊賦當今諫獵書格高時輩伏言  
情踈慷慨傳丹桂艱難保舊居退朝  
望馬相如

寄許融

多病仍踈拙唯君與我同帝鄉年共老江外業  
俱空燕冷辭華屋蟬涼咽晚叢白雲高幾許全  
屬採芝翁

寄禮部鄭貲外

藥部門風大裴王禮樂優班資冠雞舌人品堅  
龍頭夜直爐香細晴編疏草稠  
十二悲秋

菊

籬落歲云暮數枝聊自芳雪裁纖蕊密金坼小  
苞香千載白衣酒一生青女霜春叢莫輕薄彼  
此有行藏

臺城

水國春長在臺城夜未寒麗華承寵渥江令捧  
杯盤宴罷明堂爛詩成寶炬殘兵來吾有計金  
井玉枸欄

舊遊

良時不復再漸老更難言  
遠水猶經眼高樓似  
斷魂依依宋玉宅歷歷  
長卿村今日空江畔相  
於只酒罇

寄虔州薛大夫

祝融峯下別三載夢魂勞  
地轉南康重官兼亞  
相高海鵬終負日神馬  
背眠槽會得窺成績幽  
窻滌兔毫

蘇小小墓

魂兮攜里城由未有人耕  
好月當年事殘花觸  
處情向誰曾艷冶隨分  
得聲名應待吳王日蘭  
橈暗送迎

寒食日早春城東

青門欲曉天車馬已喧闐  
禁柳疎風細墻花折  
露鮮唯言誇麗景只是  
歎流年不得高飛便迴  
頭望帶鸞

秋日懷賈隋進士

邊冠日搖動故人音信稀  
長纓慚賈誼孤塚憶  
韓非曉匣魚腸冷春園  
鴨掌肥知君安未得聊  
且示忘機

亂後逢友人

滄海去未得倚舟聊問津  
生靈冠盜盡方鎮改  
更貧夢裏舊行處眼前  
新貴人從來事如此君  
莫獨沾巾

殘花

已歎良時晚仍悲別酒催  
暖芳隨日薄輕片逐  
風迴黛歛愁歌扇粧殘  
泣鏡臺繁陰莫矜銜終  
是共塵埃

秋日富春江行

遠岸平如翦澄江靜似鋪  
紫鱗仙客馭金顛李  
衛奴冷疊羣山闊清函  
萬象殊嚴陵亦高見歸  
卧是良圖

寄侯博士

規諫揚雄賦遭迴賈誼官  
久貧還往少孤立轉  
遷難清鏡流年急高槐  
故舍寒侏儒亦何有飽  
食向長安

送沈光侍御赴職聞中

未至應居全家出帝鄉  
禮優逢苑雪官重帶  
臺霜夜浦兵潮亂春灘  
建水狂延平有風雨從  
此是騰驤

寄袁皓侍郎

東堂失路歧榮辱事堪悲我寢牛衣弊君居象  
角危風塵慚上品才業愧明時千里芙蓉幕何  
由話所思

寄金吾李孫常侍

西班牙禁兵蘭綺最分明曉色嚴天仗春寒避  
火城安危雖已任輜略即嘉聲請問何功德盡  
關冠始平

商驛與于韞玉話別

南朝徐庾流洛下憶同遊酒採開坊菊山登遠  
寺樓相思勞寄夢偶別已經秋還被青青桂催  
君不自由

封禪寺居

盛禮何由覩嘉名偶寄居周南太史淚蠻徽長  
卿書砌竹搖風直庭花泣露疎誰能賦秋興千  
里隔吾廬

錢

志士不敢道貯之成禍胎小人無事藝假爾作  
梯媒解釋愁腸結能分睡眠開朱門狼虎性一  
半逐君迴

投寄韋右丞

赤壁衡文聘中臺拜却說官資參令僕曾署轄  
星辰僕被從誰起持綱自此新舉朝明典教封  
納詔書頻禁樹曾摘藻臺烏舊避塵便應酬倚  
注何處話窮鱗

紅葉

不柰荒城畔那堪晚照中野情霜裏綠山冷兩  
催紅遊子霸陵道美人長信宮等閑居歲暮搖  
落意無窮

期徐道者不至

遼鶴虛空語冥鴻未易親偶然來即是必擬見  
無因霜霰窮冬冷杯盤旅舍貪只應勸子訓醉  
後懶分身

歲除夜

官曆行將盡村醪強自傾默寒思暖律長老惜  
殘更歲月已如此冠戎猶未平兒童不諳事歌  
次待天明

雪

盡道豐年瑞豐年事若何長安有貧者為瑞不  
宜多

旅夢

旅夢思遷次窮愁有歎嗟子幾京口遠梗米會  
稽餘漏漉纔成滴燈寒不作花出門聊一望蟾  
桂向人斜

秋寄張坤

庭樹已黃落閉門俱寂寥未知棲托處空羨聖  
明朝酒醒鄉心闕雲晴客思遙吾徒自多感顏  
子只簞瓢

傷華髮

舊國迢迢遠清秋種種新已表曾軫慮初見忽  
沾巾日薄梳兼懶根危鱗恐頻青銅不自見只  
擬老他人

九江早秋

兩過晚涼生樓中枕簟清海風吹亂木巖磬落  
孤城百歲幾多日四蹄無限程西隣莫高唱俱  
是別離情

初秋寄友人

九華曾屏跡羅亂與心違是處堪終老新秋又  
未歸病中芳草歇愁裏白雲飛燕侶兼同志音  
書近亦稀

秋居有寄

端居湖岸東生計有無中魔處千般鬼寒時百  
種風性靈從道拙心事奈成空多謝金臺各何  
當一笑同

雪霽

南山雪乍晴寒氣轉崢嶸鎖却閉門出隨他駿  
馬行一竿如有計五鼎豈須烹秋見天街草青  
青又欲生

垓子

終日路歧秀前程亦可量未能慚面黑只是恨  
頭方雅旨逾千里高文近兩行君知不識字第  
一莫形相

初夏寄顧紹宗

江上偶分袂四回寒暑更青山無路入白髮滿  
頭生野浦鴈尋過鏡湖蟬又鳴憐君未歸日杯  
酒若為情

寄第五尊師

茗溪煙月久因循野鶴衣裘獨重綸只說泊船  
無定處不知攜手是何人朱黃揀日囚尸鬼青  
白臨時注腦神欲訪先生問經談世間難得自

由身

寄西華青錄師

西華有路入中華  
依約山川認永嘉  
羽客昔時留篠簜  
故人今又種煙霞  
壇高已降三清鶴  
海近應通八月槎  
盛事兩般君揔得  
老萊衣服戴

所思

西上青雲未有期  
東浮滄海去何遲  
酒闌夢覺不稱意  
花落日明空所思  
長恐病侵多事日  
可堪忙過少年時  
聞雞走犬五陵道  
惆悵輸他輕薄兒

甲乙集卷第五

甲乙集卷第六

餘杭羅

隱昭諫

詩

送支使蕭中丞赴關

八年刀筆別京華  
歸去青冥路未賒  
今日風流卿相客  
舊時基業帝王家  
形庭綵鳳雖添瑞  
望府紅蓮已滅花  
從此常僚如有問  
海邊麋鹿斗邊槎

送人歸湘中兼寄舊知

青溪煙雨九華山  
亂後應同夢寐間  
萬里分飛休掩袂  
兩旬相見且開顏  
君依宰府貂蟬貴  
我戀王門鬢髮斑  
為謝伏波筵上客  
幾時金印擬西還

自貽

衰老應難更進趨  
藥畦經卷自朝晡  
縱無顯效亦藏拙  
若有所成甘守株  
漢武巡游虛軋軋  
秦皇吞併謾驅驅  
如何只見丁家鶴  
依舊遼東歎綠燕

暇日感懷因寄同院吳蛻拾遺

壁池清秩訪燕臺  
曾捧灑洲札翰來  
今日二難

俱大夜當時三幅護高才戲悲槐市便便箇狂  
憶樟亭滿滿杯猶幸小蘭同舍在每因相見即  
銜哀

偶興

逐隊隨行二十春曲江池畔避車塵如今夢得  
將衰老閑看人間得意人

題鑿石山僧院

日夜潮聲送是非一迴登眺一忘機  
憐師好事無人見不把蘭芽涿褐衣

圍城偶作

東望陳留日欲曛每因刀筆想夫君  
自從郭泰碑銘後只見黃金不見文

烏程

兩府攀陪十五年郡中甘雨幕中蓮  
一餅猶是烏程酒須對霜風度泫然

送楊鍊師却歸真浩巖

宦途不復更經營歸去東南任意行  
別後幾回思會面到來相見似前生  
父居竹蓋知勤苦舊業蓮峯想變更  
爲謝伴狂吳道士耳中時有鐵船聲

暇日投錢尚父

牛斗星邊女宿間棟梁虛敵麗江關  
望高漢相東西問名重淮王大小山  
醴設闢傾金鑿落馬歸爭撼玉連環  
自慚麋鹿無能事未報深恩鬢已斑

覽齊史

張翰思吳中鱸膾事美

齊王僚屬好男兒偶覓東歸便得歸  
滿目路歧拋似夢一船風雨去如飛  
盤聲紫線尊初熟筋撥紅絲膾正肥  
惆悵中途無限事與君千載兩亡機

感別元帥尚父

王函瑤檢下台司記得當時捧領時  
半壁龍蛇蟠造化滿筐山岳動神祇  
疲牛舐犢心猶切陰鶴鳴鶴力已衰  
稚子不才身抱疾日窺真跡淚雙垂

尚父偶建小樓特摘麗藻絕句不敢稱

楊三首

結構叨馮柱石材敢期幢蓋此徘徊  
陽春曲調高難和盡日焚香倚隗臺

玳簪珠履愧非才時凭欄干首重迴  
只待淮妖

剪除後別傾危酒賀行臺

欄檻初成愧楚才不知星彩尚迢迢風流孔令陶鈞外猶記山妖逼小臺

題玄同先生草堂三首

杳杳諸天路蒼蒼大滌山景與留不得毛節去應閑相府舊知己教門新啟關太平臣濟術流

落在人間

先生設行日曾奉數行書意密尋難會情深恨有餘石橋春暖後勾漏藥成初珍重雲兼鶴從來不定居

常時憶討論歷歷事猶存酒向餘杭盡雲從大滌昏往來無道侶歸去有台恩自此玄言絕長應閉洞門

城西作

從軍無一事終日掩空王齋道薄交游少才疎進取乖野禽鳴聒耳庭草綠侵階幸自同榜櫟何妨愜所懷

冬暮城西晚眺

謬忝連華幕虛沾相署官欹危長抱疾衰老不禁寒時事已日過世途行轉難千崖兼萬壑只

向望中看

秋霽後

淨碧山光冷圓明露點勻渚蓮丹臉恨堤柳翠眉墮蟬已送行客馬應辭主人蠅蚊漸無況日晚自相親

茅齋

從事不從事養生非養生職為尸祿本官是受恩名時態已相失歲華徒自驚西齋一厄酒衰老與誰傾

使者

使者銜中旨崎嶇萬里行人心猶未革天意似難明四海霍光第六龍張奉營陪臣無以報西望不勝情

途中逢劉知遠

吳燧波裏巢由季孟間只言無事責不道致身閑別渚蓮根斷歸心桂樹頑空勞鍾璞意塵世隔函關

遁跡

遁跡知安住沾襟欲奈何朝廷猶禮樂郡邑忍干戈華馬憑誰問胡塵自此多因思漢明帝中

夜憶康頗

隴頭水

借問隴頭水年年恨何事全疑嗚咽聲中有征人淚自古無長策況我非深智何計謝潺湲一宵空不寐

秦中富人

高高起華堂區區引流水糞土金玉珍猶嫌未奢侈陋巷滿蓬蒿誰知有顏子

思歸行

不耕南畝田為愛東堂桂身同樹上花一落又經歲交親益相薄知己恩潛替日開十二門自是無歸計

即事中元甲子

三秦流血已成川塞上黃雲戰馬閑只有羸兵填渭水終無奇士出商山田園已沒紅塵內弟姪相逢白刃間惆悵翠華猶未返淚痕空滴劍文斑

魏城逢故人

一年兩度錦江游前值東風後值秋芳草有情皆礙馬好雲無處不遮樓山將別恨和心斷水

帶離聲入夢流今日因君試回首淡煙喬木隔

游江夏口

醉別江東酒一盃往年曾此駐塵埃魚聽建業歌聲過水看瞿塘雪影來黃祖不能容賤客費禕終是負仙才平生膽氣平生恨今日江邊首

春思

蕩漾春風淥似波惹情掃恨去恁恁燕翻永日音聲好柳舞空城意緒多蜀國暖迴溪峽浪衛娘清轉過雲歌可憐戶外桃兼李仲蔚蓬蒿奈

黃鶴驛寓題

野雲芳草遠離鞭敢對青樓倚少年秋色來催榆塞鴈人心先下洞庭船高歌酒市非狂者大嚼屠門亦偶然車馬同歸莫同恨古人頭白盡

安陸贈徐礪

靈蛇橋下水聲聲曾向橋邊話別情一榻偶依陳太守二年深憶禰先生塵欺鬢色非前事火



莢蓬根有去程還把餘杯重相勸不堪秋色背  
鄖城

寄鍾常侍

一從朱履步金臺夔苦冰寒奉七台峻節不由  
人學得遠途終是自將來風高漸展摩天翼幹  
聳方呈構厦材應笑樟高蒼同舍九州無驗滿  
墟灰

中秋夜不見月

陰雲薄暮上空虛此夕清光共破除只恐異時  
開霽後玉輪依舊養蟾蜍

魏博羅令公附卷有迴

寒門雖得在諸宗樓北巢南恨不同馬上固慚  
銷解肉幄中由羨愈頭風蹉跎歲月心仍切迢  
遞江山夢未通深荷吾有知己好將刀筆為  
英雄

寄處默師

甘露卷簾看兩脚樟亭倚柱望潮頭十年顧我  
醉中過兩地與師方外游久隔兵戈長寄夢近  
無書信更堪憂香爐煙靄虎溪月終棹鐵船尋  
惠休

病中上錢尚父

左脚方行右臂擎每慚名跡污賓遊縱饒兵主  
容衰病爭奈燕臺費料鐵藜杖已乾難更把竹  
聲雖在不堪懸深恩重德無言處迴首浮生淚  
泫然

甲乙集卷第六

甲乙集卷第七

餘杭羅隱昭諫

詩

送梅處士歸寧國

十五年前即別君，別時天下未紛紛。亂罹且喜身俱在，存沒那堪耳更聞。良會謾勞悲曩跡，舊交誰去弔荒墳。慙為謝述名客，想望千秋嶺上雲。

經故友所居

槐花漠漠向人黃，此地追遊跡已荒。清論不知莊叟達，死交空嘆趙岐忙。病來未忍言閑事，老去唯知覓醉鄉。日暮街東策羸馬，一聲橫笛似山陽。

大梁從事居汜水

前年帝里從行塵，記得仙家第四人。泉暖舊諳龍隱息，露寒初見鶴精神。歌聲上榻梁園晚，夢遶殘鐘汜水春。知有篋中篇什在，只應從此是經綸。

杜處士新居

翠斂王孫草，荒誅宋玉茅。寇餘無故物，時薄少

深交。迸筭侵行逕，飢鷓出壞巢。小園吾亦有多病，近來拋

絕境

絕境非身事，流年但物華。水梳苔髮直，風引蕙心斜。凡客從題鳳，膺音未勝蛙。小船兼有檝，始與問漁家。

雪中懷友人

臘酒復脫雪，故人今越鄉。所思誰把盞，端坐恨無航。兔苑舊遊盡，龜臺仙路長。未知鄒孟子，何以奉梁王。

秋晚

率邑慙良術，為文愧壯圖。縱饒長委命，爭奈漸非夫。盃酒有時有，亂罹無處無。金庭在何域，回首一踟蹰。

昇遷橋

危梁枕路歧，駐馬問前時。價自友朋得名，因婦女知直。須論運命不得違，文詞執戟君鄉里。榮華竟若為。

姑蘇真娘墓

春草荒墳墓，萋萋向虎丘。死猶嫌寂寞，生肯不

風流皎鏡山泉冷  
輕裾海霧秋還應  
伴西子香  
逕夜深遊

靈山寺

晚景聊攬抱憑欄  
幾蕩魂檻虛從四  
面江闊柰  
孤根幽徑薜蘿色  
小山苔蘚痕欲依  
師問道何  
處繫心猿

倚棹

倚棹聽隣笛沾衣  
認酒爐自綠悲巨  
室誰復為  
窮途樹解將軍夢  
城遺御史烏直應  
春始了傾  
酌向寒燕

秋夕對月

夜月色可掬倚樓  
聊解顏未能分寇  
盜徒欲滿  
關山背冷金塘滑  
毛寒玉兔頑姮娥  
謾偷藥長  
寡老中間

寄樹士魏負外

家遁蘇門節清貧  
粉暑官不矜朝命  
重只恨路  
行難寬曉雞譚倦  
庭秋蝶夢關羨君  
歸未得還  
有釣魚竿

宿彭蠡館

孤館少年旅解鞍  
增別愁遠山矜薄  
暮高柳怯

清秋病裏見時態  
醉中思舊遊所懷  
今已矣何  
必恨東流

螢

空庭夜未央點滴  
度西墻抱影何微  
細乘時忽  
發揚不思曾腐草  
便擬倚孤光若道  
通文翰車  
公業肯長

早秋宿葉蘆所居

池荷葉正圓長層  
報時殫曠野雲蒸  
熱空庭雨  
始寒蠅蚊猶得志  
簟席若為安浮世  
知誰是勞  
歌共一權

蝶

漢王刀筆精寫爾  
遍天生舞巧何妨  
急飛高所  
恨輕野田黃雀慮  
山館主人情此物  
那堪作莊  
周夢不成

春居

東風百卉搖舊國  
路迢迢偶病成疎  
散因貧得  
寂寥倚簷高柳弱  
乘露小桃妖春色  
常無處村  
醪更一瓢

輕颺

輕颺掠晚莎秋物  
慘關河戰壘平時  
少齋壇上

處多楚雖子重漢亦憶廉頗不及雲臺議空  
山老薜蘿

燕

不必嫌深露何妨養羽毛漢妃金屋遠盧女杏  
梁高野迫雙飛急煙晴對語勞猶勝黃雀在樓  
息是蓬蒿

陝西晚思

長途已自窮此去更西東樹色榮衰裏人心往  
返中別情流水急歸意故山空莫忘交遊分從  
來事一同

除夜寄張達

梅花已着眼竹葉況粘膚只此留殘歲那堪憶  
故人亂罹書不遠衰病日相親江浦思歸意明  
朝又一春

寄酬鄴王羅今公五首

營室東迴廢丘丘少年承襲擁青油坐調金鼎  
尊明主橫把琯戈列侯書札二王爭巧拙篇  
章七子避風流西園舊跡今應在衰老無由奉  
勝游

脉散源分歷幾朝縱然官官只卑條正憂末派

淪滄海忽見高枝拂絳霄十萬緜緜趨玉帳三  
千賓客珥金貂良時難得吾宗少應念門更  
寂寥

敢將衰弱附強宗細筭還緣血脉同湘浦煙波  
無舊跡鄴都蘭菊有遺風每憐罹亂書猶達所  
恨雲泥路不通珍重珠璣兼繡段草玄堂下寄  
揚雄

水雲開霽立高亭依約黎陽對福屋只見篇章  
矜鑠管不知勳業柱青冥早緣入夢金方礪晚  
爲傳家鼎始銘鶴髮四垂煙閣遠此生何處拜  
儀形

錦笈袁連復連紫鸞浙江邊縮從海室  
奪煙霧樂奏帝官勝管絃長笑應劉悲顯達每  
嫌伊霍少詩篇戴灣老圃根基薄虛費工夫八  
十年

春日投錢唐元帥尚父二首

正憂衰老辱金臺敢望昭王顧問來門外旌旗  
屯虎豹壁間章句動風雷三都節已懸翻降兩  
地花應次第開若比紫髯分鼎足未聞餘力有  
瓊瑤

征東幕府十三州敢望非才忝上游官秩已叨  
具品職姓名兼顯魯春秋監車願後聲方重火  
井窺來婚始浮一句黃河千載事夾城王樂護  
登樓

錢唐府亭

新恩別啓館娃宮還拜吳王向此中九牧土田  
周制在兩藩茅社漢儀同春生舊苑芳洲兩香  
入高臺小徑風更有龍光人未見問安調膳盡  
三公

野狐泉

滴瀝寒光激路塵相傳妖物此潛身又應改換  
皮毛後何處人間作好人

宿紀南驛

策蹇南游憶楚朝陰風淅淅樹蕭蕭不知無忌  
奸邪骨又作何山野葛苗

贈無相禪師

人人盡道事空王心裏忙於市井忙唯有馬當  
山上客死門生路兩相忘

遺興

青雲路不通歸計奈長蒙老恐醫方悞窮憂酒

蓬空何堪罹亂後更入是非中長短遭譏笑迴  
頭避釣翁

江夏酬高崇節

臘雪都堂試春風汴水行十年雖抱疾何處不  
無情羣盜正當路此游應隔生勞君問流落山  
下已躬耕

鶯聲

井上梧桐暗花間霧露稀一枝晴復暖百轉是  
兼非金屋夢初覺玉關人未歸不堪閉日聽因  
爾又沾衣

放玉臺體

青樓枕路隅壁甃復椒塗晚夢通簾押春寒逼  
酒爐解吟憐芍藥難見恨喜蒲試問年多少隣  
姬亦姓胡

甲乙集卷第七



甲乙集卷第八

餘杭羅

隱昭諫

詩

夜泊義興戲呈邑宰

溪畔維舟問戴星此中三害在圖經長橋可避  
南山遠却恐難妨是最靈

聽琵琶

香筵酒散思朝散偶向梧桐晤處聞大底曲中  
皆有恨滿樓人自不知君

經來陽今林工部墓

紫菊馨香覆筵醪真君江畔雨蕭騷旅魂自是  
才相累開骨何妨塚更高驥騁喪來空蹇蹶芝  
蘭衰後長蓬蒿屈原宋玉憐君處幾駕青螭緩  
鬱陶

題素溪張逸人所居

蒲梢健健燕差差數里溪光日落時芳樹文君  
機上錦遠山孫壽鏡中眉雜窻夜靜開書卷魚  
檻春深展釣絲若使浮名拘絆得世間何處有  
男兒

昇平公主舊第

乘鳳仙人降此時玉篇鏡罷到文詞兩輪水磴  
光明照百尺絞綃換好詩帶礪山河今盡在風  
流罇俎見無期壇場客散香街暝惆悵齊竿取  
次吹

寄黔中王從事

故人刀筆事軍書南轉黔江半月餘別後鄉關  
情幾許近來詩酒興何如貪將醉袖矜鶯谷不  
把瑤絨附鯉魚今日舉場君莫問生涯牢落墮  
蕭疎

關亭春望

關畔春雲拂馬頭馬前春事共悠悠風欺岸柳  
長條因露裊山花小朵愁越信功夫高似狗裴  
王氣力大於牛未知至竟將何用渭水涇川一  
向流

寄徐濟進士

往年踈嬾共江湖月滿花香記得無霜歷楚蓮  
秋後折雨催壺酒夜深酤紅塵偶別迷前事丹  
桂相輕愧後徒出得函關抽得手從來不及阮  
元瑜

寄韋瞻

石城叢筍阻心期落盡山花有所思羸馬二年  
蓬轉後故人何處月明時風催曉燕看看別兩  
脅秋蠅漸漸凝禪智闌干市橋酒縱然相見只  
相悲

嘗溪晚泊寄裴庶子

溪風如扇雨如絲閑步閑吟柳惲詩盃酒踈狂  
非曩日野花狼籍似當時道窮謾有依劉感才  
急應無借寇期滿眼雲山莫相笑與君俱是受  
深知

送姚安之赴任秋浦

官罷春坊地象雷片帆高指賁池開五侯水暖  
魚鱗去九子山晴鴈敎來江夏黃童徒逞辯廣  
都龐今恐非才到頭釋意須年少贏得時光向  
酒盃

寄喬逸人

南經湘浦北揚州別後風帆幾度游春酒誰家  
禁爛煨野花何處最淹留欲憑尺素邊鴻懶未  
定雕梁海燕愁長短此行須入手更饒君占一  
年秋

塞外

塞外偷兒塞內兵聖君宵旰望昇平碧幢未作  
朝廷計白挺猶驅婦女行可使禦戎無上策只  
應憂國是虛聲漢皇第宅秦田土今日將軍已  
自榮

裴庶子除太僕卿因賀

楚珪班序未為輕莫惜良途副聖明官省舊推  
皇甫謐寺曹今得夏侯嬰秩隨科第臨時賁官  
逐簪裾到處清應笑馬安虛巧宦四迴遷轉始  
為卿

詠史

蠹簡遺編試一尋寂寥多爾事似如今徐陵筆硯  
珊瑚架趙勝賓朋玳瑁簪未必片言資國計只  
應邪說動人心九原郝泚何由起虛誤西蕃八  
尺金

中元夜泊淮口

木葉迴飄水面平偶停孤棹已三更秋涼霧露  
侵燈下夜靜魚龍逼岸行欵枕正牽題柱思隔  
樓誰轉遶梁聲錦帆天子在魂魄應過揚州看  
月明

寄池州鄭員外

默繞朱輪酒滿船郡城蕭灑責池邊衣同萊子  
曾分筆扇似來宏別有天九點好山樓上客兩  
行高柳雨中煙陵陽百姓將何福社舞村歌又

一年

歸夢

陸海波濤漸漸深一迴歸夢抵千金路傍草色  
休多事塔外鶯聲肯有心日晚向隅悲斷梗夜  
闌澆酒哭知音貪財敗陣誰相悉鮑叔如今不  
可尋

送溪州使君

兵寇傷殘國力衰就中南土藉良醫鳳銜泥詔  
辭丹闕鵬倚霜風上畫旗官職不須輕遠地生  
靈只是計臨時灞橋酒盞黔巫月從此江心兩  
所恩

送晉川鄭員外

明時塞詔列分麾東擁朱輪出帝畿銅虎貴提  
天子印銀魚榮傍老萊衣歌聽茗塢春山暖詩  
詠蘋洲暮鳥飛知有掖垣南步在可能須待政  
成歸

酬寄右司李員外

當年憶見挂枝春自此清途未四旬左省望高  
推健筆右曹官重得名人閑攜屨藻嫌秋興靜  
獵遺編笑過秦猶把隋和向泥滓應憐疎散任  
天真

蓮塘驛

蓮塘館東初日明蓮塘館西行人行隔林啼鳥  
似相應當路好花疑有情一夢不須追往事數  
盃猶可慰勞生莫言來去只如此君看鬢邊霜  
幾莖

甘露寺火後

六朝勝事已塵埃猶有閑人悵望來只道鬼神  
能護物不知龍象自成灰犀慙水府渾非怪燕  
說吳宮未是災還識平泉故侯否一生蹤跡比  
樓臺

春日登上元石頭故城

萬里傷心極目春東南王氣只遼巡野花相笑  
落滿地山鳥自啼傍人謾道城池須險阻可  
知豪傑亦埃塵太平寺主惟輕薄却把三公與  
賊臣

送宣武徐巡官



傲睨公卿二十年東來西去盡悠然白知關畔  
元非馬玄覺壺中別有天漢帝詔銜應異日梁  
王風雪是初筵臨行不惜刀圭便愁殺長安買  
笑錢

冬暮寄裴郎中

曉髮星星入鏡宜早年容易近年悲敢言得事  
時將晚只恐酬恩日漸遲南國傾心應望速東  
堂開口欲從誰仙郎舊有黃金約瀝膽隳肝更  
禱祈

中元甲子以辛丑駕幸蜀四首

子儀不起渾滅亡西幸誰人從武皇四海為家  
雖未遠九州多事竟難防已聞盱食思真將會  
待畋游致假王應感兩朝巡狩跡綠槐端正驛  
荒涼

爪牙柱石兩俱銷一點渝塵九土搖敢恨甲兵  
為弃物所嗟流品誤清朝幾時睿筆殲張角  
處愚人載隗囂跪望峻山重啟告可能餘烈不  
勝妖

邪氣奔屯瑞氣移清平過盡到艱危縱饒大彘  
迷常理不柰豺狼幸此時九廟有靈思李令三

川悲憶恨張儀不憐一曲還京樂重對紅蕉教  
蜀兒

白丁攘臂犯長安翠輦蒼黃路屈盤丹鳳有情  
塵外遠玉龍無跡渡頭寒靜憐貴族謀身易危  
惜文王創業難不將不侯何計是釣魚船上淚  
關干

題潤州妙善前石羊

傳云吳主孫權典  
蜀主劉備嘗此置

紫髯桑蓋此沉吟銀石猶存事可尋漢鼎未安  
聊把手楚醪雖滿肯同心英雄已往時難問苔  
蘚何知日漸深還有市廛沽酒客雀喧鳩聚話  
蹄涔

登宛陵條風樓寄齊常侍

亂罹時節懶登臨試借條風半日吟遠見晚山  
含曉律不知高閣動歸心溪喧晚棹千聲浪雲  
護寒郊數丈陰自笑疎慵似麋鹿也教臺上費  
黃金

臺城

晚雲陰映下空城六代纍纍夕照明玉井已乾  
龍不起金甌雖破虎曾爭亦知罷世才難得却

是窮塵事最平深谷作陵山作海茂弘流輩莫  
傷情

甘露寺看雪上周相公

飾寒灑白亂溟濛禱請功兼造化功光薄乍迷  
京口月影交初轉海門風細粘謝客衣裾上輕  
墮梁王酒盞中一種爲祥君看取半樓災沴半  
年豐

寄京闕陸郎中昆仲

栢臺蘭署四周旋賓榻何妨鴈影連纔見玳簪  
歌細柳便知油幕勝紅蓮家從入洛聲名大跡  
爲依劉事分偏爭奈亂離人漸少奕城新賦許  
誰傳

偶題

鍾陵醉別十餘春重見雲英掌上身我未成名  
君未嫁可能俱是不如人

故都

江南江北兩風流一作迷津一拜侯至竟不如  
隋煬帝破家猶得到揚州

董仲舒

災孽儒生不合聞護將刀筆指乾坤偶然留得

陰陽術閉却南門又北門

獻尚父大王

數年鐵甲定東甌夜渡江山瞻斗牛今日朱方  
平珍後虎符龍節十三州

蜂

不論平地與山尖無限風光盡被占採得百花  
成蜜後不知辛苦爲誰甜

簾二首

疊影重紋映畫堂玉鈎銀燭共燁煌會應得見  
神仙在休下真珠十二行

翡翠佳名世共稀玉堂高下巧相宜殷勤爲囑  
纖纖手捲上銀鈎莫放垂

甲乙集卷第八

甲乙集卷第九

餘杭羅

隱昭諫

詩

送顧雲下第

行行孟酒莫辭頻，怨嘆勞歌兩未伸。  
漢帝後宮猶識字，楚王前殿更無人。  
年深旅舍衣裳弊，潮打村田活計貧。  
百歲都來多幾日，不堪相別又傷春。

村橋

村橋酒旆月明樓，偶逐漁舟繫葉舟。  
莫學魯人疑海鳥，須知莊叟惡犧牛。  
心寒已分灰無焰，事往曾將水共流。  
除却思量太平在，肯拋踈散換公侯。

送劉枝書之新安寄兵常侍

野雲如火照行塵，會續溪邊去問津。  
才子省街非末客，楚君科第是同人。  
任思下國千場病，負東堂兩度春。  
他日酒筵應見問，鹿裘漁艇隔朱輪。

官池秋夕

池邊月影閑，婆娑池上醉。  
來成短歌芙蓉死。

怨珠露，蟋蟀苦口嫌金波。  
往事向人言，不得舊遊臨。  
老恨空多，松醪作酒，蘭為棹，十載煙塵柰爾何。

奉使宛陵別二三從事

梁王雪裏有深知，偶別家鄉隔路歧。  
官品共傳勝曩日，酒盃爭肯忍當時。  
豫章地暖矜千尺，越嶠天寒愧一枝。  
還有釣魚蓑笠在，不堪風雨失歸期。

金陵思古

杜秋在時花解言，杜秋死後花更繁。  
柔姿曼態葬何處，天紅膩白愁荒原。  
高洞紫簫吹夢想，小窻殘雨濕精魂。  
綺筵金縷無消息，一陣征帆過海門。

送王使君赴蘇臺

東南一望可長吁，猶憶王孫領虎符。  
兩地干戈連越絕，數年麋鹿卧姑蘇。  
疲忙賦重全家盡，舊族兵侵大半無。  
料得伍員兼旅寓，不妨招取好椰榆。

憶九華

九華燒翠陰，柴扉長憶前時此。  
息機黃菊倚風。

村酒熟綠蒲低兩釣魚歸干戈已是三年別塵  
土那堪萬事違迴首佳期恨多少夜闌霜露又  
沾衣

送裴鏡歸會稽

金庭路指剡川隈珍重良朋自此來兩鬢不堪  
悲歲月一厄猶得話塵埃家通叢分心空在世  
逼橫流眼未開笑殺山陰雪中客等閑乘興又  
須迴

送程尊師之晉陵

棟間雲出認行軒郊外陰夏木繁高道乍爲  
張翰侶使君兼是世龍孫溪含句曲清連底酒  
賞餘抗深滿樽莫見時危便乘輿人來何處不  
桃源

吳門晚泊寄句曲道友

採香逕在人不留採香逕下停葉舟桃花李花  
鬪紅白山鳥水鳥自獻酬十萬梅銷空寸土二  
分孫策竟荒丘未知到了關身否笑殺雷平許  
遠游

貴池曉望

根莠參天翳未平且乘孤棹且行行計疎狡兔

無三窟羈甚賓鴻欲一生合眼亦知非本意傷  
心其柰是多情前溪好泊誰爲主昨夜沙禽占  
月明

寄崔慶孫

故人何處又留連月冷風高鏡水邊文陣解圍  
纔昨日醉鄉分袂已三年交情澹薄應長在俗  
態流離且勉旃還擬山陰一乘輿雪寒難得渡  
江船

寄楊祕書

蕭蕭簷雪打窓聲因憶江東阮步兵兩信海潮  
書不達數峯積嶺眼長明梅繁幾處垂鞭看酒  
好何人倚檻傾會待與君開社瓮滿船般載鏡  
中行

酬章處士見寄

中原甲馬未曾安今日逢君萬事端亂後幾迴  
鄉夢隔別來何處路行難霜鱗共落三門浪雪  
鬢同歸七里灘何必新詩更相戲小樓吟罷暮  
天寒

送丁明府赴紫溪任

金徽玉幹肯躊躇偶滯良途半月餘樓上酒闌

梅折後馬前山好雪晴初樂公社在憐錦樹潘  
金花繁賀版輿縣譜其醉留舊本異時度更  
何如

寄前宣州賓常侍

往年西謁謝玄暉樽酒留權醉始歸曲檻柳濃  
鶯未老小園花嫩蝶初飛噴香瑞獸金三尺舞  
雪佳人玉一圍今日亂雁尋不得滿蓑風雨釣  
魚磯

春望山僧院

巖巖危岫倚滄洲聞說秦皇亦此游霸王卷衣  
纒二世老僧傳錫已千秋陰崖水賴松根直蘚  
壁苔侵畫像愁各是病來俱未了莫將煩惱問  
湯休

送光祿崔卿赴闕

十年目斷望西轅此日殷勤聖主恩上國已留  
虞寄命中朝應聽范汪言官從府幕歸鄉寺路  
向干戈見禁門鷓侶寂寥曹署冷更堪嗚咽問  
田園

寄程尊師

鶴信雖然到五湖煙波迢遞路崎嶇玉書分薄

花生眼金鼎功遲雪滿鬢三秀紫芝勞夢寐一  
番紅槿恨朝晡未知朽敗凡間骨中授先生指  
教無

定遠樓

前年上將定妖氛曾築嚴城駐大軍近日關防  
雖弛柝舊時欄檻尚侵雲蠻兵績盛人皆伏坐  
石名高世共聞唯恐亂來良吏少不知誰解敘  
功勳

送程尊師東游有寄

華蓋峯前撥卜耕主人無柰又閑行且憑鶴駕  
尋滄海必恐犀軒過赤城絳簡便應朝右弼紫  
旄兼合見東卿勸君莫忘歸時節芝似螢光處  
處生

江亭別裴鏡

行盃且待怨歌終多病憐君事事同表驥別來  
光影裏故鄉歸去亂惟中乾坤墊列三分在井  
邑摧殘一半空日晚長亭問西使不堪車駕尚  
萍蓬

江南寄所知周僕射

曾陪公子醉西園峴首碑前事懶言世亂共嗟

王粲老時危俱受信陵恩湖憐把盞吟江微雨  
憶平蘭望海門飛蓋寂寥清宴罷不知簪履更  
誰存

錢唐見芮逢

蔡倫池北鴈峯前罹亂相兼十九年所喜故人  
猶會面不堪良牧已重泉醉思把筋敲歌席狂  
憶判身入酒船今日與君贏得在戴家灣裏兩  
瞠然

江都

淮王高宴動江都曾憶狂生亦坐隅九里樓臺  
牽翡翠兩行鳩鷺踏真珠歌聽麗句秦雲咽詩  
轉新題蜀錦鋪惆悵晉陽星拆後世間兵革地  
荒蕪

湖上歲暮感懷有寄友人

雪天瑩席幾辛勤同志當時四五人蘭版地寒  
俱受露桂堂風惡獨傷春音書久絕應埋玉編  
簡難言竟委塵唯有廣都龐令在白頭樽酒憶  
交親

送張綰游鍾陵

南憶龍砂兩岸行當時天下尚清平醉眠野寺

花方落吟倚江樓月欲明老去亦知難重到亂  
來爭肯不牽情西山十二真人在從此煩君話  
姓名

送晉光大師師以車音應制

禹祠分首戴灣逢健筆尋知達九重聖主賜衣  
憐絕藝侍臣攜藻許高蹤寧親久別街西寺街  
詔初離江上峯一種苦心師得了不須回首笑  
龍鍾

息夫人廟

百雉摧殘連野青廟門猶見昔朝庭一生雖抱  
楚王恨千載終為息地靈蟲網翠鬢終縹緲風  
吹寶瑟助微冥玉顏渾似着來客依舊無言照  
畫屏

漂母塚

寂寂荒墳一水濱蘆洲絕島自相親青娥已落  
淮邊月白骨甘為泉下塵原上荻花飄素髮道  
傍菰葉碎羅巾雖然寂寞千秋魄猶是韓侯舊  
主人

感懷

石逕松軒亦自由謾隨浮世逐飄流驚駘路結

恨蝶蜂林生半夜秋掩耳惡聞官妾語低  
顏須向路人羞誰教小意相催逼未到青雲擬  
白頭

扇上畫牡丹

為愛紅芳滿砌堪教人扇上畫將來葉隨綠筆  
參差長花逐輕風次第開閑掛幾曾停蛟蝶頻  
搖不怕落莓苔根生無地如仙桂疑是姮娥月  
裏栽

書懷

釣船拋却異鄉來擬向何門用不才日晚獨登  
樓上望馬蹄車轍滿塵埃

七夕

月帳星房次第開兩情唯恐曙光催時人不用  
穿針待沒得心情送巧來

柳

一簇青煙鎖玉樓半垂欄畔半垂溝明年更有  
新條在繞亂春風卒未休

羅敷水

雉聲角角野田春試駐征車問水濱數樹枯桑  
雖不語思量應合識秦人

京中正月七日立春

一二三四五六七萬木生涯是今日遠天歸鴈  
拂雲飛近水游魚迸冰出

貴游

館陶園外雨初晴繡轂香車入鳳城八尺家僮  
三尺箠何知高祖要蒼生

嚴陵灘

中都九鼎勤英毛漁釣牛蓑且遁逃世祖昇遐  
天子死原陵不及釣臺高

甲乙集卷第九

甲乙集卷第十

餘杭羅 隱昭諫

詩

虛白堂前牡丹相傳云太傅手植在錢

唐

欲詢往事柰無言六十年來此托根香暖幾飄  
表虎扇格高長對孔融樽曾憂世亂陰難合且  
喜春殘色尚存莫背欄干便相笑與君俱受主  
人恩

縣齋秋晚酬友人朱瓚見寄

中和節後捧瓊環坐讀行吟數月來只嘆雕龍  
方擅價不知頰尾竟空迴千枝白露陶潛柳百  
尺黃金郭隗臺惆悵報君無玉案水天東望一  
徘徊

第五將軍於餘杭天柱宮入道因寄

交梨火棗味何如聞說若川已下車无棹尚攜  
京口酒草堂應寫潁陽書亦知得意猶乘鶴未  
必忘機便釣魚却恐武皇還望祀軟輪御入問  
玄虛

寄無相禪師

老住西峯第幾層為師回首憶南能有緣有想  
應非佛無我無人始是僧爛權作袍名復利錄  
金為講愛兼憎何如一衲塵埃外日日香煙夜  
夜燈

秋日有寄

丹青未合便迴頭見盡人間事始休只有百神  
朝寶鏡永無纖浪犯虛舟曾臨鐵笈雖分職近  
得金陵亦偶游東去西來人不會上卿蹤跡本  
玄洲

送前南昌崔令替任映攝新城縣

五年苛政甚蟲螟深喜夫君已戴星大族不唯  
專禮樂上才終是惜生靈亦知單父琴猶在莫  
厭東歸酒未醒二月春風何處好亞夫營畔柳  
青青

下第作

年年模樣一般般何似東歸把釣竿岳谷謾勞  
思雨露彩雲終是逐鴉鷺塵迷魏闕身應老水  
到吳門葉欲殘至竟窮多也須達不能長與  
人看

丁亥歲作 中元甲子



病想醫門渴望梅十年心地槿成灰早知世事長如此自是孤寒不合來谷畔氣濃高蔽日豈邊聲暖乍聞雷滿城桃李君看取一一還從舊處開

北邙山

一種山前路入秦嵩山堪愛此傷神魏明未死虛留意莊叟雖生酌滿巾何必更尋無主骨也知曾有弄權人羨他鐵嶺吹簫客悶傍雲頭看俗塵

三衢哭孫貞外

燕戀雕梁馬戀軒此心從此更何言直疑塵外三生命未敵君侯一日思紅蠟有時還入夢片帆何處獨銷魂忍看明發衣襟上珠淚痕中見酒痕

送蘄州裴員外

六枝仙桂最先春蕭灑高辭九陌塵兩晉家聲須有主大朝文雅別無人榮驅豹尾拋同輩貴上靖頭見近臣斬水蒼生莫看歸去掌絲綸

重九日廣陵道中

秋山抱病何處登前時章曲今廣陵廣陵大醉不解悶章曲舊遊堪拊膺佳節縱饒隨分過流年無奈得人憎却驅羸馬向前去牢落路歧非所能

東歸別所知

芙蓉宮闕二妃壇兩處因依五歲寒鄒律有風吹不變祁枝無分住應難愁心似火還燒鬢別淚非珠謾落盤却羨淮南好雞犬也能終始逐劉安

旅舍書懷寄所知二首

思量前事不堪尋牢落餘情滿素琴四海豈無騰躍路一家長有別離心道從汨沒甘雌伏跡恐因循更陸沉寂寞誰應吊空館異鄉時節獨沾襟

沾襟

簾卷兩床琴瑟秋暫憑前計奈相尤塵飄馬尾甘蓬轉酒憶江邊有夢游隋帝舊祠雖寂寞楚妃清唱亦風流可憐別恨無人易獨背殘陽下寺樓

西京道中

半夜秋聲觸斷蓬百年身事集成空禰生詞賦

拋江夏漢祖精神憶沛中未必他時能富貴只  
應從此見窮通邊禽龍水休相笑自有滄洲一  
棹風

粉

每持纖白助君時霜自無膠雪自疑郎若姓何  
應解傳女論窺宋不勞施粧成麗色唯花妬落  
盡啼痕只鏡知最好玉京仙署夏更和秋月照  
瓊枝

贈漁翁

葉艇悠揚鶴髮垂生涯空托一輪絲是非不向  
眼前起寒暑任從波上移風濤長歌籠月裏夢  
和春兩晝眠時逍遙此意誰人會應有青山淥  
水知

下第寄張坤

謾費精神掉五侯破琴孤劍是身憐九衢雙闕  
擬何去玉壘銅梁空舊游蝴蝶有情牽曉夢杜  
鵲無賴伴春愁思量不及張公子經歲池江倚  
酒樓

東歸別常修

六載辛勤九陌中却尋歸路五湖東名慙桂苑

一枝綠繪憶松江兩筋紅浮世到頭須適性男  
兒何必盡成功唯慙鮑叔深知我他日蒲帆百  
尺風

言

珪玷猶來尚可磨似篋終日復如何成名成事  
皆因慎亡國亡家只為多須信禍胎生利口莫  
將譏思逞懸河程程鸚鵡無端解長向人間被  
網羅

簡今生日

祥煙霽靄拂樓臺慶續玄元節後來已向青陽  
標四序便從萬嶽應三台龜銜玉柄增年算鶴  
舞瓊筵獻壽盃自顧下儒何以祝柱天功業濟  
時才

晚眺

凭古城邊眺晚晴遠村高樹轉分明天如鏡面  
都來淨地似人心恕不平雲向嶺頭閑不做水  
流溪裏太忙生誰人得及莊居老免被榮枯寵  
辱驚

野花

萬點紅芳血色殷為無名字對空山多因戲蝶

尋香佳少有行人撥棹攀若在侯門看不足為  
生江岸見如閑結根必竟輸桃李長向春城紫  
陌間

病驄馬

纏上病驄踏裏裏江邊廢宅路迢迢自經梅雨  
長垂耳乍食菰漿欲折腰金絡銜頭光未滅玉  
花毛色瘦來焦曾聽禁漏驚街鼓慣踏康塵怕  
小橋夜半雄聲心尚壯日中高卧尾還搖龍媒  
落地天池遠何事牽牛在碧霄

秋浦

晴川倚落暉極目思依依野色寒來淺人家亂  
後稀久貧身不達多病意長違還有漁舟在時  
時夢裏歸

南康道中

弱冠負文翰此中聽鹿鳴使君延上榻時輩仰  
前程丹桂竟多故白雲空有情唯餘路旁浹沾  
灑向塵纓

北固亭東望寄默師

高亭暮色中往事更誰同水浸矜天關山應到  
此窮病憐京口酒老怯海門風唯有言堪解何

由見遠公

華清宮

樓殿層層佳氣多開元時節好笙歌也知道德  
勝堯舜爭奈楊妃解笑何

韓信廟

剪項移秦勢自雄布衣還是負深功寡妻稚女  
俱堪恨休把餘盃奠荆通

韋公子

擊筇狂歌慘別顏百年人事夢魂間李將軍自  
嘉聲在不得封侯亦是閑

望思臺

芳草臺邊魂不歸野煙喬木弄殘暉可憐高祖  
清平業留與閑人作是非

帝幸蜀

馬嵬山色翠依依又見鑿鑿幸蜀歸泉下阿壘  
應有語這迴休更怨揚妃

王夷甫

把得閑書坐水濱讀來前事亦酸辛莫言塵尾  
清譚柄壞却淳風是此人

鷺鷥

斜陽澹澹柳陰陰  
風裏寒絲映水深  
不要向人誇索白也  
知常有羨魚心

書淮陰侯傳

寒燈挑盡見遺塵  
試瀝椒梨合有神  
莫恨高臺不終始  
滅秦謀項是何人

青山廟

市蕭聲咽跡崎嶇  
雪耻酬恩此丈夫  
霸王兩亡時亦異  
不知魂魄更歸無

小松


已有清陰逼座隅  
愛聲仙客肯過無  
陵遷谷變須高節  
莫向人間作大夫

竹

籬外清陰接藥欄  
晚風交夏碧琅玕  
子猷歿後知音少  
粉節霜勻謾歲寒

謾天嶺

西去休言蜀道難  
此中危峻已多端  
到頭未會蒼蒼色  
爭得禁他兩度漫



甲乙集卷第十

春... 卷第十

去歲... 集惜... 陸... 聖... 潤... 山... 書... 願... 金... 過... 自... 余... 志... 余... 銷... 六... 宋... 見... 嘉...

卷之五五月望日重展讀于新居縣橋之百索二堂中并取四卷殘字本復對

一過彼印本差誤紙背有至正十一年字跡蓋元印也舊藏毛氏漢古閣與序

玉照家未知渠兩家收藏時尚全百卷中墨釘多同間有舊人校補字各書于

上方可謂慎重矣就所補者疑于此以備參攷如卷二管仲及樂毅兩篇本在卷末

前漢列已然此亦影寫補全他日與友人易之未久公曰或前新記校整于此

卷四蘇武李陵馬本同卷三卷七處未知所據是何本就字以論之當在毛序之家收藏

美言識



